

DUNGTHLUNTU LAMZIN

DISCIPLE JOURNEY

VOLUME 1

JESUH THUPEK:

“Lei le vanih thuneihsak hmuahhmuah cu ka hnenah pek a si zo. Curuangah feh uhla miphun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” (Mathai 28:18-20).

FALAM CHRISTIAN CHURCH OF INDIANAPOLIS

**5225 S. MERIDIAN ST.
INDIANAPOLIS, IN 46217**

**DUNGTHLUNTU LAMZIN
DISCIPLE JOURNEY**

**VOLUME 1
HRAMTHAWHNAK
THE BEGINNING**

**ZUMTU THAR HRANGAH KEKAR HMAISA
FIRST STEP FOR NEW DISCIPLE**

A SUNGTHU PAWL

SESSION 1. ZIANG A RAK CANG?

SESSION 2. KHRIH CU NUN LAI MURIL ASINAK

SESSION 3. BAPTISMA AH JESUH DUNGTHLUN

SESSION 4. JESUH THAWN CAAN FIANHRIAL

SESSION 5. THLAWSUAHMI MIBUR

SESSION 6. JESUI RAWNGBAWLPI

SESSION 7. DUNGTHLUNTU SINAK SIMFIANGNAK

SESSION 8. DUNGTHLUNTU LAMZIN SIMFIANGNAK

SESSION 9. JESUH IN A DUNGTHLUNTU A KO

SESSION 10. JESUH IN DUNGTHLUNTU A ZIRH

SESSION 11. JESUH IN DUNGTHLUNTU PAWL A THUAM

SESSION 12. JESUH IN DUNGTHLUNTU PAWL A THLAH

**DUNGTHLUNTU LAMZIN
DISCIPLE JOURNEY**

SESSION 1

**HRAMTHAWHNAK
THE BEGINNING**

ZUMTU THAR HRANGAH KEKAR HMAISA

FIRST STEP FOR NEW DISCIPLE

**DISCIPLE JOURNEY: SESSION 1
ZIANG A CANG?
(WHAT JUST HAPPENED?)**

DISCIPLE JOURNEY: SESSION 1 ZIANG A CANG? (WHAT JUST HAPPENED?)

Duhdawt zangfahnak in a khatmi Pathian in amai hmuihmel kengin a lo sersiammi vekin na hlohna hmun ih ta Pathian insang sungtel na si sal theinak ding hrangah cat bang loin a lo hawl suak asi.

Pathian Insang sungah cibai!

Dungthluntu (DISCIPLE) TIMI CU ZIANG ASI?

Jesuh dungthluntu si dingin na thinlung timtuah zo ruangah thiltha na tuah asi. Zumtu dik, khrihfa dik timi cu Jesuh dungthluntu asi. “Tlawngta cu a saya hnakin a thiam sawn dah lo; a sinain tlawngta cu a zirnak a theh tikah cun a saya bangtuk a si ding,” (Luke 6:40).

1. Disciple timi cu Pathian fate asi.

I John 3:1, I Pathian kan Pa-ih in duhdawt zia hi ruathnik uh! In duhdawtnak a maksak ruangah Pathian faale tiih kawh kan si hi; cutiih in ti vekin kan si taktak. Curuangah a si hi khawvelih in theih lonak cu! Pathian khal a thei lo.

2. Jesuh dungthluntu (Disciple) leitlunah mikhual asi.

I Peter 2:11, Ka duhdawtmi ka rualle tla, hi leilung tlunah mikhual le raltlaanmi bangtuk nan si ih nan hnenah zaangfah ka lo dil a si. Thlarau thawn a ral aw ringringmi taksa hiarnak in lo neh hram hlahseh.

3. Jesuh dungthluntu (Disciple) cu Khrih ih palai asi.

II Kor. 5:17, 20. 17Zozo khal Khrih thawn an pehzom awk tikah cun mithar a si; a nun hlun cu a cem ih nun thar a thok zo. 20Curuangah kannih cu Khrih palai kan si. Pathian amah rori kanmah sungin thu a sim vek khin thu kan sim. Khrih ih hmin in kan lo sawm: Pathian thawn rem-aw uhla a ral sinak in a rualpi ah cang hram uh.

Jesuh dungthluntu discipleship lamzin na thlun tikah Jesuh thawn nan pehtlaihnak a cak sinsin dingih zumnak ah thuk sinsin kau sinsin in na nun lam a lo hruai ding. Cutin na nun rahsuahmi ah lungawi, hngam daihnak, duhdawtnak luangliam in na khat ding asi.

HRAMTHAWKNAK

Jesuh dungthluntu lamzin thlun dingin na timtuah vekin duhnak le thu thluknak na neih mi cu a fiang zo. Nangmah lamah na duhnak lawng si loin na sungah Pathian hna a tuan ih a cangvai ti khal a fiang asi. Na nunah Pathian thawn nan tawn awknak thu zohsal hnik uhsi. Na nunah Pathian thawn nan pehtlaih awknak dunglam thu malte kan zoh hnik pei.

Pathian aw na theih hmaisai bik thu sim hnik aw.

Pathian hnenah thla na cam hmaisai bik mi thu sim hnik aw.

Na nunah Pathian in a lo umpi, a cangvai rero na cingin na rak theih lo can a um mi ziangvek dinhmun ah asi pei, sim thei mi na nei maw?

THLACAM

Pathian thawn biakpawh awknak pakhat cu thlacam in asi. Thlacam timi cu Pathian thawn biak awknak asi ih na thinlung sungah ziang a um, sim asi ih a nih in a lo biak mi a aw ngai asi. Tikcu rei lo te hmangin Pathian a um asi ti upatnak ah na lu kun in kiangkap hnaihknoknak um lo dingin na mitsing in thlacam aw. A hnuailam thu pa 5 pawl vekin thlacam aw:

- i. Pathian cibai buuknak: “Ka Pa” “Ka Pathian” “I rundamtu” ti in nangmai lungsung muril puak in Pathian cu cibai buuknak thawn be aw.
- ii. Na lungawinak thu pawl Pathian hnenah sim aw.
- iii. Ziang thu pawl na ngai pawimawh, helhkam tvp sim aw.
- iv. Bible zir ding mi theihfeng theinak dil aw.
- v. Pathian in a lo biak pawhna aw ngai aw.

THUHMAIHRUAI (INTRODUCTION)

Sersiamthar. Piangthar. Rundammi. Tlenmi.

Jesuh in dungthluntu pawl a kawh tikah “I thlun aw” ati. A tlunlam tongkam pawl umzia neta ah Bible ih in zirh vekin kan zir vivo ding. Piangthar, sersiamthar timi cu nun hlun tanta in nunthar in nun asi. Siar aw: II Kor. 5:17, Zozo khal Khrih thawn an pehzom awk tikah cun mithar a si; a nun hlun cu a cem ih nun thar a thok zo.

- **Ziangvek thilhlun pawl na nun ihsisn a cem ding tiah na ruat?**
- **Zaingingvek nunthar in na nitin nun na thuam aw ding tiah na ruat?**

Pathian zangfahnak in zumtu nunah Pathian phuansuah awkdan a dangdang ciar thei. Na nun zalam tluan ah thlun mi na nei dah maw? Asile ziangkim sersiamtu Pathian in “I thlun aw” (Mathai 4:19) a ti tikah a danglam zet ding asi.

BIBLE THUANTHU

Hlawhsam zetin sur a vorh rero hnu ah Peter cu Jesuh thawn an tawn awk tikah Jesuh in mangbangza in nga tampi a kaihter tikah Peter cu Jesuh ke hramah kun in a biak asi.

Luke 5:4-11, 4Thusim a theh tikah Simon hnenah, “Ti thuknak lamah na long hi thawn awla na rualpi pawl thawn nan sur cu vun vorhnik uh,” tiah a ti. 5Simon in, “Bawipa, taima zetin zanvarte kan vorh nain zianghman kan awk lo. Sikhalsehla vorh uh, in ti a si ahcun kan vorh a si pei cu,” tiah a ti. 6Sur cu an vun vorh ih nga tam ngaingai an awk ih an sur tiangin a tlek thehzik. 7Cutikah long dangih an rualpi pawl kha, “In ra bawm uh,” tiah an kut an hei zaap. An ra ih an long pahnih cu nga khattein an ret ih an long cu a pil zikte. 8Cumi cu Simon in a hmuh tikah Jesuh ih khuk kiangah a khuk a bilh ih Jesuh hnenah cun, “Bawipa, i fehsan hram aw; ziangah tile kei hi misual ka si!” tiah a ti. 9Amah le a rualpi pawl cu nga tam ngaingai an aw h ruangah an mang a bang ngaingai. 10Cuvek thothe in amah thawn nga a kaitu Zebedi ih fapa Jeim le Johan khal an mang a bang ve. Jesuh in Simon cu, “Na thin phang hlah; atu thokin minung kaitu na si ding,” tiah a ti. 11An long pawl cu ti kapah an dinter ih an thil hmuahhmuah fehsan in Jesuh cu an thlun.

- **Na nitin nunah Jesuh dungthlun timi cu ziangvek cekci asi?**
- **Ziangruangah Jesuh dunthlun cu a har? Ziangtin a awlsam deuh pei?**

Jesuh dungthlun cu daan thlun asilo, mi-thlun asi. Amah duhnak, a nuntudan in kan ziangkim in luahkhat theh ih amah nundan in nun, a duhmi duh, a tuahmi tuah, in a huatmi huat asi. A nundan zir in nun, a hnaturan leitlun ah tuan asi.

THUANTHU HAIHLANGNAK

Sersiamnak. Milai tluknak. Tlennak. Sersiamthar nak. Himi thil pali hi Pathian ih hnaturan ropi, Thuthangtha thuanthu khaikhawm asi. Kan khristian nun khaikhawmtu khal asivekin pakhat hnu pakhat zoh uhsi.

SERSIAMNAK- A hramthok ah Pathian in a sersiam. A tongkam in ziangkim, lei le van, arsi phunkim, a tum a sem in a sersiam theh. Tidai a thiang, sersiammi cu bal lo in a umih sersiammi cu famkim asi. Cutin Pathian in amah hmuahmel kengin mipa le nunau a semsuah asi.

Pathian cu sersiamtu asinak theih hi ziangruangah a thupi?

MILAI TLUKSIATNAK- Tluksiatnak a thleng. Nunau thinlung sungah satan in zum lo nak a thunlut ih Pathian sersiammi le pekmi hnaki thasawn thu tiam tahratin a bum. Cutin Pathian tongkam zum nawn lo in Pathian an dungtun. Cucu sual asi: ruahnak, lungput, le tuahnak in Pathian dungtun asi.

Sual umzia le sual in a rahsuahmi thu ziangvek na zir dah?

Sual in ziangtluk tuisan milai nun a hngawr?

Thahrum hmangin Siatsuah awknak. Duh amnak. Natnak. Cutin famkim zetin sersiammi cu soal, thim, hlohralnak in a cim. Cutin milai cun nun ih san ziang asi ti hawl in lamzin a hlo ih milai duhzawng le ruahdan in rumdannak lamzin a hawl. Leitlun in Rundamtu a tul.

Kum zatel reipi Pathian in milai cu a hawl. Hruaitu, prophet, puithiam pawl a pek ih amah thawn pehtlaihnak tuah tha dingin lamzin a sialsak theu. Asinan milai in Pathian khawkhan cu dungtun in milai duhdan ruahdan in a lamzin a peng rignring. Pathian ih rundamnak famkim a thlendingmi a um hrih.

TLENNAK – Soal in milai nunah a rahsuaahmi pawl siatbal theh in milai luatnak pe dingin, misualral pa hnen ihsin rundam dingin, milai cu Pa Pathian thawn rualrem sal dingin Jesuh cu leitlun ah a ra ih kross parah a thi asi. Pathian sinak famkim a neih tikah milai rundam dingin a famkim. Milai sinak a neih tikah milai dinhmun zaahza a thei ih Pa Pathian hmaiah palai a tuan theinak asi. Tlennak famkim a thleng: nithum hnu ah Jesuh cu thlan sung ihsin a thosal ih thihnak neh tahratin soal ih thilti theinak a tawpter asi.

Jesuh cu zaahza Pathian le milai sinak a nei timi cu na hrangah ziang sullam/san a nei?

SERSIAMTHAR- Thlan sung a lawng ih Jesuh a thohsal tikah thuanthu tawpnak asilo, a thoksawn asi. Pathian in milai thuanthu a thleng danglam ih leitlun pumhuap in milai tampi sersiamtharsal an si ih an thinlung le nunnak a thleng nak asi sawn. Cutin Jesuh a rat sal tikah a siat zomi sersiammi cu kumkhua hrangin a remthatsalnak ding ni hngak in sersiammi ziangkim a um sawn asi.

Pathian in ziangkim parah a khawkhan mi thuanthu na theih tikah ziangtal in na thinlung a lo thawng maw? Ziangruangah?

TEL VE AW.

Phi 2:5-11 awn in siar aw la, Jesuh dungthluntu pawlin zir dingmi Jesuh lungput le tuahmi pawl a hnuailam ah ngan aw:

Phi. 2:5-11, 5Nan thinlung put daan cu Khrih Jesuh ih thinlung put daan vekin siseh. 6Khrih cu Pathian sinak a nei ringring; Asinain Pathian bang dingah hranhram in a tum dah lo. 7Cu ai-ah, Amah ih lungtho tein, a sinak hmuahhmuah a taansan ih, hnen-um sinak la tahratin, Minung ah a cang ih minung pianzia in a piang. 8Tangdornak thinlung a nei ih, Pathian thu thlun in, Thinglamtah thihnak tiangin a tuar. 9Curuangah a saang bik hmunah Pathian in a cawisaang ih, Hmin hmuahhmuah lakih cungnung bik hmin a pek. 10Cuti a si ruangah, Jesuh hmin upatnak pekin, Vancung ih a ummi hmuahhmuah in siseh, Leitlun le leihnuai ih a ummi * hmuahhmuah khalin siseh, an khuk an bilh ding ih, 11Jesuh Khrih cu Bawi a si, tiah Pa Pathian sunlawinak ah an zate in an phuang ding.

Jesuh sinak lungput le tuahnak na zir ding pawl ngan aw:

....

BIBLE SIAR DING: Bible na siar pah in na hmuhsuah tharmi, na lungsung tapbikmi ngan aw

1. Mark 1:1-15
2. Mark 1:16-28
3. Mark 1:29-45
4. Mark 2: 1-17
5. Mark 2:18-28
6. Mark 3:1-19
7. Mark 3:20-35

Thlacam na dil duhmi pawl ngan aw:

ZARHKHAT SUNG TUAH DINGMI

Zarhtin tuah dingmi group ah rel khawm in lungkimnak tuah aw.

Pathian biaknak

- Nitin Bible siar ding kha siar aw
- Pathian thawn bulpak pawlkomnak nei ringring aw.
- Zingtin thlacam thutlangpi pa 5 thawn thlacam ringring aw.

Bulpak Bible zirnak

- Jesuh ziangtin a ra? Timi siar aw.
- Jesuh ziangruangah a ra? Siar aw.

Nunpi ding.

- Kawhhran khawm ah khawm aw aw. Pastor ih thusimmi note la aw.
- Jesuh zumtu dang thawn pawlkomnak nei aw la, Jesuh Khrih ah na nunthar thu sim aw.
- II Kor. 5:17, zohlo in siar ngah dingin zuam aw.
- Nitin nikhat ah thil pakhat tal, Pathian hnen ihsin na zir mi ngan aw.

PAI INNPI AH KIRSAL

Jesuh ih thusim hmaisa ah hitin asim, Mathai 4:17, 17Cuih tikcu ihsin Jesuh in, “Nan soal sir uh, ziangah tile vancung Uknak a nai zo,” tiah thusim hram a thok. Thirhthlahbu sung khalah sermon hmaisa cu hitin asi, Tirh 2:38, Piter in an hnenah, “Nan zatein nan soal sir fingsing uhla Jesuh Khrih hmin in baptisma lak uh; cuticun nan sualnak ngaidam nan si ding ih Pathian laksawng Thlarau Thianglim nan ngah ding.

Sualsirnak cu Pathian thawn rualremsalnak ah a hramthok asi: thinlung ruahnak, duhnak, le tuahnak in Pathian thawn pumkhat sisalnak asi.

Sualsirnak cu Pathian hnen kan thlen theinak hrangah asi lo ih Pathian hnen kan kirkak sawn asi.

Ziangtin nangmai nunah nun thleng awknak, sualsirnak na nei?

Luke 15:11-24, siar awla fapa tlan hlo thuanthu ihsin na thinlung sungah ziang na ruat hmais bik?

Fapa tlanhlo thu sungah mai inn suahtan in a hlomi pa thu a sim. A sir awksal tikah a pai inn ah a kirkal. Sualsirnak thu in zirh.

Kross parah Jesuh in in tuahsakmi thu parah na hngat awk hlanah ziangthu parah hngat aw in na rak nung theu?

Pa innpi kan kirkalnak cu Korss par ihsin a thok mi asi. Kross parah kan soal leiba in peksak theh zo ruangah Pai innpi sungah kan kirkal thei nak ding sangka in onsak zo asi. Vanih a ummi zangfah duhdawtnak in a khat mi kan Pa Pathian cun a hlo mi a fale in hmuhsuak ih amai hnenah kan thlen sal lai hlan lo in hawl suak asi. Pa Innpi sungah laklut na si.

Na nunnah Pa hnen kirkal dingin na her awk tulmi ziangvek a um, thimnakah ziangvek pawl na lamzin na thleng a tul?

BULPAL ZIRNAK

JESUH ZIANGTIN A RA?

Kan hnenah naute a suak zo; Kan hrangah fapa peek a si zo; Amah cu in uktu a si ding. Amah cu “Mangbangza Remruattu,” “A cakmi Pathian,” “Kumkhua ih Pa,” “Daihnak Siangpahrang,” tiah kawh a si ding, (Isaiah 9:6).

Pa Pathian in ziangkim a thatnak in in tuahsak dingmi cu in tiamkam cia mi asi. Curuangah sualsal tangmi luatter dingin, thil ziangkim dingfel ten remtha sal dingin, tharthawh sal dingin Jesuh leitlun ah a ra. Jesuh leitlun a ratnak phunli in zoh hnik uhsi.

1. Jesuh cu vanram ah amai hmun nuam tlansan in buainak in a khatmi leitlun ah a ra.

Jesuh cu leitlun a rat tikah naute in a piang ih a sersiammi milai thu hnuai ah a thanglianah milai rundamnak ding zoh in leitlun ah a ra. Tidai wine ah a cangter, mina a damter, mithi a kai tho.

Asinain Jesuh cu, Pathian zaangfahnak ruangah mi hmuahhmuah ai-ih a thihnak ding hrangah, amah cu caan tawite sung vancungmi hnakin niam deuhah tuah a si ti kan hmu. Cule cutiuh thihnak a tuar ruangah atu-ah cun sunlawinak le upatnak lukhuh khumin kan hmu. Heb 2:9.

Jesuh thu hitin na rak ruat dah maw? Jesuh leitlun ah a rat dan na ruat tikah sualnak in a khatmi leitlun ah na umdan ding ziangtin a danglam ter?

2. Jesuh cu milai sinak in thum aw in a ra.

Milai in a rung piang, taksa ruangpum a nei, taksa in a um sung cu tawpcin a nei ve, riahsia lungawi thei asi ve, taksa le thinlung khalah a thang, milai pehtlaihnak khalah a thangso (Matt. 1:18; John 19:28). Milai sinak zaahza a neih ruangah kan palai a tuan thei ih kan sualman leiba in peksak in Pa Pathian hmaiah palai in tuansak thei asi. Cuihlei ah zoththim dingin leitlun ah a rak nung.

Philipians 2:7-8, 7Cu ai-ah, Amah ih lungtho tein, a sinak hmuahhmuah a taansan ih, hnen-um sinak la tahratin, Minung ah a cang ih minung pianzia in a piang. 8Tangdornak thinlung a nei ih, Pathian thu thlun in, Thinglamtah thihnak tiangin a tuar

3. Jesuh cu Pathian sinak nei in a ra.

Jesuh cu milai taksa in a thum awk dingin naute a rung can tikah milai hrangah a cang thei lo mi, fala thianghlim in naute a pai mi asi. Amah le amah a Pathian sinak a phuang, Pathian in Jesuh cu Pathian asinak a sim, khawsia thlarau sual pawl khalin jesuh cu Pathian asinak an sim. Thilmak a phunphun Pathian lawngih tuah thei mi pawl a tuah ih sual thlah nak in Pathian asinak a langter. (Matt. 1:18; Kol. 2:9).

I John 5:20, 20Pathian Fapa cu a ra zo ih theihthiamnak in pek ruangah Pathian taktak kan thei, ti a fiang. A Fapa Jesuh Khrih thawn pehzomnak kan neih ruangah a dikmi Pathian thawn pehzomnak kan nei thei. Amah cu a dikmi Pathian a si ih kumkhua nunnak khal a si.

Jesuh cu zaahza Pathian, zaahza milai asi timi thu na ruahnak ah pom harsa timi na nei maw, ziangruangah?

Mizia pahnih a neih tulnak, a thupitnak ziang asi?

4. Jesuh cu leitlun ah rian ding, pumpe dingin le rundam dingin a ra.

Rome 5:8, Sikhalsehla Pathian in ziangtlukinso in duhdawt ti cu a langter: misual kan si hrih na cingin kan hrangah Khrih cu a thi!

Jesuh cu Pathian palai, le minung karah palai tuan dingin danglam zetin a rung piang.

I John 4:9-10, Pathian ih in duhdawtnak cu a Fapa neihsun hi leilungah hin run thlah in a langter ih amah thawngin nunnak kan conak dingah a si. 10Duhdawtnak timi cu hiti in a si: Kanmah in Pathian kan rak duhdawt ti a si lo, amah sawn in in duhdawt ih a Fapa a run thlah; cumicu kan sualthlah raithawinak dingah a si.

Rundamnak timi cu Pathian hrangah ziang kan tuah timi ah siloin Pathian in kan hrangah ziang a tuah timi sawn ah a thum aw ti na theih fiang tikah ziangtin na nun a danglam ter?

ZIANGRUANGAH JESUH LEITLUN AH A RA?

Khrihfa sinak cu Pathian hrangah ziang kan tuah timi asilo, Pathian in kan hrangah ziang a tuah timi sawn asi. Sualsal tang in luatter, kan leiba in peksak, thihnak ihsin luatnak in pek, cutin amah thawn rualremnak in tuahsak. Milai thuanthu lamzin peng zo mi cu Jesuh in a rem thatsai asi.

Sualnak: Sual leiba timi tongkam cu zokhal ih theihmi asi. Adam cithlah hmuahhmuah soal sungah kan tlu se theh zo. Asinan Jesuh in kan tluksiatnak ihsin in rundam zo. Jesuh sung ihsin soal ngaidamnak kan co, thianfai ter kan si.

2 Korin 5:21, Sikhalsehla kanmah ih ruangah Pathian in sualnak zianghman a nei lomi Khrih kha soal ah a canter ih cuticun amah ih zaarah Pathian ih dingnak kan tawm venak dingah a si.

Sual leiba thu na ruahmi hmingsin in ngan aw.

Saltang: Kross parah kan soal leiba in peksaknak ruangah soal le a rahsuahmi thihnak ihsin luatnak kan ngah zo.

Roman 6:22-23, Sikhalsehla atu-ah cun sualnak ihsin luattermi nan si zo ih Pathian ih salah nan cang zo. Nan hlawkmi cu Pathian hnenih hlanmi nunnak thiag a si ih cumi in a suaupimi cu kumkhua nunnak a si. 23Ziangah tile sualnak ih hlawhman cu thihnak a si; sikhalsehla Pathian ih laksawng cu kan Bawipa Khrih Jesuh thawn kan pehzom awknak thawngin kumkhua nunnak a si.

Saltannak thu na ruahmi ngan khum aw.

Then awknak: Jesuh in Pathian le milai karlah daltu in hlawn sak. Cutin Pathian le milai karlah pehtlah awknak thar a um: cucu rualremnak tiah kawh asi.

Rom 5:10-11, Hlanlaih cun Pathian ih ral kan rak si, sikhalsehla atu cu a Fapa thihnak ruangah a rualpi ah in tuah zo. Pathian ih rualpi kan si zo ruangah Khrih ih nunnak in ziangtlukin so in runsuak sinsin ding. 11Hi lawng hi a si hrih lo; Pathian rualpi ah in cantertu kan Bawipa Jesuh Khrih ruangah Pathian ih thil tuahmi ahhin kan lung a awi ngaingai a si.

Pathian le milai then awknak thu na ruahmi ca sungah ngan khum aw.

Jesuh in kross parah kan soal leiba in peksak ih kan mawhnak hmuahhmuah in hlawnsak. Cutin sualsal sung ihsin in luatter ih Pathian thawn rualremnak in tuahsak zo. Himi thu ah na ruahmi pawl ca sungah ngan khum aw.

A tlunlam thu pawl theihfeng lo mi na nei maw? Zo hnenah tu zarh sungah na sut fiang ding?

Jesuh kross parah a thih tikah nuamnung kan cennak hrangah asilo, rundam kan sinak dingah asi. Cutin leitlun thlarau raal lakah ruahsannak Thuthangtha simtu dingah in rundam sawn asi.

Himi rundamnak thudik na thieh fiang nak in nun timi na ruahdan ziangtin a danglam ter?

**DUNGTHLUNTU LAMZIN
DISCIPLE YOURNEY**

**HRAMTHAWHNAK
THE BEGINNING**

SESSION 2

**KHRIH CU NUN MURIL ASI
THE CENTRALITY OF CHRIST**

Khrihfa pawl cu thlarau lam do thlennak tuahtu, Khrih cu nun muril ah a neitu an si.

KHRIH CU NUN MURIL ASI

HRAMTHOHNAK ZOHSAL

A hmaisah ah Pathian in milai thuanthu a timtuh dan, a khawkhan le Pathian in milai in kawhna le hawlsuaknak thuanthu tawi kan zir zo. Jesuh thihnak in kan sualman leiba in peksaknak, saltannak ihsin kan luatnak, Pathian thawn kan pehzawmnak a siatzo mi tuahtatsalnak pawl kan zir. Cuihleiah Jesuh Khrih dungthluntu timi cu ziangkim Jesuh in a tuah vekin tuah asi timi pawl kan zir.

Bible siar ding le tuah dingmi pawl na rak tuah maw? Ziang na bang?

Bible na siarmi sung ihsin ziangmi na zir ngah?

Thusut duhmi na nei maw?

Thlacam

Reilote cawl in bulpak lole a bur in thlacam aw.

- Jesuh Khrih ah Pathian in a lo rundam ruangah Pathian zangfah thatnak hrangah lungawithu sim aw.
- Sual phuannak nei in thlacam aw, na pianthar pekte lai vek thotho in misual na si ih Pathian zangfahnak na tulzia sim aw
- Nangmah le na Bible zirpi, na group pawl thlarau mitvangin nan thinlung sangka ong aw dingin Pathian hnenah thlacam aw.

THUHMAIHRUAI

Eph. 2:19-22 ah Khrih dungthluntu nun cu innpi sakmi vekin tahthimnak thawn in sim asi.

Innsak tikah a hramtohnak lungpi vekin Jesuh Khrih cu Khrihfa nun hrampi ti ah in zirh.

Na nunnak thuhrampi na hngat awknak muril thleng ding, nan nunsan thlengmi dinhmun thu sim tikah ziangvek tihnak le thinlung ruahbuaimi na nei?

Na thlarau nun tharthawh in nunsan danglam hrang na nun thok tikah ziangmi na lungsungah a cam bik?

BIBLE THUANTHU

Luke 19:1-10, 1Jesuh cu Jerikho khua a thleng ih khawsungin a feh vivo. 2Cutawkah siahkhongtu upa pakhat, a lianzetmi, Zakia timi a um. 3Jesuh kha zo a si ti hmuh a duhzet nain amah cu mi niamte a si ih tlunah mi an tamzet ruangah a hmu thei hrimhrim lo. 4Curuangah mipi hmaiah a tlan ih cutawh lamih a feh vivotu Jesuh hmuh duh ah theipi kung parah a kai. 5Jesuh cutawh hmun a thlen tikah a tlunlam a hun zoh ih, “Zakia, zamrangin rung tum aw, tuihsun na inn ah ka tlung ding,” tiah a ti. 6Zakia cu zamrangin a tum ih Jesuh kha a inn ah lungawi zetina tlunter. 7Cumi a hmutu hmuahhmuah cu an phunzai hmurhmo ih, “Hi pa hi misual pa ih inn ah a

tlung ual!” tiah an ti. 8Zakia cu a ding ih Bawipa ih hnenah cun, “Bawipa, i ngaihnik! Ka neihmi ih hrek cu mifarah ka pe ding; cule ka bummi an um ahcun a let li in ka sam sal ding,” tiah a ti. 9Jesuh in a hnenah, “Tuih sun hi pa ih inn ah rundamnak a ra thleng zo, ziangah tile hi pakhal hi Abraham ih tesinfa a si ve. 10Milai Fapa cu a hlomi hawl ding le rundam dingah a ra,” tiah a ti.

Na pianthar hlanah na nunnak ih thupi bik, muril bik ziang asi?

Na sinak langtertu bik ziang asi?

Zakia cu siahkhongtu asi tikah tangka dik lo zetin a rak lak theu ih siahkhongtu tiah mi zokhalih theih mi a rak si. Asinan Jesuh thawn an ton awk tikah a nun lairil, a hrampi bik cu Jesuh ah a cang.

Ziangruangah Zakia in a neihmi hmuahhmuah peksuak tahratin Jesuh Khrih cu a nun muril ah a ret si pei?

BIBLE THUANTHU LAIHLANGNAK KA SINAK LAI MURIL

Zakia cu mi zakip huatmi a rak si. Zakia san lai ah siahkhongtu pawl an huat zetnak san pahnih a um:

1. Siah petu pawl hnen ihsin sumpai dik lo zetin an lak ih lennak ngah tu an rak si. Fafir ah ruah an si ih mi zakip huatmi an si.
2. Miphun phatsan in Rome cozah tlawntu tiah ruahmi, Jews pawl ih huat zetmi an rak si. Biaknak lam khalin zoh asile milem bia Rome cozah pawl tlawn tahratin anmai Jews sakhua biaknak tlansan phantsantu tiah ruah an rak si.

A tlunih thuanthu khaikhawm tikah Jesuh thawn an tawn awk hlanah Zakia in amah le mah ziangtin a ruat aw ding tiah na zum?

Zakia ih ei in hawnak nuntu khawsakdan zoh tikah a sinak sung muril, nunsan bik cu ziang a rak si pei?

Zakia cu huat zetmi, society mipi hnawnmi le ten zetmi dinhmun ihsin a thuanthu a thleng aw theh, Jesuh in a duhdawt ih a colhlan mi ah a cang tariai. Cutin Jesuh cu a nun lai muril ah a cang.

Cutivek in kannih tla Jesuh kan zum kan co hlan tikah kan nun lai muril a thleng aw ih Jesuh cu kan nunnak ih hrampi lai muril ah a cang asi. Khrihfa pawl hrangah kan thuanthu danglam tertu thilcang mi cu Kross parah Jesuh thihnak asi. Kan theihmi thu hmuahhmuah lakah Jesuh in kross parah kan soal leiba in peksak zo timi thuthangtha kan theihmi cu a thupibik kan nun thuanthu, kan nun lai muril thlengtu asi.

Jesuh Khrih in in duhdawt ih in cohlang asi timi thu theih hi ziangruangah kan hrangah a thupi tuk lawman?

ZIANGKIM KA TUAHMI LAIMURIL ASI

Jesuh cu ziangkim kan tuahnak ih laimuril asi a tul. Zakia ih nun zoh tikah Jesuh in amah zumtu pawl nunah hmun pakhat lawng luah ding a nei: nun laimuril asi. Zakia nunah Jesuh a neih hnu ah sumpai le milai a nun laimuril ah a rak retmi cu a thleng aw verver asi.

Zakia in a nun laimuril a thleng hnu ahcun sumpai le milai a pehtlaih nak hmuahhmuah a thleng theh asi. Khrihfa pakhat cun ziangkim kan pehtlaih mi ah Jesuh cu nun laimuril, ziangkim thuhram thawnak le donnak asi ringring dingmi asi.

Nun thleng awknak hrangah ziangmi a harsa bik pei?

Milai nun laimuril danglam, hmuhdan dang in nun thok tikah ziangvek zalennak luatnak a um?

Luke 18:18-23 siar hnu ah rei lo te ruat tha in milian pa hi Jesuh thlun thei lo dingin ziangin a kham, dunglam ah a tangter bik asi pei?

Jesuh in milai pai thilung cu a thei ih a sumpai pawl peksuak in a nun laimuril ah Jesuh siter ding cu a harsatzia a thei asi. Milaipa in a sumpai thu ah Jesuh cu thuneitu, muril siter ding a duh lo. Ziangah tile a nunnah a sumpai cu laimuril asi ih Jesuh cu a pahnihnak ah ret a duh asi.

TEL IN TUAH AW

Tirhthlah 7:54-60 le Luke 23:32-46 siar kawp aw. Jesuh thihnak le Steven thihnak an bang awknak pawl rin aw.

Tirhthlah 7:54-60,54Khonsil upa pawl in Stefen thusimmi an theih tikah an thin a heng tuk ih an hacang an rial hnawh. 55Sikhalsehla Stefen cu Thlarau Thianghlim in a khat ih vancung a hun zoh tikah Pathian sunlawinak le Pathian vorhlahmih a dingmi Jesuh kha a hun hmu. 56Cutikah, “Zohhnik uh! Van a ong aw ih Pathian vorhlahmah Milai Fapa a ding ka hmu!” tiah a ti.57Cutikah Khonsil upa pawl cu an hna an kut in an phit ih an aw neih patawp in an au ih Stefen cu an zon! 58Khawpi sung ihsin an dirhsuak ih lungto in an deeng. A deengtu pawl in an puan pawl cu Saul an timi tlangvalpa hnenah an retta. 59Lungto in an den rero laiah Stefen cun Bawipa a ko ih, “Bawipa Jesuh, ka thlarau run la hram aw!” tiah a au. 60A khuk a bilh ih, “Bawipa, an sualnak hi ciing ringring hram hlah aw!” tiah napi in a au. Cutiuh a au theh vete in a hnuk a cat.

Luke 23:32-46, 32Jesuh thawn hmun khatih thah dingah misual pahnih khal an hruai ve. 33“Luruh,” an timi hmun an thlen tikah cutawk hmunah cun Jesuh cu thinglamtah parah an thlai ih misual pahnih khal cu a vorhlahm ah pakhat, a kehlam ah pakhat an thlai ve. 34Jesuh in, “Ka pa, an sualnak run ngaithiam aw. Ziang kan tuah ti an thei lo,” tiah a ti. Cule amah a thattu

pawl cun camcawhfung zuukin a hnipuan cu an zem aw. 35Miseenpi pawl in an cuan ih an zoh ringring laiah Judah mi hotu pawl cun nautatnak thawn, “Midang hmuah a run ngah theu; Pathian ih hriilmi Messiah a si ngaingai ahcun amah le amah khal run aw seh,” tiah an tongsan.36Ralkap pawl khal in an hnihsan ve ih amah va fuuk tahratin a man olmi Sabitti thur an pek ih, 37“Judah Siangpahrang na si ahcun nangmah le nangmah run aw aw he!” tiah an ti.38A lu tlun ah, “Hi pa hi Judah Siangpahrang a si,” tiah nganmi ca an taar.

39Thinglamtah parih an khenmi misual pa pakhat cun nautatnak tong thawn, “Nangmah hi Messiah na si lo maw? Nangmah le nangmah run aw awla kannih tla hi in run ve aw he!” tiah a ti.40Asinain misual pakhat pa cun, “Pathian na tih lo maw si? Kan parih thuthennak an tuahmi hi a bangrep theh. 41Sikhalsehla kannih pahnih parih an tuahmi thuthennak hi cu a dikmi a si, zianghman tile kan thil tuah ruangih kan tuar tlakmi kan tuar a si. Asinain hi pa hi cu sualnak zianghman a tuah lo,” tiin a mawthluk. 42Cule Jesuh hnenah, “Maw Jesuh, Siangpahrang ih na rat tikah i hngilh hram hlah aw,” tiah a ti.43Jesuh in cu pa ih hnenah cun, “Thu ka lo kam a si: tuihsun ah keimah thawn Paradis ah na um ding,” tiah a ti.44Sun nazi hleihnih hrawngin cuih ram pumpuluk ah zanlam nazi pathum tiang thimkhawzing a tlung. 45Cule Biakinn ih zaarmi puanzaar cu a tlek ih then hnih ah a then aw. 46Jesuh cu napi in a au ih, “Ka pa, ka thlarau na kut sungah ka lo pe,” tiah a ti. Cutiuh a sim theh hnuah a thaw a cem.

Himi Bible siar pahnih sung ihsin Jesuh Khrih cu nun laimuril siter ding thu na theihnak ziangtin a danglam ter?

ZARHKHAT SUNG TUAH DINGMI

Bible siar le zir lawng si loin na group leader thawn thlacam nak in na hrangah ziangmi na tuah asile Jesuh Khrih in na nunah hmun kau sinsin, laimuril hmun a luah thei ding timi ruat in timtuah aw.

Pathian biaknak

- Bible siar ding timi kha siar theh aw.
- Pathian thawn can fianhrial nangmah te hmang aw. Pathian thawn pawlkomnak in na can hmang aw.
- Nitin te Pathian hnenah thlacamnak can khiahcia in ret in hmang aw. Jesuh Khrih cu na nun sungmuril, laimuril hmunluahtu siter dingin Pathian hnenah thlacam aw.
- “Ka Pa ka Pathian, Jesuh Khrih ruangah tui hlan ih ka tuah mi ruangah in duhdawtnak a nep cuang lo ih hmailam ah ka tuah dingmi ruangah in duhdawt hleice cuang lo, ka hrang na duhdawtnak cu a famkim in a hmun ringring asi ti ka thei” tiah hram thawk in nitin thlacam ringring aw.

Bulpak Bible zirnak

- Ca siar ding pawl siar theh aw “Khrih cu nun laimuril” asinak pawl siar aw.
- Jesuh Khrih cu ziangkim tuahnak ah nun laimuril asinak pawl siar aw.

Nunpi aw

-Na umnak kawhhran thawn thaten pehtlah aw. Na nunnah Jesuh Khrih cu lai muril asi vekin na neihmi tla na umnak kawhhran ah na pek ding zat pe aw.

-Phi. 1:21 “Kei ka hrang ahcun nun cu Khrih asi ih thih khal a hlawk sinsin” zohlo in ngah aw.

-Midang hrangah thiltha pakhatkhat tuzarh sungah tuah aw. Nangmah parah zianghman thiltha a tuahsal thei lo tu hnenah thiltha pakhatkhat tuah aw.


-Jesuh cu na nun laimuril ah ret aw. Tuzarh sungah na tikcu le na sumpai na hmannakah Jesuh Khrih cu na nun laimuril si dingin schedule tuah cia aw.

Bible siar in na lungsung tapbikmi ngan aw:

1. Mark 4:1-20
2. Mark 4:21-41
3. Mark 5:1-20
4. Mark 5:21-43
5. Mark 6:1-13
6. Mark 6:14-29
7. Mark 6:30-44

JESUH IN HMUN KAUSINSIN LUAH

Piantharnak



Nitin nunah
Khrih
Jesuh Khrih
nitin nun
sinsin asi.
nunah thil
um: Pathian

sinsin, mai milai mizia sualnak thei sinsin sual hua sinsin nun.

Curuangah Paul, mithianghlim in amai thu a sim tikah “Misual khawlbawl ka si” a ti theinak asi.
Misual pakhat in Jesuh Khrih a neih hnu ah a rei deuhdeuh tikah Khrih in a nun ah hmun kau

Khrihfa zumtu,
dungthluntu nunah
in hmun kausinsin,
laimuril ah a luah
Khrih dungthluntu
pahnih a cangmi a
thianhlimnak thei

sinsin hmun a luah sinsin. Cutin kross ih man khunzia a thei sinsin ih a nun pumhlum cu lungawinak, duhdawntak, zangfahnak, thatnak, dingfelnak, tvp in a khat sinsin asi. Cutin Khrih dungthluntu nun cu Jesuh Khrih ih hmuihmel bang sinsin in nitin thlengter, sersiamthar ringring asi. Cuticun zumtu nun ah nikhat hnu nikhat nun laimuril, nun ziangkim ah hrampi, khawruah, thinlung duhnak, tongkam, le cangvaihnak khalah a laimuril asi sinsin asi.

Kross parah Jesuh in na hrang ziang a lo tuahsak timi na theih fiangih na nunnak cu amah Jesuh hnennah na ap hnu ah na nun laimuril ah Jesuh in hmun kau sinsin a luah sinsin in na thei aw maw? Simfiang aw.

Na pianthar hlan hnak hmanin na sualnak ih sualzia le ten um zia pawl a tu ah fiang sinsin in na hmu maw? Ziangtin?

**BULPAK ZIR AWKNAK
KA SINAK IH LAIMURIL**

Zakia le Jesuh an ton awk tikah Jesuh in Zakia hnenah a neihmi pawl pesal dingin le mi farah bawm dingin a fial lo. Zakia in amai palung in a tuah mi asi. Zohhnik:

Luke 19:8, Zakia cu a ding ih Bawipa ih hnenah cun, “Bawipa, i ngaihnik! Ka neihmi ih hrek cu mifarah ka pe ding; cule ka bummi an um ahcun a let li in ka sam sal ding,” tiah a ti.

Zakia thinlung ziangin a tuvek in a thleng asi pei?

Jesuh in ziang a tuah ruangah Zakia ih nun muril a thleng aw theh asi pei?

Na nunnak ah hlawhtlinnak lole siattawnnak na thuanthu pakhatkhat na sinak muril vekin na sunglam a lo luahkhat tu a um maw? Zumtu Khrihfa pawl hrang ahcun Jesuh in kross parah a thihnak le a thohsalnak cu kan nun thuanthu danglam tertu, kan sinak langtertu asi. Amah in kross parah thihnak a tuar ih a thi ih a thohsalnak ruangah Khrih ih sinak kan tawmpi ve asi. A hlan ih kan sinak pawl cu malh theh asi zo ih dingfelnak, duhdawntak, le ngaidamnak in in thuantho asi.

Roman 3:26, 26Sikhalsehla atu-ah cun Amah ih dingnak kha langfiangter dingah minung ih sualnak cu a umsan meen nawn lo; cutiin a dingnak a langter ih Jesuh a zumtu hmuahhmuah cu Amah thawn rualremnak a coter hai.

Roman 5:6-11, 6Zianghman ti theimi kan neih lo laifangah Pathian ih khiah mi tikcu caanah Khrih cu misual pawl hrangah a thi. 7Miding hrang hmanah mi pakhat khat thih ding cu a olmi thil a si lo. Miṭha hrangah cun thih a ngamtu pakhat khat an rak um khal a si thei. 8Sikhalsehla Pathian in ziangtlukinso in duhdawt ti cu a langter: misual kan si hrih na cingin kan hrangah Khrih cu a thi! 9A thisen thawng in kannih cu Pathian thawn kan rem awk zo ruangah ziangtlukinso Pathian thinhengnak ihsin Amah in in runsuak sinsin ding! 10Hlanlaih cun

Pathian ih ral kan rak si, sikhalsehla atu cu a Fapa thihnak ruangah a rualpi ah in tuah zo. Pathian ih rualpi kan si zo ruangah Khrih ih nunnak in ziangtlukin so in runsuak sinsin ding. 11Hi lawng hi a si hrih lo; Pathian rualpi ah in cantertu kan Bawipa Jesuh Khrih ruangah Pathian ih thil tuahmi ahhin kan lung a awi ngaingai a si.

A thlunih Bible bungcang pahnih in Jesuh Khrih ah na sinak thu ziang a lailang?

A hnuailam thutlangpi pawl siar in thusuhnak pawl sang aw.

Case study #1. Mi pakhat, sakhua mi insang, milai felnak ngaisang zet, mi tha zet tiah a ruat aw tu pa in “keimah cu mi tha ka si” a ti.

Himi in a sinak a nunnak laimuril ah ziang a ret in a lang?

Hipa hrangah Jesuh Khrih cu a nunnak sinak ih laimuril siter dingin ziang a bang ding, a nun muril ah a ret mi thleng aw dingin ziangvek harsatnak a um ding?

Case study #2. Nauhak lai ihsin hremnak, ti duhdahnak, a pitlin tiang a tuartu pakhat in “Kei cu mi tha lo ka si” a ti.

Himi hrangah Jesuh Khrih cu a nunnak laimuril si ter dingin ziang a bang ding, thleng awknak nun nei dingin ziangvek harsatnak a um ding?

Case study #3. Nunau mipi sinak lam ah a tladau, hlothlau mi in “Khrihfa diktak ka si thei pei maw ka thei lo, ziangah tile kei cu ka nuncan ziaza ka hlo thlau” ati.

Himi hrangah Jesuh Khrih cu a nunnak sinak laimuril siter dingin ziang abang, danglamnak nun nei dingin ziangvek harsatnak a um pei?

Nangmai thuanthu zohsal hnik aw. Ziangvek in na nitin nunah Jesuh Khrih cu na nunnak sinak ih laimuril na si ter thei ding?

BULPAK ZIRNAK

ZIANGKIM KA TUAHNAK IH LAIMURIL

Zingthawh. Thaithawh. Rawl. Thianfainak. Harhdammak. Coffee. Hnipuan thleng. Traffic. Meeting. Ca zir ding. Email. Facebook. Suncaw. Dawrkai. Inn. Zanriah. Cazoh. Zirnak. Thuthang. Zan it. Tvp.

A tlunlam ih ngan mi pawl vek le a dangdang pawl thawn na nitin nunah tuah ding hlor in a khat ih nun cu na busy zet tla asi thei. Nun can hi a loam zuahzo. Na nitin nunah Jesuh hnakin thupitter mi thildang tampi na thinlung ruahnak sungah an zuam aw rero tla asi thei.

Ziangmi thil pawl in na thinlungah Jesuh hnakin thupi sawn hmunluah ding in an zuam aw rero?

Na nitin nunah Jesuh hnakin thildang pakhatkhat maw, a thupi sawn asi ti ziangtin sim theihnak a langmi a um?

Thufim 3:5-6, 5Bawipa cu na thinlung zate in rinsan aw. Nangmah ih ruahnak le theihnak kha rinsan aw hlah. 6Na tuah mi kipah Pathian cu thei ringring awla, Amah in lamzin dik a lo hmuh ding a si.

Ziangtik can khalah Amah ruah ringring thei ringring timi cu ziangsi na hrang ah um zia?

Tikcu malte la in na nun kapli in zoh in Jesuh cu na nunah thupibik, laimuril ah ret aw. A hnuailam thusuhnak pawl sang aw, ca in ngan aw.

Milai pehtlaihnak (relationship):

Midang thawn na pehtlaihnak ah Jesuh cu na nunah a thupibik, laimuril asinak langter ding in ziang na tuah?

Ziangzawnah Jesuh cu na nun laimuril, thupibik ah na ret lonak a lang?

Sumpai thu (Finances):

Na sumpai thu Jesuh cu na nunah a thupibik, laimuril asinak lang ding in ziang na tuah?

Ziangzawn ah Jesuh cu na sumpai thu ah a thupibik, na nun laimuril siter lo in na um theu?

Tikcu/Can hmandan (Time/Schedule):

Ziangtin Jesuh cu na can hmandah ah a thupibik, nun muril na si ter?

Ziangzawn ah Jesuh cu na nunah a thupibik dinhmun na pek lo theu?

Nulepa sinak:

Ziangtin nunnau mipa sinak ah Jesuh cu na nunah thupibik, laimuril na si ter?

Ziangzawn ah Jesuh cu na nunah thupibik dinhmun na ret lo?

**DUNGTHLUNTU LAMZIN
DISCIPLE YOURNEY**

SESSION 3

BAPTISM AH JESUH DUNGTHLUN IN

DISCIPLE YOURNEY-SESSION 3

BAPTISM AH JESUH DUNGTHLUN IN

Key: Baptism cu sunglam nun thleng awknak langhngan mipi hmai ah nemhngettu asi.

Himi zirnak ah Baptism thu Paul in a zirhmi (Roman 6:1-11) ah hngat aw in kan zoh ding. Jesuh thihnak tawmpi in a thawhsalnak nun tawmpitu zumtu nunthar thu zir asi ding.

ZOHSALNAK

A hmaisai zirnak ah Jesuh Khrih cu ziangkim, milai thuanthu, bulpak nunah siseh lai muril asinak kan zir zo. Jesuh cu zaahza Pathian, zaahza milai asinak thu pawl kan zir zo. Jesuh thihnak le thawhsalnak tawmpitu kan sinak, baptism thu kan zir hlanah a hnuailam thusuhnak pawl ruat lang hmaisai uhsi.

Bible siar ding le tuah dingmi pawl na rak tuah maw? Ziang na bang?

Bible na siarmi sung ihsin ziangmi na zir ngah?

Thusut duhmi na nei maw?

Thlacamnak in thok hmaisai uhsi.

Thlacam:

- Nitin te canpualtha neihmi parah Pathian hnenah lungawithu sim hmaisai aw
- Pathian hnenah baptism laknak in tangdor nun, thu awi nun ih umzia theihfengnak dil aw.
- Pathian hnenah thlacam in baptism rawngbawlnak in local kawhhran sungah Pathian hmin sunloih asinak hrang thlacam aw.

THUHMAIHRUAI

Milai nunah lungawi umza ni hleice, thilcangmi hleice pawl kan lam in kan aih theu.

Tahthimnakah thanksgiving day tivek pwl. Lungawini, can heice pawl cu a phunphun in lomh le aih asi theu. Cuvek in thlarau lam nunah baptism cu zumtu pahat cu hell ram tla ding ihsin vanram kai ding asinak Jesuh Khrih ah rundam zomi asinak mipi mithmuh ah lawmnak, langternak asi.

Zirnak kan feh vivo hlanah a hnuailam thusuhnak pawl ruat tlang hrih uhsi.

Na san sungah ziang holiday na duh bik, ziangruangah?

Kawhhran sungah baptism tuah tikah, baptism na lak tikah na thinlung ruahnak sungah ziang na ruat in na thinlung ah a tang bik?

Baptism lak tikah lang hngan in nemhngetnak men lawng si loin Pathian thupek thu awi nun, thulunnak langternak a si zia khal kan zoh vivo ding.

BIBLE THUANTHU

Baptism hi Jews pawlin an rak hman theu mi asi. (Mat. 3:13-17) ah Jesuh khal John tihnimtu hnenah baptism a laknak kan hmu thei. Curuangah baptism cu Thlungthar kawhhran sungah tuah ringringmi a thupi bik pakhat asi.

Roman 6:1-11, 1Asile ziangtinso kan ti ding? Pathian ih zaangfahnak karh sinsin seh tiah soal kan tuah vivo hrih ding maw? 2Tuah naisai hlah! Sualnak ah kan thi zo ih ziangtinso a sungah kan um thei nawn ding? 3Khrih Jesuh thawn kan pehzom awknak in a sungih hnimmi kan si tikah a thihnak sung khalah hnimmi kan si tihi nan hngilh maw si? 4Baptisma kan lak tikah amah thawn phummi kan si ih a thihnak ah khal kan tawm ve; cuvek thocho in Pa ih sunlawinak huham in Khrih kha thihnak ihsin a thawhter bangtuk in kannih khal a thar in kan nung ding.

5A thihnak ah khan amah thawn a thi tlang mi kan si ruangah thihnak ihsin thawhter a sinakah khan kannih khal kan tel ve ding. 6Kan nun hlun cu Khrih thawn thinglamtah parah khencih a si zo ti kan thei; cumi cu soal in a khatmi kan nunnak hlunih pum cu a siatral theh ding tinak a si. Cutiin sualnak ih sal kan si nawn lo. 7Ziangah tile mi pakhat cu a thih tikah sualnak in a parah thu a nei nawn lo. 8Khrih thawn kan thih tlang ruangah a nun khal amah thawn kan nung tlang ding tiah kan zum. 9Khrih cu thihnak ihsin thawhter a si zo ih a thi sal nawn lo ding, ti kan thei; thihnak cun a parah thu a nei nawn lo. 10Cule soal thu-ah cun kumkhua daih in a thi ih atu a nun hi cu Pathian ah a nung a si. 11Cuvek thiamthiam in nannih khal soal thu-ah cun mithi kan si tiin siseh, nunnak thu-ah cun Khrih Jesuh zaar in Pathian thawn pawlkom in kan nung tiin siseh, ruat aw uh.

Ziangmi bungcang na thinlung sung a lut bik, ziangruangah?

Himi Bible bungcang na siar tikah Baptism thu na theihnak ziangtin a fiangter?

Himi zirnak thu ruat khawm tikah tihnim, ti thlerh, kawhhran serh le sang timi pawl thei fiang dingin relkhawm a tha.

BIBLE THUANTHU LAILANG

BAPTISM CU RUNDAMNAK THLAM LANGTERTETU ASI.

Roman bung 6 sungah soal thu le rundamnak thu simfiangnak kan hmu. A hmaisai in Paul in rundamnak hrangah key asi mi Pathian zangfahnak cun soal ngaidamnak in pek (Rom 5:18-21) tiah kan hmu. Paul in a sim bet mi cu soal ngaidamnak hrang Pathian zangfahnak a co zotu cun sualnak in a nung sunzawm thei nawn lo thu in zirh.

Himi thu simfiangnak ah Jesuh Khrih ah rundamnak hmuithlam langtertu ah Baptism thu a sim. Roman 6:3-4, 3Khrih Jesuh thawn kan pehzom awknak in a sungih hnimmi kan si tikah a thihnak sung khalah hnimmi kan si tihi nan hngilh maw si? 4Baptisma kan lak tikah amah thawn

phummi kan si ih a thihnak ah khal kan țawm ve; cuvek thotho in Pa ih sunlawinak huham in Khrih kha thihnak ihsin a thawhter bangtuk in kannih khal a thar in kan nung ding.

Zumtu pakhat cu baptism pek asi tikah Jesuh Khrih cu thlan sungah phun asi vekin tisungah hnimphim asi. Jesuh Khrih cu thlan sungah phum in a um lanta lo vekin zumtu khal tisungah hnim lanta si loin Jesuh cu thlan sungah ihsin a thawhsal vekin zumtu khal tisungah ihsin a suaksal asi. Paul in cang 8 nakah, “Khrih thawn kan thih ahcun a thohslanak khalah kan tho ve ding tiah kan zum asi” a ti.

A tlunlam ah simfiang vekin baptism thu ihsin zumtu pakhat cu ziangtivekin rundam asi timi a fiangter asi.

Rundamnak cu ziangtivek in thihnak thawn tahthim theihnak a um?

Jesuh dungthluntu na sinak in ziangvek nunthar na tawntehmi a um?

Baptism cu rundammi, nunthar sinak, sunglam thleng awknak cu pawnlam ah langin nemhnget nak, kawhran sungah Pathian uknak hnuai ah nungin a thu thlun dingin tiamkamnak khal si.

BAPTISM CU RUNDAMMI SINAK MIPI HMAIAH PHUANSUAHNAK ASI.

Baptism cu a tlunlam ah sim zo mi lawng si loin leitlun damsung nun cu Jesuh thupek vekin ka nung ding tiah pumpek awknak, tiamkam awknak khal asi. Mipi hmaiah phuansuah awknak nei in baptisma laknak cu Jesuh a thohsal hnu ah thupek ropi thlun dingin tiamkam awknak khal asi.

Mathai 28:19-20, Curuangah feh uhla mipun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a

Himi Bible bungcangah ngan khummi Jesuh tongkam hi ruahnak pekmi men asilo, Jesuh dungthluntu zumtu hrangah a lotheihlo in tuah tengteng tulmi thupek (command) asi.

Baptism cu Jesuh thupek (command) asi ti tikah ziangtin nangin teh na sang let ve ding?

Baptism cu kawhhran hrangah thatnak tampi a um asi. Baptism peknak in kawhhran sungah zumtu thar, Jesuh dungthluntu thar phuansuahnak, laklutnak khal a langter asi. Baptism cu zumtu zapi ten kan hlawm awkmi asi ih kan zaten ruangpum pakhat, thlarau pakkhat baptism a co mi kan si theh asi. Paul in hitin a sim, I Kor. 12:13, 13Cubangtuk in kannih khal hi Judah mi le Zentail mi, miluat le sal tiin um hman nungla kan zate hin cuih ruangpum pakhat sungah cun Thlarau pakhat ih baptisma lami kan si ih kan zate hin cuih Thlarau pakhat cu intlaang dingah tuahmi kan si.

Baptism na lak theh in ziangvek si na hmailam nun kekar ding pawl?

Na umnak kawhhran sungah baptism thu thawn pehpar in ziang na tuah thei mi a um?

TUAH IN TELVE

Baptism hi local kawhhran sungah rawngbawlnak thupi zet mi asi. Zumtu thar pawlin Jesuh thawn bulpak pehzawm awknak, piantharnak an hmuhtawnmi pawl an sim, testimony an simmi pawl hi Thuthangtha simsuahnak tha zet asi.

Nan local church ah baptism service a um tikah Jesuh Khrih ah rundamnak a co hrih lo tu, zumlo tu rualpi na neihmi pawl rak sawm awla, baptism cotu pawl ih testimony rak ngai ter aw.

Nangmai nunah Jesuh na zumih baptism na lak nak ihsin na nun a thleng aw mi pawl zum lotu hrintharnak a co hrih lo tu hnenah sim aw.

Ziangruangah Jesuh thupek thlunin baptisma na lak (na lak hrih lo asile na lak ding thu) timi thu zumlotu hnenah sim aw.

Nan local church ah baptism service a um tikah zumlotu, piangthar hrihlo rak sim tengteng aw. Zosi na sawm dingmi hmin ngan cia aw.

Thlacam na dil duhmi:

...

 ...

ZARHKHAT SUNG TUAH DINGMI:**Pathian thangthat**

- Bible siar ding pawl Bible na siar phah ah Thiang Thlarau in a lo theihtermi, na zir tharmi pawl a hnuailam ah ngan khum aw la group tawn awknak ah sim dingin timtuah cia aw.
- Nitin thlacamnakin Pathian thawn bupak pawlkomnak nun nei in na tikcucan hmang ringring aw.

Bulpak zirnak

- Baptisma la hrih lo na sile baptism la dingin na thinlung timtuah in na local church pastor hnenah sim aw. Baptism la zo na sile baptism na lak tikah na tiamkam awk vekin Jesuh Khrih hrangah nitin a thupek thlun in dungthluntu tha nun nei in nung awla, midang kha Jesuh dungthluntu an si theinak hrang bawmtu tha si aw.
- Baptisma na lak tikah nangmai tawntehmi nun thleng awknak thu pawl na pehtlahmi insungsang, rualpi, hnatuanpi, group pawl hnenah sim awla an hmuhtawnmi pawl sut in an hnen ihsin zir ve aw.
- Zohlo in ngah, Roman 6:4,

NITIN BIBLE SIAR

A hnuailam Bible bungcang pawl nitin siar awla, na zir thar mi, Thiang Thlarau in a lo zirh thar mi pawl ngan khum awla na group sungah simsin dingin timtuh aw.

1. Mark 6: 45-56

2. Mark 7:1-13

3. Mark 7:14-37

4. Mark 8:1-13

5. Mark 8:14-26

6. Mark 8:27-38

7. Mark 9:1-13

JESUH BAPTISM LAKNAK

Jesuh Khrih cu zaahza Pathian zaahza milai asi tiah kan zir zo. Jesuh Khrih zaahza Pathian zaahza milai asinak ih kan hrang a thatnak cu milai nitin tawntehmi pawl amah in taksa in leitlun ah a rak tawn theh mi asi-cumi lakah pakhat cu baptisma hi asi.

Luke 3:21-22, 21Mi hmuahhmuah baptisma an lak theh hnuah Jesuh khal a lak ve. Thla a cam laifangah van a ong aw ih, 22Thlarau Thianghlim cu a tlunah thuro bangtuk in a rung fu. Cule vancung ihsin aw a thang ih, “Nangmah cu ka duhdawtmi ka Fapa na si. Na parah ka lung a awizet,” tiah a ti.

Himi Bible bungcang in ziangtin na thinlung khawruah a lo luahkhat bik ih ziangruangah?

Pa Pathian in Fapa hnneah a tongkam hin Jesuh in leitlun ah milai hnenah a rawngbawlnak a thoknak ding hrangah thazang petu asi ding. Cuvek thiamthiam in kannih khal leitlun kan rawngbawlnak hrangah thazang laknak kan nei ve asi. Roman 8:16-17, . 16Hitih kan au ahhin Pathian ih Thlarau in kan thlarau a pehzom ih Pathian ih fa kan sinak kha a fiangter. 17Fa kan si ruangah Pathian in a minung hrangih a retciam i thlawsuah a cotu ding kan si; cule Pathian in Khrih hrangih a retciam i khal Khrih thawn kan co tlang ding. Ziangah tile Khrih tuarnak a tuar vetu kan si ahcun a sunlawinak khal kan tawm ve ding a si.

Pa Pathian cu Fapa parah a lung a awi zet timi tongkam theih tikah ziangtluk hngam tlakza so asi. Kannih zumtu pawl khal Jesuh Khrih ah Pa Pathian cu kan parah a lung a awi zet asi, kan sualpalhnak in ngai dam theh zo ih in mawhsiat nawn lo asi. Baptism kan lak tikah Pa Pathian thawn pehzawm awknak, pawlkonnak thar kan nei ih a sunglawi tukmi dinhmun ah kan ding asi.

Bulpak in Pathian fate na sinak parah ziangtin na thinlungin na ruat?

Tuini ah Pathian duhdawtnak ziangtin na nunah na langter ding?

BULPAK ZIRNAK

THLUNGHLUN SAN LAI AH BAPTISM

Baptism hi Thlungthar san ihsin a thokmi siloin ThuThlung san lai khalah an rak hman theumi, tidai thawn kholh, thianfainak hi an rak hman theu mi asi. Curuangah Jesuh amah rori khal baptism a lannak asi (Mat. 3:13-17). Thlunghlun san lai ah tidai hi hremnak hman rua ah siseh runsuaknak hmanrua ah siseh Pathian in a rak hmanmi tla kan hmu thei asi. Noah san lai ah misual pawl hremnak ah Pathian in tidai a hmang ih zumtu pawl cu tidai hmangin hremnak lak ihsin runsuak an sinak thu khal kan hmu. Noah le insang cu tilik ihsin runsuak an si ih Israel pawl kha tipisen sung ihsin runsuak an si. Cuvek thiamthiam in baptism khal sual lak ihsin runsuaknak cu langhngan in langternak ah hmanmi asi.

Siar aw: Seem 7:11-8:14. Himi Bible bungchang sung ihsin ziangmi in na thinlung a lo la bik ih ziangruangah?

Siar aw: Suahhlannak 14:15-31, Himi Bible bungchang in Pathian hremnak le rundamnak thu ziangtin a langter?

Cun Thlunghlun san lai ah tidai hi thianfaiternak hrangah an rak hmang theu. Puithiam 14:8 ah siseh Puithiam 16 nakah siar awla tidai hi thianfai ternak ah an rak hmannaak thu pawl na hmu ding.

Puithiam 16:23-24, 23Cule Puanthlam sungah Aaron cu a lut pei ih Hmun Thianghlim Bik sung a luh hlanih a hrukmi puithiam thilthuam pawl cu a phuak pei ih cutawkah a ret pei. 24Hmun thianghlim ah ti a kholh-aw pei ih amah ih hnipuan a hruk pei. Cuih hnuah a va suak pei ih Israel miphun ih sualnak le amah ih sualnak pawl thlahnak dingah mei-ur thawinak a tuah pei.

Puithiam 16:20-28, siar awla himi Bible bungchang in Thlungthar ih baptism kan hmanmi ziangtin a khihmuh ngan aw?

Cun Ralbawi Naaman ih thu in tidai ah kholhfainak thu in zirh, 2 Siangpahrang 5 ah siar aw. Naaman cu Jordan tiva ah voi 7 hnim aw dingin Elisha in a fial vekin a tuah tikah a phaarnat ihsin a dam.

2 Siangpahrang 5:10, Elisha in a hnen-um pakhat a hei thlah ih Naaman hnenah cun, “Feh awla Jordan Tiva ah voi sarikh in ti va bual aw. Na titsa an cerh sal ding ih na dam ding,” tiah a va sim. A hramthok ahcun Namaan in a damnak ding hrangah Jordan tiva ah voi 7 hnim aw ding timi thu a theih tikah a thinheng zet lawk nan, Pathian kamsang thu lungin a tuah tikah damnak a ngah asi.

2 Siangpahrang 5:1-19 siar awla, Namaan thuanthu sung ihsin ziangmi in na thinlung a lo la bik, ziangtin?

Thulunnak hi baptism kan lak tikah ziangruangah a thupi tuk asi pei?

THLUNGTHAR AH BAPTISM PA 3

Thlungthar Bible sungah Baptism cu tuah dingin thupek (command) kan si. Curualrual in Bible sungah baptism zohthim ding ziang aum kan zoh hnik pei.

Tirh 2:41-42, 41Piter ih simmi cu mi tampi in an zum ih baptisma an lak; cuih ni ni khatah an pawl cu mi thawngthum tlukin an karh. 42An zatein tirhthlah pawl hnen ihsin an zir ih, tirawl ei tlaangnak le thlacam tlaangnak thawn pawlkomnak an nei ringring.

Baptisma lak tu zumtu pawl cu Jesuh Khrih ih ruangpum, Khrih ah pumkhat kan si zo ih zumtu pawl tawn khawmnak ah tihnak um lo, duhdawtnak in pawlkomnak, neihmi hlawm aw tawn in ti le rawl ei tlangnak, lungawi nuam le hahdam zetin pawlkomnak hmun asi.

Na umnakah Baptism la hrih lo pawl an lak ve thei nak dingah ziangtin na bawm thei ve ding?

Tirh 8:26-40, siar aw. Ethiopian pa ih baptism laknak thu asi. Himi bungcang sung ihsin ziangthu in na thinlung a lo lak bik ih ziangruangah?

Midang hnenah Baptism thu, a thupitzia le a umzia, pawl zirhsin dingin na ruat aw maw, ziangruangah?

Midang hnenah Jesuh thupek thlun in Baptism la dingin na forhfial thei pei maw?

Tirh 10:17-43 ah Kornelius Baptism laknak thu kan hmu thei. Bible na siar hnu ah himi bungcang sung ihsin Pathian na theihdan ziangtin a lo bawm?

Kornelius insang ah thilcang mi Thirh 10:44-48, 44Cutiih Piter a tong rero laiah a thusimmi a ngaitu hmuahhmuah parah Thlarau Thianghlim a rung thleng. 45Joppa ihsin Piter thawn a rami Jesuh zumtu Judah mi pawl cu Zentail mi hnen khalah Pathian in a laksawng Thlarau Thianghlim a burh ti kha an hmuh tikah an mang a bang ngaingai. 46Ziangah tile cute pawl cu tong phun dang in an tong ih Pathian ih maksak zia an thangthat kha an theih ruangah a si. Piter in, 47“Kanmah ih kan ngah zo vekin himi pawl khal in Thlarau Thianghlim an ngah ve a si. Curuangah tidai ih baptisma la ding kha zo in so a dawn thei ding?” tiah a ti. 48Curuangah Jesuh Khrih hmin in baptisma lak dingah thu a pek. Cule an hnenih caam hrih dingin Piter cu an sawm.

Himi Bible bungcang sungah in zirhmi cu Pathian rundamnak cu mi zapi hrangah asi. Rundamnak a co zo tu hmuahhmuah in Baptism laknak in Pathian uknak sungah Pathian insang sungtel sinak hram thohnak asi.

**DUNGTHLUNTU LAMZIN
DISCIPLE YOURNEY-**

SESSION 4

**JESUH THAWN CAAN
TIME WITH JESUS**

Bulpak in sungmuril thuk zetin Pathian thei dingin sersiammi na si.

ZOHSALNAK

JESUH KHRIH cu milai thuanthu ah a laimuril, thupibik asi tiah kan zir zo. Leitlun ah a nung dahtu milai hmuahhmuah lakah a thupi bik asi ti khal kan zir zo. Leitlun milai zapi hrangah rundamnak a tuahsuak zo thu khal kan zir zo. Cutin Khrih dungthluntu kan si tikah Jesuh Khrih cu kan ziangkim ah a thupibik, nun sungmuril siter ding thu khal kan zir.

Zarhkhat sung tuah ding timi ziang n arak tuah mi a um ih ziang na hmuhtawnmi in sim thei maw?

Bible na siar lai ah na zir thar mi, hlawm duh mi na nei maw?

Thu sut duhmi na nei maw?

THLACAM

REilo te cawl in thlacamnak can, bulpal lole a bur in hmang:

- Tuzarh sung Pathian na nunah a um ruangah lungawithu sim
- HNaihnoctu lak ihsin la fianhrial aw thei dingin dil aw la Pathian thu thinlung tak ten na zir ngah thei nak ding hrangah thlacam aw
- Bible na zir rualrual in Pathian in na hnenah thu lo sim ding, lo be dingin dil aw

THUHMAIHRUAI

Tuisan cu theihnak ah zuam awknak, leitlun hminthang, mi larlar, thu larlar theih duh zet nak san ah kan nung. Hminthang le thu maksak zetzet theih kan duhnak cu kanmah hnakin a thupi sawn, ropi sawnmi theih duhnak ihsin a suak mi asi. Kan zaten Pathian cu bulpak in thuk zet le sungmuril in thei dingin sersiammi kan si.

Lungawiumza asimi cu a cang thei si: Bulpak in Pathian thawn nan thei aw thei asi.

Leitlun mi hminthang le mi lar zetzet pawl thawn rualpi tha si in nan thei aw lo men thei nan ziangzongza sersiamtu, ziang hmuahhmuah lei le van thu neihnak neitu Jesuh thawn bulpak in nan thei aw thei asi.

Pathian in nangmah bulpak in lo theih a duh. Amah na theih ding a duh, a aw na theih ding a duh, a dung na thlun ding a duh asi.

Bulpak in thuk zet le sungmuril zetin Pathian thei dingin sersiammi na si, timi na theih tikah ziangtin na ruat?

BIBLE THUANTHU

Mari le Martha in jesuh cu bulpak in an thei (John 11:5). A hnuailam thuanthu tawiten zoh hnik uhsi:

Luke 10:38-42, 38Jesuh le a dungthluntu pawl cu khual an tlawng vivo ih khua pakhat an thleng. Martha timi nu in Jesuh cu a inn ah a tlunter. 39Martha ih naunu cu Mari a si. Mari cu Jesuh ih kehram ah a to ih a thusimmi kha a ngai. 40Martha cu hnañuan tampi nei in a buai ih a thin a ðeu ruangah Jesuh hnenah, “Bawipa, ka naunu in hnañuan hmuahhmuah i tun ðeh hi na poisa lo maw si? Sim aw, i ra bawm seh!” tiah a ti.41Cutikah Jesuh in, “Martha, Martha! Nang cu thil tampi parah helhkam le awloksong in na um; 42a ðul ngaingaimi cu pakhat lawng a si. Cumi cu Mari in a hriil ngah ih zohman in an long nawn lo pei,” tiah a ti.

A tlunih thuanthu sung ihsin ziangmi thu in na thinlung a lo lak bik, ziangruangah?

Mari le Martha thawn an biak awknak, pehtlaih awkdan thuanthu ihsin Jesuh thu ziang kan zir thei?

Ziang hrangah a sunglawi man nei bik in an can an hman thei ti ah Jesuh in a sim?

THUANTHU SIMFIANGNAK:

THLACAM IN PATHIAN BE AW.

Khrih dungthluntu dinhmun in Amah thawn nitin can hman dingin duhril thei na si. Leitlun buainak, hnatan le duhril ding tampi lakah Mari le Martha vekin na hrangah a sunglawi bik le man nei bik in na can hman thei dingin duh hril ding na nei asi.

Ziangtin Pathian ka be ding? tiah thu na sut thei men. Mari in ziang a tuah? Jesuh kehram ah a to ih a thusimmi a ngai. Tikcu hman ten Jesuh kehram ah mahte can fianhrial la in to in Jesuh in a lo biak mi aw na ngai thei asi. Cutin bulpak in thuk zet le sungmuril zetin nan pehtlaih aw in nan pawlkom aw thei ding asi.

Nitin Jesuh thawn can hman thei lo dingin a lo kham thei tu ziang pawl an si?

Thlacam timi cu kan duhmi Pathian tuahter dingin kan simmi asilo; Pathian duhmi thei dingin amai aw kan ngai sawn asi. Amah thawn bulpak pawlkom awknak, pehtlaihna kan neihnak can asi sawn. Thlacam timi cu Pathian thawn pawlkom awknak, Pathian hnenah kan duhmi le theihmi kan simih Pathian in a duhmi le kan tulmi in simnak can asi. Thla kan cam timi cu kan duhmi ngahnak hrangah asilo Amah Pathian thawn kan neihnam awk sinsin nak sawn asi. Cutin thla kan cam tam sinsin tikah Amah thawn tikcu tam sinsin kan hman tlang tinak asi ih Amah thawn pawlkom awknak thuk sinsin in kan neih nak asi fawn.

Thlacam kan ti tikah na thinlung sungah ziang a lang tambik theu?

Thlacamnak thu ziang na sut duhmi a um?

PATHIAN THU SUNGIN PATHIAN AW THEI

Pathian thawn can tam sinsin kan hman tikah Pathian thawn kan nai aw sinsin ih kan nunnak hrangah Pathian lamhmuhnak fiang sinsin in kan thei asi. Acuih ruangah Pathian thu, Bible thiag siar tam hi a thupi tuk asi.... Ziangah tile Pathian in a thu, a tongkam, Bible thiag sung ihsin in bia asi.

Bible na siar tikah lole Bible zirhnak na ngai tikah, Pathian aw na thei asi. Bible, Pathian tongkam cu ziangtik khalah a thleng aw dah lo mi asi. Kum thawng siar tel rei ah ngan zo mi asinan Bible cu tuini tiang thar ringring in hmual nei zetin a nungmi thunung asi ringring. Khatlam zawngin kan sim asile Bible cu tuini na hrangah Pathian aw, Pathian tongkam asi.

Bible thu ziang na zir dah ih ziang an lo zir dah?

Pathian tongkam thu ziang theih bet duhmi na nei?

Bible Thiang sungah fiangfai zetin nitin nuntu khawsak dan in zirh. Thungai tlak in a zir le hawltu hrang ahcun thieh awl te asi ih nitin nunpi dingmi nunthuken pawl in zirh asi. Curuanghai Bible thuthuk na theih fiangnak ding hrangah a thupi bik hmanrua cu commentary le bible dictionary pawl an si lo, tangdornak lungput asi. Mari cu Jesuh kehram ah a to ih a aw a ngai vekin tangdor ten Jesuh kehram ah to in Bible na siar ih na zir tikah Thiang Thlarau in theihfengnak a lo pek ding asi.

Cutin Bible bungcang pawl na siar na zir rualrual in Pathian aw na thei dingih na nunpi tikah Pathian thawn nan nai aw sinsin ding asi. Cutin nauhak te cun apa thawn an um tlang tam tikah a pai aw cu a thleidang thiam vivo vekin Bible ca na siar sinsin tikah na Pa Pathian ih aw na thei thiam in na thleidang thiam vivo ding.

Bible na zir, na siar rualrual in ziangvek tawnteh mi neih ding na ruat?

TUAHDING

Himi zirnak hi mibur in thlacamnak in tawpter hrih uhsi. Mibur 6 hnakh tam nan sile a bur fate deuh in nan then asile a tha sawn ding.

Thangthatnak: Tuzarh sungah Pathian in na hrangah a tuahmi ruanghai lungawithu sim aw. Amah theih sinsin, pawlkom awknak thuk sinsin neih na duhnak thu sim aw.

Sir awknak: Pathian amah thei thei lo dingih a lo khamtu na mzia tha lo pawl lo theihter dingih Pathian hnenah dil aw. Thil na ti sual mi pawl phuang aw in Pathian hnenah ngaidam dil aw.

Dil: Hmaizarh sung na tulmi Pathian in a lo pek ih amah thawn nan nai awk sinsin nak hrangah thla cam aw. Na group sung midang hrangah thla cam aw.

Nun Ap: Na nun pum Pathian hnen apnak in himi zirnak tawpter aw. A ra dingmi zarh sungah Pathian hrang ah na nun ap aw, amah thei sinsin, ahmanmi si sinsin dingih thlacam aw.

Thlacam na dil duhmi ngan aw:

.....

ZARHKHAT SUNG TUAH DING

Group Bible study hlei ah na team leader thawn rel tlang in zarhkhat sungah ziang na tuah asile na hrangah na thango bik ding timi ruat khawm in timtuahnak nei aw.

PATHIAN BIAKNAK

-Bible siar ding pawl kha siar theh tengteng aw.

-Pathian thawn bulpak can fianhrial in can hmang tengteng aw.

-Bulpak nitin thlacam nun nei aw, thlacamnak ding hmun le can khiah cia in neih thei tum aw.

BULPAK BIBLE STUDY

-Bible siar ding pawl siar awla, thusuhnak pawl sang in bulpal Thiang Thlarau pawlkomnak in na hmuhsuahmi pawl ngan khum aw.

-Thlacam dan pawl ngan khum cia mi zir in thlacam aw.

NUNPI DING

-Local church ah khawm aw awla, Pastor in Bible zirh mi le thusimmi pawl note ngan aw la hmnsin aw.

-Bulpak in pehtlaih mi insang rualpitha pawl thawn thlacam tlang Bible siar tlang dingin na timtuah in can hmang aw.

-Bible cang zohlo siar ngah ding: John 14:1, “keimah cu thukhal tha ka si. Ka tuu pawl ka thei ih annih in in thei.”

-Pathian thu na siar, thla na cam, Bible na zir mi ihsin na tawntehmi pawl ca in ngan, hla ah phuah, lole hmnsin dan tuah in hmnsinnak tuah aw.

Bible siar phah in na lungsung tap bikmi ngan aw:

1. Mark 9:14-32
2. Mark 9:33-50
3. Mark 10:1-16
4. Mark 10:17-31
5. Mark 10:32-52
6. Mark 11:1-19
7. Mark 11:20-33

CAAN FIANHRIAL

Mi pakhatkhat theihfiang na duh asile amah thawn caan na hman tam a tul. Cuvek in Pathian theih sinsin na duh asile Pathian thawn caan tampi na hman sinsin a tul. Curuangah ziangtikah khui tawh hmunah Pathian thawn can ka hmang ding timi fiangten tumtah nak ca sungah ngan cia in khiahcia mi can le hmun nei aw:

Nitin Bawipa thawn can fianhrial ka hmnnak ding hmun le can:

Ziangtikah:

Khuitawh hmunah:

Na ruahmi pawl ngan khum aw:

..

BULPAK BIBLE ZIRNAK
ZIANGTIN BIBLE ZIR DING

Khrih dungthluntu pawl tuah tengteng dingmi cu Bible siar hi asi. Bible cu ngantu Pathian mi hman 40 lenglo in kum 1500 sungah an ngan khum theh mi asi. Asinan cutluk rei, ngantu cuzat in an ngan suahmi asinan a sungthu muril pawl cu khaikhawm tikah a bangrep, rem aw theh mi asi. Curuangah Bible cu ngungaih zetin kan zir tul mi asi.

Ziangtin Bible zir ka thok ding tiah na ruah har tla asi thei.

A hnuailam Bible bungcang pawl hi siar in na hmuhsuahmi le ruahnak pawl ngan aw.

Sam 119:9-16, 9Ziangtin so mino in ziaza thiang a neih thei ding? Na thupekmi thlun lawngin a nei thei ding. 10Ka thinlung zatein nangmah lo rian dingah ka pe-aw, Na thukham pialsan lo dingah i kilkhawi aw. 11Ka thinlung sungah na daan cu ka ret zo, Na parih ka soal lonak dingah. 12Maw Bawipa, nangmah ka lo thangthat; Na daan pawl i zirh hram aw. 13Na thukham in pekmi pawl cu ring zetin ka saal ringring ding. 14Sumsaw tampi neih hnakin Na thupekmi thlun ah ka lung a nuam sawn. 15Na nunsimnak cu ka zir ding ih, Na thuzirhmi pawl cu ka ruat tha ding. 16Na daan pekmi ah lungawinak ka nei ih, Na thupekmi pawl cu ka hngilh lo ding.

I John 2:3-6. 3Pathian thupek kan thlun ahcun amah a theitu kan si ti a fiang a si. 4Mi pakhat khat in Pathian ka thei tiah a ti nain a thupek a thlun lo ahcun thuphanper a si ih a sungah thutak a um lo. 5Sikhalsehla Pathian thu a thluntu cu a sungah Pathian a duhdawtnak famkimin a um tinak a si. Pathian thawn pehzomnak kan nei ti kan theih fiangnak ding cu hiti in a si: 6Zokhal Pathian thawn pehzomnak ka nei a titu cun Jesuh Khrih bangin a nung ding.

Bible thu theih a harnak cu bukhat le bukhat a danglam nak pawl theih a har ih thu hla theih awk ter tam men si loin milai nun thleng awknak hrangah Pathian tongkam asi tikah siar men le thluak in theihnak men men in Bible thei taktak tu si a theih lo.

Bible thutak cu nunthleng awknak Pathian hmanrua asi vekin mai nun ih tawnteh taktak lomi theih nak cu a famkim mi asilo ih mah rori in nunpi lawngah a thuthuk theihtheih asi. Curuangah Bible thutak cu nunpinak in na theih ngah asile Jesuh Khrih thawn thei aw sinsin in dungthluntu tha na si sinsin ding. Bible in hitin a sim:

Hebru 4:12, Pathian ih thu cu a nungih a cak fawn. Kap hnih hriam ralnam hnakin a hriam sawn. Nunnak le thlarau an ton awknak le hlikhlok le thlik an peh awknak tiang a sunklang thei a si. Milai thinlung ih duhnak le ruahnak tla a thei thluh a si

2 Tim 3:16-17, Ca Thianghlim hmuahhmuah hi Pathian ih thawkhummi a si * ih thutak zirhnak, zirhsual simhrinnak, a sualmi remsaalnak ah le dingteih nitin nunnak ih zirh awknak ah a tha. 17Cutiih Pathian hna a tuantu cu mi tlamtling a si ding ih thil tha phunzakip tuah dingah thuam famkim neimi a si ding.

Bible cu leitlun cabu dang vekin milai ruahnak le hmuhtawn mi nganmi asilo; Pathian mi pawl in Thang Thlarau thawkkhumnak in ngan mi asi.

2 Peter 1:20-21, 20Amah cu leilung seem hlanah Pathian ih hriil ciami a si zo ih atu nanmah ih hrangah neta bik caanah hin Pathian in a langtermi a si. 21Thihnak ihsin a thawhtertu le sunlawinak a petu Pathian kha Amah thawngin nan zum. Cuti cun nan zumnak le nan ruahsannak cu Pathian parih bunmi an si.

Bible cu cabu dang hnakin a danglamnak nangmai tongkam in ngan hnik aw?

Bible cu milai ihsin a suakmi siloin Pathian tongkam, Pathian hnen ihsin a ra mi asi. Curuangah Bible thu thei fiang dingin tangdornak le theih duhnak taktak ruahsannak thawn thutak hawl ding asi. Bible na zir, na siar phah in a hnuai thusutnak pawl ruat phah in zir aw.

- **Ziang thutak le thuken pawl himi Bible bungcang in a zirh?**
- **Ziang thupek (command) le thukam (promises) himi bungcang sungah a um?**
- **Tuini ah siseh a ra lai dingmi canah ka hrang ziang in zirh ih ziang ka zir ngah?**

Bible na siar zir tikah Jesuh tongkam hi cing ringring aw.

John 8:31-32, 31Curuangah Jesuh in amah a zumtu pawl hnenah, “Ka thu zirhmi nan thlun ahcun keimah ih dungthluntu ngaingai nan si ding; 32thutak cu nan thei dingih cuih thutak cun a lo luatter ding,” tiah a ti.

A tu ih na zir ngahmi in tui hnu ah Bible na zir, na siar tikah tui hlan vek si loin ziangtin danglamnak thawn na zir in na siar ding?

ZIANGTIN THLA CAM DING

Thlacam cu Jesuh dungthluntu pawl hrangah catbanglo in Jesuh thawn pehzawm pawlkom awknak, Pathian hnenah duhmi sim theih nak le Pathian aw theihnak asi. Thlacam cu bulpak Pathian thawn pehzawm pawlkom awknak hrampi asi.

Asile ziangtin thla kan cam ding, khuitin kan thok dingih ziangtin kan tawpter ding?

Jesuh in thlacam in zirhmi sung ihsin thlacam dan tlangpi zir ding kan nei asi.

Mathai 6:9-13, 9Curuangah hi bangtuk in thla nan cam pei: ‘Vancung ih a ummi kan Pa, na hmin thianghlim cu upat si ko seh; 10Na Uknak thleng hram seh; Vancung i na duhnak tuah a si bangin leitlun khalah tuah si ve seh. 11Nitin kan tulmi rawl in pe aw. 12Mi in kan parah sualnak an tuah ih kan ngaidam bangtuk in, Kanmah ih sualnak khal in ngaidam ve aw. 13A harmi hniksagnak tuarter loin, siatnak ihsin in hum hram aw.’

Jesuh in thlacamnak tlangpi in zirhmi lak ihsin ziangmi na hrangah alang hngan in a sunglawi hleice?

Tuihlan na thlacamnak ah na tawnteh mi pawl ziangtin na sim thei?

Jesuh in thlacam in zirhmi sung ihsin thu thlangpi pawl la then in thlacamnak hrangah kan hman asile: “Pray” mirang tong ih ngan mi thlacam hi ziang asi san neihter hnik uhsi. P-stand for praise: Pahtian thangthat nak, “Van cungih a ummi ka pa, na hmin sunglawi seh” (V. 9). Pathian cu zo asi, asinak ruangah thangthat nak in thok ringring aw.

R stands for repent: Pathian duhnak hnakin nangmai duhnak na thupitter mi pawl tla ruatsal in soal sir nak nei aw. “Na uk nak thleng hram seh. Vansungah na duhnak a kim bang in leitlun khalah kim ve seh,” (v.10) tiah in zirh vekin Pathian duhnak sawn kha na nunah thupit ter ringring dingin Pathian hnenah thla cam aw.

A Stands for ask: Jesuh in nitin tulmi hrang dildan in zirh, “in pe aw, in ngaidam aw, in run aw” (v.11-13). Thlacam tikah Pathian in na tulmi lo pe dingin dil aw.

Y stands for yield: Thlacam tikah thlacamtu ih duhnak famkim ding kha a thupi sawn si loin Pathian duhnak sawn a famkim ding, Pathian hmin sunlawinak sawn kha a thupi asi zia lang ter ding asi. “Uknak le huham le sunlawinak cu a kumkhua in nangai ta asi” (v.13) ah asim vekin ziangkim thlacamnak in tawpnaq cu Pathian duhnak, Pathian uknak, Pathian tumtah, Pathian hmin sunlawinak, Pathian huham cahnak, ziangkim Pathian sawnah a tawp dingmi asi.

Thlacam tikah Pathian hnenah tulmi duhmi simnak atel rualrual in Pathian aw ngai ding khal a tel tengteng a tul asi. Milai ruahnak, duhnak, tihphannak le duhnak pawl kan sim rualrual in amah in thupi ah in retsak mi in sim duhmi ngai a thupi sawn ringring asi. Pathian in kan thinlung sungah in sim duhmi fiang ten kan theih thei nak ding hrangah hnaihnoctu pawl um lo dingin fianhrial zetin Pathian aw kan ngai a thupi asi.

Pahtian aw na ngai na thei asi ti fiang ten na theih awknak na sim ngam mi a um maw?

Can lak in tlunlam ah thlacam dan ngan mi vekin thlacam aw la na nunah ziangtin na tawntehmi ngan aw. Ziang a bang?

**DUNGTHLUNTU LAMZIN
DISCIPLE YOURNEY**

SESSION 5

**THLAWSUAHMI MIBUR
THE BLESSING OF COMMUNITY**

Jesuh dungthlun cu bulpak thu asi thei nan ziangtik hmanah a pak ih nun asi dah lo.

ZOHFALNAK

A hmais a Pathian in amah thawn bulpak in thukzet le nel zetin thei aw dingin sersiammi kan si tiah kan zir zo. Cucu kan hrangah thlawsuah sangtuk kan canpualtha asi vekin lungawi sopar ten kan nunpi kan cen dingmi asi. Jesuh dungthluntu dinhmun in Pathian thawn cat bang loin pehtlaih awk ding cu canpual kan neih mi khal asi ih kan tuanvo khal asi, cucu cat bang loin thlacamnak le Thutak sungah kan nunnak in tuah ding mi asi.

Tuzarh Bible zirnak sung ihsin khuimi bik na nun a lo tham bik? Ziang a bang?

Bible na siarnak ihsin ziang na zir ngah ih ziang na tawnteh mi a um?

Ziang thu sut duhmi na nei?

Thlacam

Rei lo te cawl in bulpak lole a bur in thlacamnak can

- Krih ah zumtu mibur lakah na tel ve ruangah Pathian hnenah lungawithu sim aw.
- Na nun in na tawnteh mi kawhhran sung na umnak, kawhhran member pawl thawn nan pehtlaihna pawl Pathian hnenah sim aw, lungawithu sim aw.
- Khrih zumtu mibur lakah ziangvek dinhmun in zovek thawn nan pehtlaih ding ih na dinhmun cekci a lo retnak vekin nundan thiam dingin vanlam fimnak dil aw.

THUHMAIHRUAI

Pathian in milai cu mahte a falin nung dingah sersiammi kan silo, pawlkom awknak nei in nung dingah sersiammi kan si sawn.

Tikcu rei zet mahte lawng, fal zetin na um can ah ziangtin na thinlung in na ruat? Na sungmuril ah na dinhmun le tuar mi pawl zohman in an lo theihpi lo tikah ziangthu na ruat theu?

Jesuh Khrih dungthluntu nun cu mahte a fal in nun asi ti sim tikah ziangtin nangmai nun thawn na khaikhin tikah ziang na ruat?

BIBLE THUANTHU

Leitlun milai thuanthu ah thil danglam zetzet a can can a um theu. Cumi lakah kawhhran cu dinthawk asi tikah mangbangza leitlunah Pathian in a tuahmi a um.

Tirhthlah 1:8, Sikhalsehla nan hnenih Thlarau Thianghlim a rung thlen tikah cahnak huham thawn nan khat ding ih Jerusalem le Judea ram le Samaria ram hmuahhmuah le leilung tlun a deng tiang keimah ih theihpitu nan si ding,” tiah a ti.

Tikcu ziangmawzat hnu ah Jesuh in a rak simcia mi cu a thleng. Nikhat ni ah mi 3000 in Jesuh dungthlun dingin thleng awknak an co. Milai nun thleng awknak maksak a thleng.

Tirhthlah 2:42-47, 42An zatein tirhthlah pawl hnen ihsin an zir ih, tirawl ei tlaangnak le thlacam tlaangnak thawn pawlkomnak an nei ringring.⁴³Tirhthlah pawl in khuaruahharza le hmuhsaknak mak zetzet thil tampi an tuah ruangah mi hmuahhmuah ih thinlung sungah tihnak le hmaizahnak

a khat. 44Zumtu pawl hmuahhmuah cu an pawlkom aw ih thurual zetin an thil neihmi tla an tawm aw. 45An thilri neihmi le an hlawnthil pawl tla an zuar ih an ngahmi tangka cu an tūlnak vekin an zem aw. 46Ni khat hnu ni khat Biakinn sungah an tongkhawm aw; an inn ah rawl an tawm aw ih tangdornak le lungawi thanuam in an ei tlang. 47Pathian an thangthat ih mi hmuahhmuah hnenin mithmai tha an ngah. Cule nitinte in Bawipa in an pawlah rundamnak ngahtu a bet vivo.

Himi bungcang sung ihsin ziangmi in na thinlung a lo lak bik?

Kawhhran dindhawkw pekte ah zumtu pawl ziangtin an pehtlaih awk ih ziang an tuah tlang timi in na lung a lut bik? Ziangruangah?

THUANTHU LAILANG

KAWHHRAN TIMI CU ZIANG ASI?

Tuisan ah “kawhhran” kan ti tikah pawlkom, biak innpi, tvp a phunphun, biaknak lam cangvaihnak mibur pawlkomnak pawl thinlung ah a lang zet ti cu a fiang.

Kawhhran ti tikah na thinlung mitthlam ah ziang a lang?

Kawhhran na tel nak umnak ih na hmuhtawmi le kawhhran dinsuah pek ih an umtudan pawl na zoh tikah ziangsi danglamnak?

Kawhhran ti tikah biak innpi asilo, mit in hmuh theih tham theih thilri pawl, pawlkom kha asim duhmi asilo ih kawhhran timi cu “Jesuh ih zumtu dungthluntu mibur kom” asi.

A tlunah kawhhran cu ziang asi ti mi simfiangnak hi ziangtin na ruat? Na ruahdan hmandan le tawntehmi thawn a kaih aw maw?

Community ziangvek khal cangvaihnak, tuahmi pakhatkhat ruangah an tawng khawm aw theu. Tirhthlah bung 2 sungah a simmi zumtu community pawl khal tumtah le tuahmi pakhatkhat nei in an tawng khawm aw theu. Zumtu pawl an tong khawm aw theu ih rawl ei tlang, thutha hlawn aw tlang, thazang pe aw tawn in tulsam mi bawm aw tawn in an tikcu can an hmang tlang theu. Cutin Jesuh Khrih ih dudawtnak cu leitlun ah theihter in an mibur nun in an langter.

KAWHHRAN IH TUMTAHMI ZIANG ASI?

Kawhhran ih tumtah pahnih a um:

1. Khrih dungthluntu pawl community pakhat sungah khat le khat tundin awknak, thazang pek awknak, sawmdawl awknak, Pathian duhmi hawlin Pathian ren tlangnak

2. Pathian uknak palai hnatuan tuan in leitlun ah a uknak karhzai ter ding.

Kawhhran sung na tel tikah ziangsi na ruahsan mi?

Tirhthlah bung 2 nak ah kawhhran zumtu pawl umtudan a simmi in a tlunih kawhhran tumtah pahnih a huap theh. Tirhthlah 2:45, An thilri neihmi le an hlawnthil pawl tla an zuar ih an ngahmi tangka cu an tlnak vekin an zem aw.

Duhdawtnak ruangah a nei deuh in an neihmi thilri pawl an zuar ih farah harsa anmah hnakin a tlasamtu pawl an bawm. Mai bulpak zawnruahnak um loin duhdawtnak in an rian aw tawn asi. Jesuh Khrih lawngah thleng awknak danglamnak taktak a um ti an nun ah a fiang. Cutin, Tirh 2:47, Pathian an thangthat ih mi hmuahhmuah hnenin mithmai tha an ngah. Cule nitinte in Bawipa in an pawlah rundamnak ngahtu a bet vivo.

Midang na bawm tikah ziangtin ziangruangah na thinlung sungah ziangvek ruahnak a suak?

Kawhhran zumtu mibur lakah zumtu community ah na um ruangah ziangvek bawmbawinak, thazang peknak na ngah dah mi a um?

Jesuh dungthluntu na si vekin midang ih bawmtul dinhmunah na din can a um ding. Cuvek thocho in na kiangkap ah nangmah in na bawm tulmi an um can a um ding. Cuvek can ah nangkhal midang hnen ihsin bawmnak thazang peknak na co hlan vekin midang in na hnen ihsin thazang peknak, bawmnak an co hlan can a um ve ding asi. Cucu khat le khat kar lakah Pathian duhdawtnak langternak cantha asi.

TELIN TUAH VE

Khrih ih dungthluntu pawl kawhhran ah kan umnak cu khat le khat bawmbawi aw tawn dingin asi. Khrihfa pawl hrangah kawhhran cu humhim awknak, thazang pek awknak, tundin awknak hmun asi, ziangkim tuahnak ah mai bulhrang hlawknak mai tanghai nak si loin duhdawtnak in rian awk tawnnak hmun asi.

John 13:34-35, Cule nan hnenah thukham thar ka lo pek: Pakhat le pakhat duhdaw aw uh!

Keimah ih ka lo duhdawt vekin pakhat le pakhat nan duhdaw aw ve pei.35Pakhat le pakhat tlunah duhdawtnak nan neih ahcun zokhal in keimah ih dungthluntu nan si kha an lo thei ding a si,” tiah a ti.

A hmaisa bik ah zumtu community sungah bawmbawi awknak, thazang pek awknak a hram thok thei dingin lailan ten zalen zetin pehtlaih awknak thu hla theih awknak a um a tul asi. Na thuhla na thup ringring asi ahcun na tulmi bawmnak na ngah dah lo ding. Cuvek thocho in zozokhalin an thinlung sangka ong aw in khat le khat pawhtlang zetin pehtlaih awknak thu hla theih awknak a um lo asile a tulmi bawm awknak thazang pek awknak tuah famkim asi thei dah lo ding.

Asile a hnuailam vekin abur in thu ruat khawm, rel khawm uhsi. Tumtah mi cu mibur lakah mai sinak tulmi ciar zalen zetin simrel ngam duh nak neih dingin asi. Cui hlei ah thlacam in kiangkap zumtu unau pawl tulsammi thei thei dingin le bawm theitu si dingin Pathian hnenah dil aw.

Ziangvek bawmnak na tulmi na duh zet mi tu nai hrawngah a ummi sim maw?

Ziangvek zawn ah na nunah tlasam zet, le fiang lo zet in na theih awknak tunai ah a um maw, ziangvek asi?

Thlacam duhmi pawl sim aw, mibur tlacamlannak hrang:

..
..

ZARHKHAT SUNG CANGVAIHNAK

Bible zir lawng si loin team leader thawn reltlang uhla ziangmi na tuah tikah na thlarau nun na thangso ding timi nangmai dinhmun ih zir in Pathian sangka onsak mi ruat tlang in hawl tlang uh.

Pathian biaknak

- Bible siar nak siar theh aw
- Nitin thlacam

Bulpak Bible zirnak

- Ca siar dingtimi pawl siar aw la thusuhnak pawl sang aw

Nunpi aw

- Local church member na si hrih lo pang asile member lut aw. Kawhhran member pakhat in na tuah dingmi pawl pastor lole hruaitu hnenah fiang zet in sut aw.

Bible zohlo: I Kor. 12:27, “Nan zatein Khrih ih ruangpi nan si ih pumpak ciarin a taksa then nan si fingfing.” zohlo in ngah ding zuam aw.

- Na rualpi sawm aw la Khrih dungthluntu kawhhran community sung na um ruangah na thathnempi mi pawl sim aw.
- Kawhhran member dang thawn can hmang aw. Zanriah ei tlang, coffee in tlang, lek tlang in na tikcu can zumtu dang thawn hmang aw.
- A dangdang...

BIBLE SIAR DING: Bible siar phah in a hnuailam ah na lungsung suakmi, Thiang Thlarau in a lo zirhmi pawl ngan aw.

1. Mark 12:1-17
2. Mark 12:18-34
3. Mark 12:35-44
4. MARK 13:1-13
5. MARK 13:14-37
6. MARK 14:1-21
7. MARK 14:22-31

PATHIAN BIAKNAK

Pathian in amah betu, sunlawihtu dingah sersiam kan si vekin siseh amah in in rundamnak ruangah Pathian kan thangthat. Pathian thangthat biaknak cu zumtu pawl hrangah cantha can sunglawi asi. Pathian in in duhdawtnak ruangah amah kan duhdawtnak langter in kan thangthat nak asi. A bur in kan tawn khawm tikah hla thawn siseh a phunphun in kan Pathian cu kan thangthat asi. Kawhhran biak khawm nak can hman tikah a hran in Praise and Worship, Pathian thangthat sunloihnak hla thawn can hman theu asi. A tu zarh sungah Pathian na sunloih thangthat nak zohsal in na hmuhtawnmi pawl sim fiang aw.

A tu zarh sungah Pathian na thangthat nak ah na tawntehmi lak ihsin an duhbik mi ziang a um, ziangruangah?

Pathian thangthatnak ah na fiang hnai lo mi ziang a um?

Pathian thangthatnak can hman tikah nangmah bulpak in Pathian thawn pehzawm awknak, pawlkom awknak nan neih mi a um maw?

Pathian biak thangthatnakah a tu hnakin tha sinsin in Pathian biak thangthat thei dingin na tumtahmi ruah mi duh mi ziang a um?

BULPAK BIBLE ZIRNAK KAWHHRAN HMUITHLAM PAHNIH

Bible ngantu in mitthlam ah lang thei dingin simduhmi simfiangnak ah hmuithlam thawn thu sim duhmi ca in ngan mi a um theu.

I Kor. 12:12-14, 12Khrih cu taksa ruangpum bangtuk a si. Taksa ruangpum cu pakhat a sinain taksa then cu tampi an si. 13Cubangtuk in kannih khal hi Judah mi le Zentail mi, miluat le sal tiin um hman nungla kan zate hin cuih ruangpum pakhat sungah cun Thlarau pakhat ih baptisma lami kan si ih kan zate hin cuih Thlarau pakhat cu intlaang dingah tuahmi kan si. 14Ruangpum hi taksa then pakhat lawng a si lo, taksa then tampi a si.

A tlunih Bible bungcang na siar tikah ziang ruahnak na thinlung sungah a lang?

Kawhhran cu “ruangpum” vekin sim tikah kawhhran ih umzia theihfeng a awlsam ter. Jesuh cu kawhhran ih “lu” asi (Eph. 5:23). Jesuh cu kawhhran ih lu, ruahnak hrampi asi ih kannih zumtu pawl cu taksa ruangpum kan si.

Kawhhran cu taksa ruangpum vekin sim tikah khat le khat kan tul tawn awkzia tla a lang sinsin. Khrih ah kan tulzia bangran ten rualran awknak nei mi kan si ih tuantlang theh ding kan si.

1 Kor. 12:17-18, Ruangpum hi mit va si thluh bangsehla ziangtinso thu a theih ding? Cule hna lawng sibang sehla ziangin so rim a hnim ding? Sikhalsehla atuih thil umdaan vek hin, Pathian in taksa then dangdang cu an umnak ding hmun ciarah Amah ih duh vekin a ret a si.

A tlunlam ih Bible bungchang in kawhhran umzia na theihdan ziangtin a lo bawm?

Himi bungchang in kawhhran ah na dinhmun ziangvek asi ti ziangtin a lo theihter?

Dungthluntu Peter in hmuithlam hmangin tongkam thawn kawhhran umzia a sim:

I Peter 2:9-10, 9Sikhalsehla nannah cu hriil cia miphun, Siangpahrang ih puithiam, miphun thianghlim, Pathian ih miphun bulce nan si. Khawthim sung ihsin mangbangza tleunak sungih a lo kotu Pathian in khuaruahhar thil a tuahmi pawl tlang-aupi dingih hriilmi nan si. 10Tuih hlanah cun Pathian ih minung nan si lo, sikhalsehla atu-ah cun amah ih ta nan si; tuih hlanah cun Pathian ih zaangfahnak nan thei lo; sikhalsehla atu-ah cun a zaangfahnak nan co zo.

A tlunih Bible bungchang sungah Kawhhran umzia langtertu tongkam hmanmi pawl rin aw.

Korin kuatkhat ah Paul in asim vekin Peter khalin kawhhran cu pumkhat, community pakhat asinak thu a sim. Tulai kawhhran cu pawl phunphun ah kan thenthek aw celcel. Kanmah lala tla local church dangdang ah kan khawm aw, Pathian kan bia. Asinan Bible thuhrampi ah kan hmuhmi cu Pathian uknak hnuai ah kan zaten pumkhat, Khrih ih community pakhat kan si.

Kawhhran member kan zaten miphun hleice kan si, Pathian uknak hnuai ah community pakhat asi mi, leitlun miphun kip lakah a tekdarh aw mi kan si.

c.9 nakah a sim vekin “hriilce” “miphun hleice” puithiam miphun tiah kawhmi kan si vekin kawhhran zumtu pawl cu a pehtlai aw theh mi kan siih Pathian ih tumtah mi tuansuak dingin kutkai in hnatuan tlang ding kan si. Pathian zangfah lainatnak co ngahtu kan si vek in acuih kan co mi Pathian zangfahnak cu a tultu pawl hnenah simsawngtu ding kan si. Khrih dungthluntu, Khrih ih community ah pehtlaih aw mi kan zapi ten kan cangvaihnak le pehtlaih awknak in Pathian thangthat le Pathian biaknak a rahsuah ih kan neih mi Thuthangtha cu midang hnenah simsawngtu ding kan si.

Peter ih nganmi Bible bungchang na siar tikah kawhhran dinhmun le umzia, hnatuan ziang a lo theihfiang ter?

Himi Bible bungchang in kawhhran tumtah le hnatuan ah na dinhmun le tuanvo ziangtin a lo theihter?

KAWHHRAN AH TUAHMI PAHNIH

Kawhhran member, Khrih dungthluntu kan sinak ah tuah ding tampi kan nei ih cutin nitin thlarau nun thangso thei dingin. Pathian biaknak, Pathian aw ngai in Thuthangtha ngai thlaknak, midang

rennak, kan neihmi peksuahnak, tvp, tampi tuah ding a um. Asinan cumi tampi lakah thil pahnih kawhhran in a tuahmi thu zohtlang uhsi. Pakhatnak cu baptism asi:

Roman 6:3-4, Khrih Jesuh thawn kan pehzom awknak in a sungih hnimmi kan si tikah a thihnak sung khalah hnimmi kan si tihi nan hngilh maw si? 4Baptisma kan lak tikah amah thawn phummi kan si ih a thihnak ah khal kan tawm ve; cuvek thotho in Pa ih sunlawinak huham in Khrih kha thihnak ihsin a thawhter bangtuk in kannih khal a thar in kan nung ding.

“Baptism” timi tongfang sim ve ten na khawruahnak sungah ziang alang, ziangruangah?

Zumtu pakhat in baptism a lak tikah Jesuh Khrih zumtu asinak mipi hmaiah a phuansuah awknak asi. Tidai sungah hnim asi tikah Jesuh Khrih ih thihnakah a thi ve ih tidai sung ihsin kaihtawhsal asi tikah Jesuh Khrih ih thohsalnak a tawmpi ve tinak a langter asi. Khatlam zawngin kan sim asile mi pakhat in baptism a lak tikah mi piangthar asinak mipi hmai ah a langternak asi.

A hnuailam Bible bungcang pawl siar aw la Jesuh in Baptism thu ziang a zirh, na zir ngahmi a hnuailam ah ngan aw:

Mathai 28: 18-20: Jesuh cun a pan hai ih an hnenah, “Lei le vanih thuneihnak hmuahhmuah cu ka hnenah pek a si zo. 19Curuangah feh uhla miphun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. 20Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a ti.

Tirhthlah 2:37-41: 37Cuih thu an theih tikah an thinlung a khoih zetih Piter le a dang tirhthlah pawl cu, “U le nau pawl, ziangso kan tuah ding?” tiah an sut.

38Piter in an hnenah, “Nan zatein nan soal sir fingfing uhla Jesuh Khrih hmin in baptisma lak uh; cuticun nan sualnak ngaidam nan si ding ih Pathian laksawng Thlarau Thianghlim nan ngah ding. 39Ziangah tile Pathian thukamnak cu nanmah le nan faate pawl hnenah le Pathian thawn a hlat awmi an si nain Bawipa kan Pathian in a kawhmi pawl hmuahhmuah hnenah a si,” tiah a ti. 40Piter in thu tampi a zirh ih a forh hai. “Hi miṯha lo parih a thleng dingmi hremnak ihsin luat dingah zuam aw uh,” tiah a ti. 41Piter ih simmi cu mi tampi in an zum ih baptisma an lak; cuih ni ni khatah an pawl cu mi thawngthum tlukin an karh. 42An zatein tirhthlah pawl hnen ihsin an zir ih, tirawl ei tlaangnak le thlacam tlaangnak thawn pawlkomnak an nei ringring.

Tirhthlah 8:26-40:

26Bawipa ih vancungmi in Filip hnenah, “Na timtuah awla thlanglam ah Jerusalem ihsin Gaza fehnak lamzin ah vung feh aw,” tiah a ti. (Atu-ah cun hi lamzin cu an hmang nawn lo.) 27A ti vekin a tim a tuah ih Filip cu a feh. Culai ah Ethiopia mi pakhat an khua lamih a tlungmi a tong. Cupa cu tilpermi a si ih Ethiopia siangpahrang * nu ih neihmi sumsaw hmuahhmuah a kilkhawitu bawi a si. Amah cu Jerusalem ah Pathian bia dingin a feh. 28A ra tlunlam ah a rangleng parah to in profet Isaiaah cabu a siar. 29Thlarau Thianghlim in Filip hnenah, “Feh awla khi rangleng khi va naih aw,” tiah a ti. 30Filip cun a hei dawi ih profet Isaiaah cabu a siar ti a thei. Filip in, “Na siarmi hi a tican na thei maw?” tiah a sut. 31Cupa cun, “Zotal ih in simfiang lo ahcun ziangtinso ka theih thei ding?” tiah a sawn. Cule Filip cu a rangleng parah to ve dingin a sawm. 32A siarmi Ca Thianghlim cu a tanglam vek hin a si:

“Amah cu thah dingmi tuu bangin an hruai ih, Tuu faate a hmul an met laiah ai loih a um bangin, tong loin daitein a um. 33Hmuhsuam nautatnak a tuar, tantu zohman a nei lo; Leitlun ihsin a nunnak an laksak ruangah, A ci thlahmi pawl sim ding zohman an um lo,” * tiin a um. 34Cupa in Filip cu, “I sim hnik! Profet Isaiah ih a tongmi hi zo ih thu so a si? Amah ih thu maw, midang ih thu so?” tiah a sut. 35Cutikah Filip in cuih Baibal caang ihsin thokin Bawi Jesuh Thuthang tha cu a sim theh. 36Cutiin an vung feh vivo ih tidai a umnak hmun an thleng. Cupa cun, “Hinah tidai a um. Baptisma co dingah ziangso i dawntu a um?” tiah a ti. 37(Filip in, “Na thinlung zatein na zum ahcun baptisma co ding na si,” a ti. Cupa cun, “Ka zum; Jesuh Khrih cu Pathian Fapa a si tiah ka zum,” a ti.) * 38Cuih Ethiopia pa cun a rangleng cu a dinter ih Filip thawn tidai sungah an vung tum ih Filip in baptisma a pek. 39Tidai sung ihsin an hung suah tikah Bawipa ih Thlarau in Filip cu a lak hlo. Cuih bawi in Filip cu a hmu nawn lo; a sinain lungawi zetin a inn lamah a tlung. 40Filip cu Ashdod a va thleng; Sisaria ah a feh ih lamzin tuan khua kipah Thuthang tha cu a sim vivo.

A pahnihnakah, kawhhran member, Khrih dungthluntu kan sinak ah kan tuah theu mi cu Bawipa zanriah asi. Jesuh amah in a dungthluntu pawl hnenah tuah ringring dingin in cahta mi asi.

Luke 22:19-20, 19Cun saang hlom khat a lak ih Pathian hnenih lungawi thu a sim hnuah a phel ih a dungthluntu pawl hnenah cun a pek. “Himi hi nan hrangih ka pekmi ka taksa a si. Keimah in theih ringringnak dingah run tuah uh,” tiah a ti. 20Cuvek thotho in zanriah an ei theh tikah khuathai cu an hnen ah a pek ih, “Hi hai cu nan hrangah ka thletmi ka thisen thawn nemhnetmi Pathian thukam thar a si.

Veng kawhhran dangdang in an hmandan a bang rep lo khal asile a tumtahmi le duhsan cu bangrep ringring asi; kan Bawipa Jesuh Khrih cu kan mai hrangah a thihnak langtertu theih hngilh lo nak asi.

Bawipa zanriah na hman tikah ziangveh hmuhtawnmi na nei?

Bawipa zanriah hmanmi thu thawn pehpar in thusuh duhmi ziang na nei?

Bawipa zanriah kan hmanmi hi a thupi zetmi, Jesuh dungthluntu kan sinak langtertu asi ih Khrih ah pumkhat kan sinak langtertu khal asi. Cuvek thotho in Bawipa zanriah kan hman tikah kawhhran ih tumtahmi tla in theihtersal ringring asi. Jesuh Khrih cu kan sualman leiba pe in kross parah a thih ih a thosal asi ti in theihter ringring vekin kan co ngahmi thuthangtha a tultu mi tampi an um asi ti khal in theihter sal ringring asi. Bawipa zanriah kan hman tikah leitlun ah rundamtu nei lo tampi an um ih rundamnak Thuthangtha sim duhnak tla in neither asi.

Baptism le Bawipa zanriah thu kan zir ngah zo vekin Khrih dungthluntu pakhat dinhmin in ziang kan tuah sunzawm vivo a tul?

**DUNGTHLUNTU LAMZIN
DISCIPLE YOURNEY**

SESSION 6

JESUI RAWNGBAWLPI

**Dungthluntu pawl cu Krih thei dingin kawhmi, Khrih ah thang dingin kawhmi, Khrih
hrangah fehsuak dingin kawhmi an si.**

ZOHSALNAK

Netabik kan zirzo mi ah Khrih dungthluntu nun ziangvek asi ti kan zir zo: Khrih dungthluntu cu bulpak Khrih thawn pehzawm awk hlei ah community ah zumtu unau pawl thawn pawlkom awknak nei in Khrih palai si ding thu kan zir.

Tuzarh sung zir ding siar ding pawl lakah ziangtiang na rak tuah ziang na bang?

Bible siar ding mi na siarmi lak ihsin ziangmi na zir ngah?

Thu sut duh mi na nei maw?

THLACAM

Can tawite thlacamnak in can hmang uhsi.

- Pathian hnenah lungawi thu sim aw: Kawhhran member si in zumtu unau pehtlaihnak na neih mi parah lungawithu sim aw, Khrih ih milesa pawl thawn pehtlaihnak nei in pawlkomnak na neih mi parah lungawithu sim aw.
- Pathian in amai duhmi rawngbawlnak Pathian lungput thei thei dingin thlarau bawmna dil aw.
- Pathian hnen thlacam awla fimnak dil aw, kawhhran member sinak ih umzia ziang asi, Pathian in leitlun ah ziangtin hna a tuan ih ziang atumtah, ziangtin a cangvai timi pawl thei thiam dingin thlarau fimnak dil aw.

THUHMAIHRUAI

“Ralkap pawl, tipar khual tlawng pawl, ralkap thazang cak pawl! Thla reipi kan cuan rero mi ralpi do awknak hmaitawn ding nan si thlang. Leitlun pumpi mit in an lo zoh. Leitlun pumpi ihsin zalennak duhtu thinlung mit in an lo cuan ih an lo thlun asi.”

Atlun ih thutlangtar mi hi American ralbawi General Dwight D. Eisenhower in June 6, 1944, leitlun ralpi voihnihnak ah American ralkap pawl fehsuak dingin thu a pek zawngha a tongkam asi. Himi Eisenhower in American ralkap pawl thu a pek tiangah leitlun ralpi do awknak ah Axis ralkap pawl in Europe ram tampi an neh ih an uk, nasaten an hrem, harsatnak namen lo a um laifang asi. Leitlun pumpi in runsuaktu ding an cuan laifang asi.

American le Allied ralkap pawlin European ramah ke an thlak in ral an do taktak hnu kumkhat sungah Europe ram tampi cu Axiz ralkap pawl kut ihsin runsuak an sita, lungawitlak za asi.

Cuvek in leitlun pumpi ah milai pawl cu soal, thihnak sal sungah an tang theh. Asinan Jesuh Khrih in thihnak a tuar ih a thoosal hnu ah leitlun pumpuluk milai, soal le thihnak saltang pawl runsuak dingin a ralkap pawl thu a pek zo asi. Jesuh in leitlun ralkap vekin hriamhrei le meithal a hmang lo, a kawhhran hmang in soal cu neh in a um ih a uknak ram cu catbang loin a kau sinsin, a karhzai sinsin asi.

Jesuh Khrih dungthluntu dinhmun hi Jesuh cangvaihnak ral do awknak ah na tel ve asi. Jesuh ih mission leitlun pumpi mipun hmuahhmuah hnenah nehnak thu than in ram lak ding mission ah tel ve dingin kawhmi na si. Jesuh ih hnaturan mission ah tampi a telmi lakah a tawi famkim bik in sim theih asi: dunglungtu si ter vivo ding asi. (Making disciple).

Kawhhran mibur cangvaihnak sungtel ah siar tel na si ruangah, ziangtin na dinhmun canpual neihmi na ruat?

Midang hnenah Jesuh thu na sim tikah ziangyek lungawinak maw thinlung tawntehmi na nei?

BIBLE THUAN THU THEI AW

Jesuh in leitlun aratsan thu a sim. A ratnak san bik, a mission hnatuannak bik cu a hmaisa bik le neta bik ah a dungthluntui pawl hnenah a simmi ah a fiang zet. A sim hmaisa bik mi cu dungthluntu pawl a kawh tikah a simmi ah a lang. Session 1 ah Jesuh Khrih dungthlun dingin mai duhhrilnak in timtuahnak thu kan sim zo. Tu ah leitlunah Jesuh in ratsan hnaturan mission thu sim hrih uhsi.

Mathai 4:18-20, 18Jesuh cu Galilee Tili kapih a feh rero laiah ngakaitu unau pahnih, tili sungah sur vorh in nga an kaih rero kha a hmu. Cuih unau pahnih cu Simon (Piter tiih kawhmi) le a nau Andru an si. 19Jesuh cun, “Ka hnenah ra uhla mikaitu ah ka lo tuah ding,” a ti. 20Hmakhatteah an sur pawl cu an tanta ih amah cu an thlun. 21A feh vivo ih Zebedi fapa pahnih Jeim le Johan teih unau a hmu. Anmah cu an pa Zebedi thawn an long sungah an um ih an sur pawl an tholh rero. Jesuh cun a vun ko ih, 22hmakhatte ah an long le an pa tanta in Jesuh cu an thlun.

Jesuh leitlunah a ratsan, a dungthluntu pawl hnenah tuanvo a pekmi mission cu tawiten sim theih asi; “I thlun aw” le “milai kaitu” ah ka lo tuah ding a timi ah a fiang.

Jesuh Khrih dungthluntu ih mission “milai kaitu” timi thu ziang na zir ngah, ziangtin na ruat?

A thi ih a thohsal hnu ah Jesuh in a dungthluntu hnenah leitlun a ratsan, a mission cu dungthluntu pawl hnenah a simsal ih cucu dungthluntu pawl khalih hnaturan, leitlun mission asi tiah tuanvo a pek hai.

Mathai 28:18-20, 8Jesuh cun a pan hai ih an hnenah, “Lei le vanih thuneihsak hmuahhmuah cu ka hnenah pek a si zo. 19Curuangah feh uhla miphun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. 20Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a ti.

A tlun Bible bungcang ah a sim vekin Jesuh ih thupek tluntu ka si tiah raltha zetin na sim ngam maw? Ziangruangah?

THUAN THU LAILANG

NA MISISON CU JESUH HNEN IHSIN A RA MI ASI

Mathai 28:18-20 ah Jesuh thupek mi “The Great Mission” “Thupek Ropi” tiah sim asi theu. Jesuh in a dungthluntu pawl a kawhna san, a thlahnaksan, tuanvo a pekmi pawl khaihawmtu asi.

Jesuh ih himi thupek a pek tikah “san deng tiang” (v.20) tiah a sim ruangah nang le kai, tuini minung, Khrih dungthluntu pawl khal kan tel asi.

Jesuh dungthluntu thar na si khal le nang le kei Jesuh ih leitlun mission ah kan tel ve asi. Na tel ve asi. Jesuh Khrih ih dungthluntu tuah vivo ding tuanvo mission cu na life mission, na damsan asi ve.

Jesuh ih dungthluntu mi va tuah vivo ding timi na ruat tikah ziangtin na khawruahnak ah na ruat in ziangvek phurnak na nei, ziangruangah?

Jesuh ih thupek hrampi cu amai thuneihnak parah a hngat aw mi asi, “Lei le van ih thuneihnak hmuahhmuah cu ka hnenah pek asizo” (v. 18). Lei le van ih thucang mi ummi hmuahhmuah parah thuneitu asi timi mi zapi theiher in duhmi asi.

Ziangruangah cucu a thupi? Ziangah tile mission pakhatkhat tuah ding tikah mission tuanvo petu a thupit tluk in a mission khal a thupi asi.

Leitlun ralpi voi 2 nak laiah American ralkap menmen in Axis ralkap pawl do dingin thu pek sehla zohman in a thu an ngai lo ding. Asinan American ralkap General pakhatin thu a pek tikah American ralkap pawl in German le Axis ralkap pawl do dingin an pok suak ih an do nak asi. Cuvekin Jesuh cu leitlunah milai in a nungtu hmuahhmuah lakah mi thupi bik asi, a thihnak, a thawhsalnak, a nunnak in ziangkim parah thu neitu asi. Pathian asi, milai khal asi. Curuangah a thupekmi cu amai thuneihnak hnuai ah a ummi parah thu a pek, a duntluntu pawl tuanvo mission in peknak asi. Curuangah a thupek nak in a thu kan lun ding in phut asi.

Jesuh in a thuneihnak thu asimmi ziangtin na sang leh ve ding?

NA MISSION CU DUNGTHLUNTU TUAH ASI

Jesuh thupek lai muril cu “Leitlun mipun hmuahhmuah dungthluntu va si ter” (v. 19) asi. Asile ziangtin kan tuah ding? Khui tawk in kan thok ding? Dungthluntu tuah cu ziangvek asi? Ziang kan tuah ding?

Lungawi um za asi mi cu Jesuh in amai hmin in dungthluntu kan tuahdan ding step pa 3 awlsam te in zirh:

Feh: Feh loi tohmun in dungthluntu tuah a theih lo. Jesuh in fehsuak in kan insang, rualpi, inn hnen, community, le leitlun tintian ah fehsuakin Thuthangtha sim ding thu in pek.

Baptisma: Baptism cu Jesuh Khrih cu keimah bulpak rundamtu ka bawi asi Jeush zumnak cu mipi hmai ah phuansuahnak asi. Kan hnaturan cu midang pawl kha soal nawn lo dingin va tuah asilo, kawhhran ah khawm aw ringring dingin va tuah asifawn lo. Kan hnaturan cu Jesuh Khrih rundamnak Thuthangtha sim in a theitu le cohlang tu pawl kha Jesuh Khrih ah an zumnak phuangsuaak dingin tuah asi.

Zirh: Dungthluntu tuah timi cu piangtharnak ah a tawp lo. An piangthar hnu ah Jesuh ih zirhmi hmuahhmuah thlun dingin zirh dingmi an si. Khatlam zawngin sim asile Jesuh Khrih zumtu thar, dungthluntu thar pawl kha Jesuh dungthluntu ih nundan ding ding pawl cipciar in zirh ding kan si.

A tlunih tuah ding pa 3 lak ah ziangmi na hrangah a harsa bik ding, ziangruangah?

Jesuh dungthluntu dinhmun in ziangvek tawnteh mi hmuhtawmi na nei?

Jesuh dungthluntu va tuah sin hi “discipleship” tiah an simmi cu asi. A thangso reromi, theh ti um lo mi asi. Tikcu a lak zet ding. Leitlun damsung Jesuh dungthlun ka theh zo ti a um lo. Jesuh dungthluntu cun thangso rero ding, thantawp ti khal a um lo asi.

Thinsau ten, nangmah le nangmah na zohawk tikah beidong mei hlah. Cuvek thotho in na rianmi, Jesuh tungthluntu pawl par khalah na thinsau ter aw la beidong mei hlah.

TELVE IN TUAH AW

Nangmah bulpak nunah ziangtin Jesuh Khrih cu na rundamtu ah na co hlang ih ziangtin Jesuh dung na thlun timi cu na hmanrua tha –midang dungthluntu va tuah sin ding na tul zetmi asi ding. Zumtu hrek khat cu ziangtin Jesuh thawn an tong aw, rundamnak an co timi midang simsin an ning a zak, an harsat zet theu. Harsat cing khal in sim ding asi, midang zohman hnoihnok lo ten tawnteh mi thu sim ding asi.

A awlsam bik cu a hnuailam thusuhnak sang phah in sim aw:

Jesuh Khrih na cohlan, na piangthar hlan nun ziang vek asi?

Jesuh Khrih ziangtin na thei ih ziangtin a dungthluntu ah na cang?

Jesuh Khrih dungthluntu na si hnu ah ziangtin na nun a danglam, a thleng aw?

Nangmai hmuhtawmi testimony cu nangmai hrangah siseh na testimony ngaitu hrangah siseh hmual nei zet asi thei. Can a umdan ih zir in na group lakah na testimony sim aw. Group sungah na simnak in midang hnenah Jesuh rundamnak Thuthangtha sim thiam dingin zir awknak tla asi.

THLACAM DIL DUHMI

.....

ZARHKHAT SUNG TUAH DINGMI

Bible siar/zir lawng si loin zarhkhat sungah ziang tuah ding timi na group leader thawn ruat khawm uh.

Pathian biaknak

- Bible siar ding pawl siar theh aw
- Pathian hnenah thlacam in leitlun ah Jesuh mission ah na tel ve nak hrang thlacam aw. Nitin ten Jesuh dungthluntu tuah sin ding in thlacam aw.
- Nitin te Pathian thawn can hmang in tikcu pe aw.

Bulpak Bible zirnak

- Bulpak Bible zir ding pekmipawl Bible siar lawng si loin zir aw, thusuhnak pawl sang aw

Nunpi aw

- A tuzarh sungah a malbik mi pakhat hnenah Jesuh Khrih rundamnak a tultu hnenah na testimony sim aw
- John 14:6, “Keimah cu lamzin, thutak, le nunnak ka si” timi zohlo in ngah aw.
- Na kawhhran pastor lole kawhhran hruaitu tuzarh sungah tong aw la ziangtin Khrih rundamnak Thuthangtha karhzai ternak ding hrangah na tel thei ve ding timi sut awla tuah aw.
- Leitlun pumpi mipahun hmuahhmuah cuan aw. Leitlun ah ziangvek in zovek pawlkom pawlin Jesuh Thuthangtha an sim ih ziangtin na tel thei ve ding timi ruat aw.

PATHIAN BIAKNAK BIBLE SIAR DING

1. Mark 14:32-52
2. Mark 14:53-72
3. Mark 15:1-15
4. Mark 15:16-32
5. Mark 15:33-47
6. Mark 16:1-8
7. Mark 16:9-20

PRAYER MISSION

Jesuh in a dungthluntu pawl hnenah leitlun mission thu ziang a sim:

Luke 10:1-2, 1Cuih hnuah Bawipa in midang sawmsarih le pahnih a hriil ih amah a fehnak ding khawkip le hmunkip ah khan pahnih pahnih in a rak thlah sung. 2An hnenah cun, “Rawl khawm ding a tamzet nain a khawmtu ding an malte a si. Curuangah rawl khawmtu ding tam sinsin a thlahnak dingah lo neitu hnenah thla cam uh.

Jesuh dungthluntu tuah dingin Jesuh thupek na thlun rualrual in thlacam hngilh hlah. Na mission tuansuak dingin thlacam cu hmual nei bik le man nei bik asi.

Curuangah na pehtlaihmi milai pawl lak ihsin Jesuh Khrih ih rundamnak Thuthangtha theihhtul pawl hmin list tuah aw. A tam thei bik in ruat aw. An hmin ngan aw. Pathian hnenah thla cam aw

la an hnenah Pathian amah le mah phuang suak aw dingin an hmin sal in Jesuh Khrih rundamnak an co ngah thei nak ding hrangah thlacam sak aw.

Ka thlacam sakmi hmin list:

--	--

BULPAK ZIRRNAK

NA MISSION CU LEITLUN PUM ASI

Bible sungah Thuthangtha pa 4 pawl in Jesuh ih thu pawl in sim. Tirhthlah bu in kawhhran dinthawk dan thu pawl in zirh. In zirhmi cu Jesuh Khrih in amah dungthlun duhtu pawl hnen ihsin a rawngbawlnak hram a thok timi kan hmu.

Tirhthlah 1:7-9, 7Jesuh in an hnenah, “A cuih tikcu le nithla cu ka Pa ih thuneihnak ih khiah-mi a si ih nannih theih tulmi a si lo. 8Sikhalsehla nan hnenih Thlarau Thianghlim a rung thlen tikah cahnak huham thawn nan khat ding ih Jerusalem le Judea ram le Samaria ram hmuahhmuah le leilung tlun a deng tiang keimah ih theihpitu nan si ding,” tiah a ti. 9Cutiih a sim theh tikah Jesuh cu an mithmuh rori-ah vanah laakso a si ih mero in a phen ih an hmu thei nawn lo.

A tlunih Bible bungcang hin The Great Commission thawn ziang pehtlaih awknak a nei?

Jesuh in hmun pathum a sim: Jerusalem, Judea ram hmuahhmuah le Samaria, le leitlun deng tiang. Jerusalem cu Jesuh a rak tlanlennak amah thawn a nai awk biknak hmun asi. Cuvek in nang khal nangmah thawn a naibik, na insang, community, pehtlaih mi ihsin na thok thei asi.

Na insang, rualpitha pawl hnenah Jesuh thu sim dingah ziang thu sutnak na nei?

Na ngai pawimawh bikmi minung pawl hnenah Jesuh thu sim dingin ziangtin ke na kar hmaisai bik ding?

Pahnihnakah, Judea ram hmuahhmuah le Samaria ram timi pawl cu Jerusalem leng lam, a kiangkap minung mipun pawl thu a simmi asi. Cuvek in nang khal na insang lenglam, na khua, community ah nangmah thawn a nai aw mi minung pawl hnenah Jesuh rundamnak Thuthangtha sim in dungthluntu na tuah thei asi.

A tlunih thu simmi ziangtin na thinlung sungah ruahnak a suak hmaisai bik?

Na inn hnen, veng, community ah Jesuh theihpitu, Jesuh rundamnak thu sim dingin ziangtin ke na kar hmaisai bik thei ding?

A pathumnak ah “Leitlun deng tiang” thuthangtha sim in dungthluntu va siter dingah Jesuh in a dungthluntu pawl thu a pek. Cuvek ngaingai in dungthluntu pawl in Jerusalem lawng si loin a kiangkap le leitlun hmun tintian ah kawhhran an din ih dungthluntu an tuah vivo. Missionary na si tengteng ding tinak asilo, leitlun pumhuap Khrih Thuthangtha simnak ah na tel ve thei dan a um asi.

“Leitlun deng” tiang thuthangtha sim ding timi na theih tikah ziangtin na ruat?

Jesuh thupek thlun thok dingin ziangtin ke na kar thok ding?

NA MISISON AH KAWHHRAN A TEL ASI

Krih ih dungthluntu in leitlun pumhuap dingthluntu si ter dingin tuanvo na nei asi (Mat. 29:19). Cuvek thothe in Jerusalem, Judea ram hmuahhmuah le Samaria ram pawl khalah rawngbawl ding tuanvo na nei asi. Nangmah te lawngin Jesuh thupek zapi ten na tuan theh thei lo, nangmah hnakin a tumsawn mi Khrih ih mibur community ah na tel a tul asi. Khatlam in sim asile Jesuh thupek na thlun ih na tuansuak nak ding hrangah kawhhran na tul asi.

A tlunih thusimmi parah ziangtin na ruat?

Session 4 ah kan zir zo vekin Khrih dungthluntu pawl cu Khrih ih ruangpum kawhhran pehzawmtu kan si. Mahte lawng a cangvai mi kan si lo. Cutin kan umnak kawhhran ciar ah tuanvo in pek vekin thlarau laksawng khal pek ciar kan si.

Roman 12:4-8, 4Kan ruangpi hi pakhat a sinain taksa then tapi an um ih cuih taksa then pawlih hnatuannak cu an bang aw lo. 5Cu bangtuk in kannih khal mi tapi kan si nain Khrih thawn kan pehzom awknak ah cun pum khat kan si. Kan ruangpi ih taksa then pawl an peh awk thluh vekin kan peh aw thluh ve a si. 6Curuangah laksawng phun dangdang kan ngahmi cu Pathian zaangfahnak kan cozat ciarin hmang uhsi. Kan ngahmi laksawng cu Pathian thu phuan ding a si ahcun zumnak kan comi zat in phuang uhsi; 7cubangtuk thiamthiam in midang riantu ding kan si ahcun rian uhsi; zirhtu ding kan si ahcun zirh uhsi; 8midang thazaang petu ding kan si ahcun pe uhsi. Kan neihmi thilri kha midang hlawm ding kan si ahcun siang zetin hlawm uhsi. Hotu ding kan si ahcun taimazet in tuan uhsi; midang hnenah zaangfahnak langtertu ding kan si ahcun lungawi soparte in langter uhsi.

Jesuh dungthluntu na si vekin ziangvek thiam hleicetmi, thlarau laksawng, ti thei zawng, laksawng na co mi a um?

Kawhhran member pakhat dinhmun in na laksawng co mi pawl kawhhran tungdingtu dingah ziangtin na hmang thok thei ding?

Jesuh dungthluntu pawl cu zokhal anmah le tawk zawn ciar in Kawhhran sungah riantu an si thei nak ding hrangah thlarau laksawng pek an sit theh. Cutin kawhhran member pakhat ciar in anmah le laksawng comi vek ciar in Jesuh an rian tikah kawhhran a harhdam asi.

Ephesian hnenah ca a kuat tikah Paul in hitin a ngan:

Ephesian 4:15-16, 5Duhdawtnak thinlung kengin thudik kan sim kan rel sawn pei ih kan lu a si mi Khrih sungah a phunkim in thang ding kan si. 16Amah Khrih ih uknak hnuai ah taksa ruang parih then dangdang pawl cu remte in an peh khawm aw theh. Hlikhlok ruhcaang pawl in taksa ruangpi cu hmun khatah an kaikhawm theh. Curuangah taksa ruang parih then dangdang cu anmah ih hnatuan ding ciar an tuan tikah taksa ruangpi cu a zatein duhdawtnak in a thangso a si.

A pehawknak dawtdawt in a um: Jesuh dungthluntu sinak in Jesuh thawn kan pehzom awk tikah kan thlarau a harhdam. Jesuh thluntu dinhmun in thlarau laksawng kan co mi ciar kan hmansuak tikah kawhhran a harhdam asi.

Leitlun thuanthu ah kan hmuh vekin a harhdammi kawhhran cu leitlun thuanthu an thleng asi.

Kawhhran ruangah na umnak community ziangtluk thlawsuah asi ti ziang na hmuhmi a um?

Kawhhran in leitlun a thlawsuah mi na hmu maw?

Pathian in a lo duhsakmi cu Jesuh Khrih cu bulpak in thuk zetin na thei ih nitin amah thawn nan bulpak pehzawm awknak thansoh ter sinsin asi. Cutin thlarau laksawng na co mi pawl cu Khrih ih mission thansohnak, a ram karhzainak, kawhhran tungdingtu ah hmang ih na umnak khua, veng community tuah thatu ah nahman awk dingmi asi.

Jesuh Khrih ih dungthluntu pakhat dinhmun in hmailam pan in na thansoh vivo nak ding hrangah ziang na tuah sunzawm ding?

**DUNGTHLUNTU LAMZIN
DISCIPLE YOURNEY**

SESSION 7

DUNGTLUNTU SINAK FIMFIANGNAK

DUNGTHLUNTU SIMFIANGNAK

KEY: Jesuh Dungthluntu timi cu Pathian in rumdannak hna a tuansuahnak ah telveknak asi.

Tutiang kan zirzo mi ah Jesuh dungthluntu ih sinak le hnatuan pawl ziangmawcin kan zir zo. Himi zirnak ah thuksinsin in Jesuh dungthluntu timi cu ziang asi? Dungthluntu in ziang a zum? Ziangsi a tumtah timi pawl kan zoh vivo ding.

John tihnimtu thuanthu (John 1:29-42) ah John in ziangtin Jesuh a rak pehtlaihdan, a rawngbawlnak hmuahhmuah cu Jesuh ah a tawpna pawl kan zoh ding. Cuvek thocho in Jesuh in a dungthluntu pawl a ko ih a dung an thlun tikah ziangvek in Jesuh ih hnatuan mission ah an tel ve timi pawl kan zoh ding. Nangmai hmuhtawnmi pawl tla zalen zetin sim ve aw.

ZOHSALNAK

Ahmaisa zirnak ah Jesuh le dungthluntu pawl thu kan zir ih Jesuh in a dungthluntu pawl hnenah a zirh hmaisa bik le zirh netabik, a thupek netabik tla kan zir. Nitin te canpualtha a um ih piang in Jesuh uknak leitlunah karhzaiter sinsin dingin le a hmin thang sinsin dingin simsuak ding hngilh hrimhrim hlah.

Tuzarh sung zir ding siar ding pawl lakah ziangtiang na rak tuah ziang na bang?

Bible siar ding mi na siarmi lak ihsin ziangmi na zir ngah?

Thu sut duh mi na nei maw?

THLACAM

Himi zirnak hi thlacam nak in Pathian thawn pehtlaihnak in thok aw. A hnuailam vekin thlacam na thawk thei:

- Jesuh Khrih dungthluntu pakhat si ve dingin dungthluntu dang pawl thawn pehzawm pawlkom awknak na neih thei mi parah Pathian hnenah lungawithu sim aw.
- Na nunah Pathian in hna a tuandan pawl par khalah lungawithu Pathian hnenah sim aw.
- Pathian thu na zir vekin fimnak dil aw.

THUHMAIHRUAI

“Dungthluntu” (Disciple) timi tongfang cun Jesuh Khrih ah rundannak a cotu pawl nitin ten an nundan, Khrih dung an thlundan thu pawl a lailang. Cutin zumtu zapi ten Jesuh Khrih dungthluntu “disciple” kan sinak a langter. Jesuh Khrih dungthluntu kan sinak cu kanmah hnakin thlarau lamah a pitling deuhtu dung kan thlunnak in asi. Cutin kannih in kanmah hnakin thlarau lamah a pitlungmi, zirhtu dung kan thlun vekin kannih khalin midang pawl kha dungthluntu ah tuah in Jesuh dungthluntu kan karhzai ter vivo asi. Hitin nitin zumtu nunah, dungthluntu in midang pawl Jesuh dungthluntu ah va tuah vivo nak program hi “Dungthluntu lamzin” tiah kawh asi. Dungthluntu ah mi va tuah nak in siseh midang dungthlunnak in siseh zumtu pakhat cu thlarau nun mi pitling asi theinak lamzin asi.

Nangmai tongkam in Jesuh Khrih dungthluntu timi cu na theihfiang dan in sim/ngan aw?

Discipleship ih umzia le tuahtulmi pawl thu ah sut duhmi ziang na nei?

BIBLE THUANTHU

John tihnimtu cu leitlunah tumtah mission nei in a ra. Pathian in Messiah a ratnak ding lamzin sialtu dingah tuanvo a pekmi asi. A hnuailam Bible thuanthu in Jesuh leitlun hnatuan mission thu a sim fiang. Cuhlei ah a dungthluntu pawlin ziangvek dinhmun le tuanvo kan nei timi tla asim fiang asi.

John 1:29-42, 29A thaisun ah Johan in Jesuh a hnenih a rat lai kha a hmu ih, “Leilung sualnak a phurtu Pathian Tuufa khi zohhnik uh! 30‘Ka dungin mi pakhat a ra, a sinain kei hnakin a tum sawn, ziangah tile ka suah hlanah anih cu a rak um zo,’ tiih a thuhla ka sim rero zo mipa cu amah hi a si. 31Amah hi zo a si ding ti ka rak thei lo. Asinain amah hi Israel mi pawlih an theihnak dingah tidai in baptisma ka pek rero sannak a si,” tiah a ti.32Johan in, “Thlarau cu vancung ihsin thuro bangin a rung ih a parah a rung fut kha ka hmu. 33Amah teu a si tihi ka rak thei tho tho cuang lo, sikhalsehla tidai in baptisma pe dingih i thlahtu Pathian in ‘Thlarau a rung ding ih mi pakhat parih a fut kha na hmu ding; cupa cu Thlarau Thianghlim in baptisma petu ding a si,’ tiah i sim. 34Cupa cu ka hmu ngah zo. Fiangtein ka lo sim: Amah cu Pathian Fapa a si,” tiah a hmuhmi le a theihmi kha a sim.35A thaisun ah Johan le a dungthluntu pahnih cu cutawk ah an ding sal ih, 36Jesuh a rat kha an hmuh tikah, “Pathian Tuufa khi zohhnik uh,” tiah Johan in a ti.37Cutiih a timi cu a dungthluntu pahnih cun an thei ih Jesuh hnenah cun an feh ve. 38Jesuh cu a dunglet a her ih an rak thlun kha a hmuh tikah, “Ziang so nan hawl?” tiah a sut. Annih in, “Rabbi, khui-ah so na um?” tiah an let. Rabbi ticu zirhtu Sayapa tinak a si.39Jesuh in, “Ra uhla ra zohhnik uh,” tiah a ti. Cuih tikcu cu zanlam nazi pali hrawng a si. An feh ih a umnak cu an va hmu ih cuih ni cu a hnenah an caam ta.40Cuih mi pahnih lakah pakhat cu Simon Piter ih naupa Andru a si. 41Hmakhatteah a u-pa Simon kha a va hawl ih a hmuh tikah, “Messiah cu kan hmu zo,” tiah a ti. Messiah timi cu Khrih tinak a si. 42Cule Simon cu Jesuh hnenah a fehpi. Jesuh in amah cu a zoh ih, “Na hmin cu Johan fapa Simon a si; sikhalsehla Sefas tiah kawh na si thlang ding,” a ti. Sefas ticu Piter ti thawn a bang aw ih a tican cu ‘lungto,’ tinak a si. *

A tlun Bible bungcang pawlin Jesuh thu ziang in zirh?

THUANTHU SIMFIANG

Jesuh dungthluntu timi cu ziangsi umzia? Tiah thusuhnak kan sim tikah dungthluntu hnatuan le sinak hnakin Jesuh ih sinak le hnatuan kan theih hmaisak lawngah dungthluntu ih sinak le hnatuan khal fiang ten kan thei thei ding asi.

Tuini ah Jesuh sinak le hnatuan a phunphun in ziangtin mi in an sim theu?

Jesuh cu zo asi, ziang asi, ziang a hnatuan timi ziangtin na sim fiang ding?

John tihnimtu in Jesuh sinak a phunphun a sim, “Pathian tufano”, “Pathian Fapa”, “Thiang Thlarau thawn tihnimnak petu” ti ah a sim. Cui hleiah John in Jesuh thu a sim tikah a hlanpi ihsin a um zomi, John ih suah hlan ihsin a um zo mi timi thu tla a sim. Jesuh thu asinak danglam zet thu a sim, Jesuh cu milai menmen asilonak thu pawl a sim fiang. Jesuh cu fala thianghlim pumsung ihsin naute in a rung suak ih milai sinak zaahza, le Pathian sinak zaahza nei in soal nei loin leitlunah a nun thu hi zumnak thurin hngetchoh asi. Jesuh leitlun a rat tikah tumtah, hnatuan mission nei in a ra. ““Leilung sualnak a phurtu Pathian Tuufa khi zohhnik uh!” (John 1:29). “Leillung sualnak phurtu” tiah a sim.

Leitlun cu soal ruangah siatsuah in a um zo vek in milai bulpak ciar khal soal ruangah thluksiatnak nun in kan nung asi. Jesuh cu soal buainak tuah tha dingin leitlun ah a ra. A thihnak le thawhsalnak in rundamnak sangka in onsak—sual ngaidamnak in tuahsak ih cutin tuahthat sal mi nun in nungin Pathian thawn pehzawm awknak thar in tuahsak zo. Cucu Thuthangtha asi.

Jesuh ih mission hnatuan mi ziang na hmu thei?

DUNGTHLUNTU PAWL CU JESUH IH LEITLUN MISSION AH AN TEL VE ASI.

Jesuh dungthluntu vekin nun ding ahcun Jesuh ih mission theih hmaisak a tul asi. Thieh lawng a tawk lo ih Jesuh ih mission hnatuan nak ah kan tel tengteng a tul asi. John tihnimtu dungthluntu pawl tla in Jesuh an hmuh tikah Jesuh dung an thlun, a tak in an cangvai ve asi. Jesuh dungthluntu diktak si thei dingin theihnak lawng a tawk lo ih Jesui’ leitlun mission ah telve tengteng a tul asi.

Midang zumlotu hnenah Jesuh thu na sim tikah na hmuhtawn mi thu ziangtin sim/ngan aw?

Jesuh thu midang zumlotu hnenah kan sim lawng si loin ziangtin Jesuh leitlun hnatuan mission ah kan tel thei ve ding?

Bible sungah kan hmuh vekin Jesuh in a dungthluntu pawl hnatuan a fial tikah mi pakhat lawng a thlah dah lo ih midang thawn a kawp in lole a bur in athlah theu kan hmu. Cutin leitlunah Pathian uknak ram karhzai ter dingin kawp in lole abur in dungthluntu pawl cu hnatuan afial, a thlah theu asi. Amah Jesuh lala khal leitlunah taksa in a um lai ah dungthluntu pawl thawn an vak theu asi. Kannih khal Jesuh ih hnatuandan kan thlun ve dingmi asi.

Leitlun ah Jesuh ih mission hna kan tuan tikah bulpak pakhat te lawng si loin mibur (team) hnatuan tikah ziangvek hlawnak thatnak a um?

TEVE IN TUAH AW

Jesuh dungthluntu nun cu mahte bulpak in nun asi dah lo. A bur in zumtu dang thawn pawlkom nak nei in nun asi. Cutin mibur in umnak hmun ah midang zumlotu pawl sawm vivo in dungthluntu karhzar ter vivo ding asi.

Can tawite la in zumtu dang pawl thawn can hmang tlang in tuah dingmi tuah aw

1. Khat le khat hrang thlacam sak: Thinlung muril phorh suak in hmuhtawnmi lakah lungawi riahsiat, harsat nak tivek pawl simrelnak can minute ziangzat simaw hmang in thlacam tlang.
2. Nan duhtlang mi relkhawm in park ah lek tlang, zanriah ei tlang, movie zoh tlang, thil pakhatkhat tuah tlang in pawlkom nak nan group in tuah. Awlsambik cu hmaizarh group in tawn khawm hlan ah duh tlang duhmi pawlkomnak hrang nawm awknak tuah asi thei.

THLACAM DILDUHMI PAWL NGAN :

....

ZARHKHAT SUNG TUAH DINGMI

Pathian biaknak

-Bible siar

-Bulpak thlacam in Pathian thawn pawlkomnak

Bible siar

-Bible siar in thusuhnak pawl rak sang aw

Nunpi

-Tuzarh sungah na can hmanmi cu Jesuh hrangah sunglawi thei bik in hman zuam aw. Na khawm tikah Khrih dungthluntu midang pawl thawn pehtlainnak san nei zetin hman zuam aw.

-John 1:29, zohlo in ngah aw.

-Tuzarh nan group tawn khawmnak, Bible study nakah jesuh dungthluntu dang sawm in nan hnenah tel ter aw.

-Nitin te ca ngan aw; Jesuh ih leitlun mission ah na tel venak ca sung ah ngan khum aw. Cutin na tuah asile nikhat hnu nikhat Jesuh hrangah ziang na tuah timi a lo theihter ringringtu na cinken thei nak ah tla a tha.

NITIN BIBLE SIAR

A hnuilam Bible na siar phah in Pathian Thlarau in a lo zirhmi, na lungsung tapbikmi pawl ngan khum aw:

1. Luke 14:25-35
2. Luke 15:1-17
3. John 17:6-19
4. John 21:15-23
5. Ephesians 4:17-32
6. 2 Tim 2:1-13
7. 2 Tim 2:14-26

RIAN DING LE PE DINGAH

Jesuh dungthluntu pawlin Jesuh leitlun a um lai ah ruahsannak tumpi an rak nei. Thuneihnak le siangpahrang sinak thawn a din tikah dinhmuntha ngah an rak beisei. Asinan Jesuh in a dungthluntu pawl hneneh leitlun sunparnak le hlawnthil pawl thuneinak pawl ruahsan lo dingin thu a simfiang hai.

Mark 10:42-45, 42Curuangah Jesuh in an zatein a kokhawm ih, “Leitlun ram uktu pawl cu an ukmi pawl kha an lal-hnawh ih an hotu pawl tla cu thu an nei nasa ti cu nan thei. 43Asinain nannih lakah cun hi bangtuk cun a si lo pei. Nanmah lakah pakhat in a tum bik si a duh ahcun nan zate riantu a si pei. 44Nanmah lakah pakhatnak si a duhtu cun nan zate sal a si pei. 45Ziangah tile Milai Fapa hman hi rianmi si loin miriantu si dingah le mi tampi tlen dingah a nunnak pe dingin a ra a si,” tiah a ti.

Jesuh dung kan thlun rualrual in porh awknak le duhamnak kan fimkhur a tul.
Dungthluntu dang pawl parah iksiknak le zuam awknak lungput nei dingin ziang in a cang ter?

Ziangruangah midang hnakin cuangmawr deuh, tha deuh si deuh in na thei aw aw?

Midang thatnak liolio hrangah thiltha na tuah tikah ziangtin na thinlungin na ruat?

Jesuh dungthluntu nun cu hi leitlun ah hlawknak hrangah asilo. Cat lo in midang thatnak hrangah pe suak nun, riantu nun asi sawn.

BULPAK ZIRNAK

JESUH IN LEITLUN AH MISSION A NEI ASI.

Jesuh dungthluntu timi cu ziangsi umzia? Leitlunah Jesuh mission hnaturan tuan ve, rawngbawlpikan si kan ti zo. “Leitlun sualnak phurtu” (John 1:29) ah a sim zo vekin asi. Asinan thuk sinsin in ziangciah asi, Jesuh dungthluntu nun cu zoh hrih uhsi.

John tihnimtu in a rawngbawlnak neta lam lawngah Jesuh thawn an tong aw. Asinan John hnen ihsin zir dingmi kan nei asi. A hnuailam bungcang zoh uhsi.

Luke 3:15-17, 15Mi hmuahhmuah in ruahsannak an nei ciamco ih Johan cu Messiah a si pei maw, tiah an mangbangan an ruat fingfing. 16Curuangah Johan in, “Kei cun tidai in baptisma ka lo pek. Asinain mi pakhat kei hnaki tum sawn a ra ding. Kei cu a kadam hri phoih saktu ding hman ka tlak lo. Anih cun Thlarau Thianghlim le meisa in baptisma a lo pek ding. 17Fang seepnak tangta a keng ih fang pawl a seep ding. Fangngai cu a cuam sungah thatein a ret thluh ding, a sinain a hii pawl cu a mit dah lomi meisa sungah a ur ding,” tiah a ti.

Atlun bungcang ihsin John tihnimtu thu ziang kan zir thei mi a um?

A tlun bungcang ihsin Jesuh thu kan zir thei mi ziang a um?

John san lai Jews minung pawlin Messiah a ra ding tiah an rak hngak rero. Messiah cu ropi zetin a ra dingih leitlun a rundam ding tiah an rak ruat. John khalin Jesuh cu amah hnakin a tumsawn ti a thei. Messiah in Thiang Thlarau le milai pehtlaih awknak a um ding thu a sim, Thiang Thlarau baptisma a um ding thu tla a rak sim cia. Hi thu pawl hi a thupi tuk, ziangah tile Jesuh ih leitlun mission cu leitlun rundam asi ih Pathian huham cahnak le thuneihnak lawng in a ngah mi asi. A tluse zo mi leitlun cu Jesuh in a remthat theinak cu amah leitlun sersiamtu asi. Sual a ngaidam thei nak cu Pathian asi ruangah asi. Cutin asivek in Jesuh ih leitlun mission ah kan tel ve asi ahcun kannih khal a tawp tiang ziangkim tuansuak asi ding ti a fiang cia asi.

Jesuh dungthluntu si dingin Jesuh cu Pathian asi ti a hmaisai ah Jesuh ih identity kan pom hmaisak a tul asi.

Jesuh amah rori in hitin a sim:

Joh 10:27-30, 27Ka tuu pawl cun ka aw an ngai; keimah in ka thei hai ih annih in in thlun. 28An hnenah kumkhua nunnak ka pek ih ziangtik hmanah an thi nawn lo ding. Zohman in in long thei fawn lo ding. 29Anmah ka hnenih i petu ka Pa cu ziangzongza hnakin a tum ih * amah ih kut sung ihsin zohman in an long thei lo ding. 30Ka Pa le keimah cu pakhat kan si,” tiah a ti.

Jesuh cu Pathian asi ti fiangten ziangtin na sim thei ding?

Cuvek thothe in Jesuh in leitlunah a mission thu khal fiangten a sim asi:

A hnuailam bungcang pawl siar aw la Jesuh ih leitlun mission pawl na hmuhsuak mi ngan aw:

Mark 10:42-45,

Luke 4:16-21,

John 17:1-5,

Jesuh dungthluntu nun cu a hmaisai ah Jesuh ih Pathian sinak famkim ten pom, cohlan asi ih a pahnihnak cu leitlun ah Jesuh mission ah tel ve asi.

DUNGTHLUNTU CU JESUH MISSION AH AN REL VE

Jesuh dungthluntu nun cu Jesuh ih leitlun mission cu leitlun rundamtu asi tiah pom le cohlan asi.

Cucu step 1 nak lawng asi hrih. Pahnihnak cu Jesuh ih leitlun mission ah telvenak asi.

Cangvaihve tel ve a tul.

Asile ziangtin nitun nun a takram ah Jesuh leitlun mission ah kan tel ve ding? A hnuailam ah phun 4 in Jesuh in a dungthluntu pawl huham cahnak a pekdan:

1. Jesuh in dungthluntu pawl a ko
2. Jesuh in dungthluntu pawl a zirh
3. Jesuh in dungthlung pawl hmanrua tha thawn a thuum

4. Jesuh in dungthluntu pawl a thlah
A tlun pa 4 lakah khuimi bik theihfiang laihrang fiang na duhbik, ziang ruangah?

Kan feh vivo hlan ah Jesuh ih leitlun mission ah tel ve timi umzia thuk sinsin kan fiang theinak hrangah zoh hrih uhsi. Leitlun pawlkom member sinak in Jesuh dungthluntu kan si lo. Silo; Jesuh dungthluntu nun cu kan nun pumhlum amai hrangah pek, ap asi. Amah in fiang tuk in in sim.

Luke 9:23-24, 23Cule an zate hnenah, “Zokhal sisehla i thlun duh ahcun mah zawnruehna kha tlansan sehla nitinte a thinglamtah phur in i thlun seh. 24Ziangah tile zokhal siseh amah ih nunnak a hum duhtu cu a nunnak a sung ding; sikhalsehla keimah ih hrangah a nunnak a sungtu cu a nunnak a hum ngah ding.

Himi bungcang ziangtin na sang ve ding?

Taksa ruangpum in thihnak thu a simmi asilo. Dungthluntu hmaisai pawl cu Khrih dung an thlun nak ah a taktak in taksa thihnak tuartu tla an um ko. Jesuh in in zirhmi cu a dung kan thlun ding asi ahcun kanmah milai tumtah le duhnak hrangah nung nawn loin Jesuh cu kan nunnak parah thu neitu, Lal le Siangpahrang, Bawi ah kan nitin nun thuneitu ah ret asi.

Ziangtin Jesuh hnenah na nun na ap zonak a um?

A ra lai dingmi zarhkhat sungah na nunnak cu nangmah in control non loin Jesuh ih control dingin ziang step na lak hrih thei, ziangtin nun hlannak na nei thei hrih ding?

Pahnihnak ah Jesuh mission ah kan tel tikah hlawhtlinnak cu kanmai hmanrua, cahnak huham parah a hngat aw lo, amai cahnak huham parah a hngat aw mi asi. Kan kiangkapah, kanmai duhnak parah leilungpi a thum aw lo ti theih a tha. Kan tuah that le tam, taimak nak parah kan hlawhtlinnak Jesuh ih mission hnaturan hlawhtlinnak a thum aw lo, amai duhnak, huham cahnak, fimnak le hmanrua pawl parah a thum aw sawn mi asi.

Jesuh in hitin asim:

John 15:5, 5Keimah cu Sabit hri ka si ih nannih cu a hnge nan si. Zokhal ka sungah a um ih kei khal a sungih ka umcilh mi cun rah tampi a rah ding; ziangah tile keimah tel lo cun zianghman nan tuah theimi a um lo.

Na nitin nunah Jesuh Khrih na hnenah a um ruangah a huham cahnak in ziangvek hlawnak, thathnemnak na neih phah?

Jesuh Khrih dungthluntu pakhat dinhmun in na nun in ziangvek rah tha a rah suah leh ding tiah na zum?

Jesuh dungthluntu pakhat na si vekin na nun cu amah ah na ap ih na nun ziangkim parah amah thuneihnak lalnak na pek ih amai hmanrua le huham cahnak ringring na nung asi ahcun Jesuh ih leitlun mission hnaturan ah tel ve in a lo hmang ding asi.

**DUNGTHLUNTU LAMZIN
DISCIPLE YOURNEY**

SESSION 8

**DUNGTHLUNTU LAMZIN SIMFIANGNAK
DEFINING DISCIPLESHIP**

DUNGTHLUNTU LAMZIN SIMFIANGNAK DEFINING DISCIPLESHIP

Key: Jesuh dungthluntu nun cu dungthluntu nuncandan vekin nun asi.

Jesuh dungthluntu pawl cu thangso sinsin dingih kawhmi an si ih cutin midang khal thang ve dingin bawmtu ding an si. Nangmah le na group pawlin Jesuh dungthluntu nun, thangso sinsin nundan lamzin thutak nan hawlsuak ding. Dungthluntu nun hi mahte bulpak in tuah famkim theih asilo ih mibur pawlkom, kawhhran sungah telnak in a cangsuak mi asi ti theihhngilh hrimhrim hlah. Na group pawl in 2 Tim 2:1-10 sungta Bible zir phah in dungthluntu nun cu tumhrim in thansohpimi asi zia nan zir ngah ding. Nun thlengmi nunthar nunpi thei dingin dungthluntu cun zangfahnak, thinsaunak, tuarfainak nunpi in midang bawm theitu si ding a tul. Jesuh Khrih hmuihmel bang sinsin dingin tumhrim nun le felnak nunneih a tul. Lungawium zetmi cu Thuthiang sungah nun pitling kan neihnak hrang kan tulmi ziangkim a famkim theh asi. Na timtuahnak ah Bible bungcang pekmi pawl theinal zet dingin rak siar cia theu aw.

ZOHSALNAK

Ahmaisa ah kan zir zo mi cu dungthluntu nun cu Jesuh ih leitlun mission hnatuannak ah telve asitiah kan zir. Khrihfa tampi hrangah Jesuh leitlun mission hnatuannak ah tel ve ding cu an harsat zetmi asi. Cun khatlam ah Jesuh leitlun mission hnatuannak ah tel ve timi cu dungthluntu nun vekin nun khal a tel ve asi ti kan zoh tlang ding.

Na timtuah rero lai ah Paul in Timothy ca a kuat mi sung ihsin ziangtin na tawntehmi pawl thawn tahhtim in kan zoh tlang ding.

Bible siar ding le tuah dingmi pawl na rak tuah maw? Ziang na bang?

Bible na siarmi sung ihsin ziangmi na zir ngah?

Thusut duhmi na nei maw?

THLACAM

- Dungthluntu tha si dingin dungthluntu nun nunpi dingin rawngbawlnakah na tel ve thei ruangah Pathian hnenah lungawithu sim aw.
- Pathian duhnak thlun dingin na tumtah ih khrihfa zumtu mibur lakah a rualin Pathian rian tlang dingin cantha na neih ruangah lungawithu sim aw.
- Pathian in nan group member zapi ten tumtahnak hnget khoh zet nan neih ih amai duhnak ihsin nan pial tinte Thiang Thlarau in lamzin dik lo hmuhsal ringring dingin thlacam aw.

THUHMAIHRUAI

Ramsa phunphun an um ih ramsa pawlin anmah vek ramsa an sersiam thei lo; anmah vek fa an hring ciar.

Na nauhak laiah ziangmi ramsa na uar bik?

Sersiammi na lung lo lak zet na tawng dah maw?

Ramsa pawlin anmah vek fa an hrin vekin Jesuh dungthluntu pawl khalin anmah vek Jesuh dungthluntu an hring ve asi. Jesuh dungthluntu cu kawhhran member karhzai vivo dingin zumtu dungthluntu thar sersuahnak hrangah Jesuh ih leitlun mission hnaturan tuan in Jesuh hnaturanpi an si.

BIBLE THUANTHU

Kawhhran a dinthawk pek ah zumtu, Jesuh dungthluntu pawl cu ziangtin dungthluntu nun cu asi, ziang tuah ding, ti thei loin mi tampi an an-hai, an fiang lo mi pawl simfiangnak ah Thlungthar Bible cakuat pawl hi a thupi ngaingai asi. Kawhhran zumtu, dungthluntu pawl ziangtin nundan ding, ziangvek in Jesuh mission hnaturan ah tel ve ding an si tvp in zirh asi.

2 Tim. 2:1-10, 1Ka fapa, nang cu Khrih Jesuh thawn kan pehzom awknak le kan comi a zaangfahnak ruangah hngetkhoh-in um aw. 2Theihpitu tampi hmaihi ka lo zirhmi thu tla cu midang a zirhsin theitu ding rinsantlak pawl hnenah va ap aw. 3Khrih Jesuh ih rinsantlak ralkap na si bangtuk in tuar ding na covu cu tuar ve aw. 4Ralkap a tuantu cun amah hotu bawi ih duhnak kha a thlun ih ralkap a si lomi mi menmenih thuhla sungah a cokkalh aw lo. 5Tlan zuamnak sungih a telu in daan a thlun duh lo ahcun laksawng a ngah thei lo ding. 6Hnaturan khung a tuantu lothlotu in rawlkhawm caan a thlen tikah rawl thar ngahtu ding hmasa bik a si. 7Hitiih ka simmi pawl hi rak ruat tha aw; ziangah tile Bawipa in ka simmi pawl theih theinak a lo pe ding. 8Thuthang tha ka phuanmi sungih a um vekin David tesinfa, thihnak ihsin thawhter salmi Jesuh Khrih kha hngilh hlah. 9Thuthang tha ka phuan ruangah harsatnak ka tuar ih misualral bangin thir cikcinih khih ka tong. Sikhalsehla Pathian thu cu thir cikcin in khih theih a si lo. 10Curuangah Pathian ih hriilmi minung pawl in Khrih Jesuh hnenih a rami rundamnak an ngah ih kumkhua sunlawinak an conak dingah harsatnak hmuahhmuah ka tuar a si.

Khristian nunah a thupi zualmi bimi bungcang sungah ziang a um?

A tufang na nun le na dinhmun ah a tlunih Paul cakuat lak ihsin ziangbik a kaih aw in na zir ngah?

THUANTHU LAILANG

DISCIPLESHIP CU CATBANGLOIN THANSOHN RERO ASI

Discipleship tuahdan a phunphun a um thei, ziangvek cekci asi ding timi Bible ah fiangzet in a sim lo. Asinan ziangvek program hman asi khalah dungthluntu cu a thang so hrimhrim ding, nun thleng awknak, thlarau nun ah thangso hrimhrim ding asi. Khrihfa nun thansohnak le midang nun tungdingtu bawmtu tha si ding na thansohnak cu tikcu ziangmawzat a rei ding ruangah thinsau nak le zangfahnak na tul zet ding asi.

2 Tim. 2:1-2, 1Ka fapa, nang cu Khrih Jesuh thawn kan pehzom awknak le kan comi a zaangfahnak ruangah hngetkhoh-in um aw. 2Theihpitu tampi hmaihi ka lo zirhmi thu tla cu midang a zirhsin theitu ding rinsantlak pawl hnenah va ap aw.

Paul cakuat sungah discipleship cu thang sunzawm rero asinak thu ziangtin a sim?

A tlun Bible bungcang 1-10 zohsal awla Paul in thazang, rinumnak, tuarfainak thu a simmi ziangruangah a sim asi pei?

Paul cakuat sung totho ah dungthluntu nun cu catbangeloin thangso rero ding asi lawng si loin bulpak in thang silo in mibur pawlkom, kawhhran sungah thansohnak thu a sim tel asi.

Zumtu thar hrinsuahnak hrangah Jesuh dungthlun in na nitin nun thu ziangtin na sim fiang thei ding?

DUNGTHLUNTU NUN CU TUMHRIMNUN ASI

Dungthluntu nun cu tumhrimnun in tumtahnak thawn nun asi. Nauhak te pakhat cu taksa in a thanlennak hrangah rawl phunphun, tidai a ei a in a tul vekin zumtu dungthluntu khal thlarau nun thangso dingin thlarau rawl a ei ringring a tul asi. Asinan thlarau nun thangsohnak cu taksa thansohnak thawn danglamnak a um.

Taksa thansohnak hrangah ti le rawl ei cun a thangso vivo thei nan thlarau thansohnak cu a danglam. Nitin nun ah Jesuh thawn nai aw sinsin dingin nun thleng awknak nun nei dingin nun a tul asi. Midang nun tuah thatu , dungthluntu tuahtu si ding cun dikfel zetin nun a tul fawn.

Paul cakuat sung ah cang 3-7 siar sal awla, Paul in tahthimnakah a hmanmi na siar tikah dungthluntu nun na theihnak ziangtin a lo fiangter?

Ziangmi tahthimnak a hmanmi in na khrihfa nun a lailangbik, ziangruangah?

2 Tim 2:15 A hnatuan a zahpi lotu le Pathian thutak Thuthang tha cu dik zetih a simfiangtu si dingah Pathian lungkimnak ngah dingin zuam aw.

Thannak dik in thangso dingin kaihhruai awknak dik, kaihhruai awknak kan tul ringring asi. Lamzin dik ah thangso ringring dingin bawmtu kan tul asi.

2 Tim 2:14-19 siar awla dungthluntu nun thu ziang na thei fiang bet, sim aw?

Thil na ti soal mi parah ziangtin lo rem, na nun lo tuahthat na duh?

TELVE TUAHVE

A hnuailam ih hmun lawngah na pianthar pekte ihsin tuini tiang thlarau nun a lo kaihruai tu, na thansohnak hrang a lo bawmtu pawl hmin ngan aw. Jesuh thawn nan tawn awknak ding hrangah a lo hruaitu, na pianthar hnu ah zumtu nun a lo zirhtu, na thlarau nun khualtlawnpa pawl an hmin ngan aw.

...

....

Na hmin ngan awla, a hnuailam ah zovek milai pawl Jesuh hnenah na hruai tum, dungthluntu nun na zirh, na kaihhruai dingmi pawl an hmin list ngan aw.

Na hmin...

.....

.....

.....

Dungthluntu nun cu zumtu thar hringsuaktu, Jesuh hnenah mithar kaihhruaitu tuanvo neitu in ruat tikah khrihfa menmen na si loih ziangsi a danglam nak?

THLACAM DILDUHMI

...
...

ZARHKHAT SUNG CANGVAIHNAK

Pathian thangthatnak

- Bible study-Bible siar ding pawl siar theh aw
- Pathian thawn can hmangin bulpak pawlkomnak can hmang aw
- Jesuh leitlun mission ah tel ve thei dingin Pathian hnenah cantha dilin thlacam aw.

Bulpak Bible zirnak

- Bulpak zir awknak nganmi pawl siar in zir aw, thusuhnak pawl sang aw

Nunpi aw

- Jesuh dungthluntu nun cu ziang asi timi nangmai tongkam in ngan aw la, nitin te na hmuh awlnak hmun, motor sung, ihnak, tvp hmun khatkhat ah ret aw
- Kawhhran sung discipleship zirnak lam tuanvo neitu pawl sut awla, ziangtin midang thawn ruantlang ten na feh ve maw, ziang na tuah a tul timi pawl sut aw, zir aw.
- Nangmah dungthluntu nun a lo kaihhruaitu ding, lole Jesuh dungthluntu lamzin ah na hruai dingmi hmin list pawl tuah awla nitin thlacam sak aw.
- Zohlo in ngah aw: 2 Tim 2:2 2Theihpitu tampi hmaiik ka lo zirhmi thu tla cu midang a zirhsin theitu ding rinsantlak pawl hnenah va ap aw.

NITIN BIBLE SIAR AWLA THIANG THLARAU IN A LO ZIRHMI NGAN AW

1. John 13:1-20
2. Thufim 27:1-27
3. Kalatian 5:16-26
4. Kalatian 6:1-10
5. John 15:1-17
6. Tirhthlah 14:19-28
7. 2 Tim. 3:10-17

GRAPE KUNG THANGSO

Dungthluntu nun cu a thangso lo asile dung a tawlh ding, a lailak ah ding ringring timi a um thei lo tluk asi. Thlarau nun thansohnak hrangah kanmah milai hnaturan kha a thupi bik asilo ti theihngilh hrimhrim hlah; a ngaingai ahcun amah Pathian kan sungah hna a tuan mi asi sawn.

Bible siarin a hnuai ih thusuhnak pawl sang in ngan khum aw.

John 15:5-13, 5Keimah cu Sabit hri ka si ih nannih cu a hnge nan si. Zokhal ka sungah a um ih kei khal a sungih ka umcilh mi cun rah tampi a rah ding; ziangah tile keimah tel lo cun zianghman nan tuah theimi a um lo. 6Zokhal keimah sungih a um lomi cu Sabit hnge an hlon ih a carmi bangtuk a si ding. Cubangtuk hnge pawl cu an khawm ih meisa sungah an hlon ih a kang theh. 7Keimah sungah nan um ih ka thu hi nan sungih a um ve ahcun nan duhmi pohpoh nan dil tikah nan ngah ding. 8Rah tampi nan rahnak hin ka Pa ih sunlawinak nan langter ih cuti cun ka dungthluntu nan can theinak a si. 9Ka Pa ih i duhdawt vekin nannih khal ka lo duhdawt ve; ka duhdawtnak sungah um ringring uh. 10Ka Pa ih thukham ka thlun ih cuti cun amah ih duhdawtnak sungih ka um vekin ka thukham nan thlun a si ahcun ka duhdawtnak sungah nan um ve ding. 11Ka lungawinak cu nan sungah a um ih nan lungawinak cu lungawi famkim a sinak dingah hi thu hi ka lo sim. 12Ka thukham cu hihi a si: Keimah ih ka lo duhdawt vek hin nannih khal pakhat le pakhat duhdaw aw ve uh! 13Mi pakhat in a rualpi pawl hrangah duhdawtnak tum bik a neihmi cu an hrangih a nunnak pek hi a si. 14Cule ka thupekmi nan tuah ahcun ka rualpi nan si. 15Nannih tla cu hnen-um tiah ka lo ti nawn lo, ziangah tile hnen-um cun a bawipa ih tuahmi kha a thei lo. ‘Hnen-um,’ ti nawn loin ‘Rualpi,’ tiah ka lo ko: ziangah tile ka Pa hnen ihsin ka theihmi hmuahhmuah cu ka lo sim theh zo a si.

Na thlarau nun thansohnak hrangah ziangcin nangmai tuanvo asi tiah na ruat?

Nangmai kutsungah na ret mi thlah tahratin Grape kung pehzawm in Pathian kut ah zaahza hngat thei dingin ziang na tuah a tul?

BUKLPAK ZIRNAK

DUNGTHLUNTU NUNAH THIL PALI

Jesuh Khrih dungthluntu si in pitling tiang thangso dingah le midang bawmtu tha si dingah an tuahmi a bang rep theh asi.

Ziang bet duh rem duh, simduh na nei maw, a tlunah simmi thu-dungthluntu pitling si thei dingin le midang dungthluntu ah tuah thei dingin?

Nangmai zumnak nunah zo ih dung na thlun ih zo pawl dungthluntu ah na tuah, na hmuhtawnmi pawl sim aw?

Jesuh dungthlungtu Jesuh thulung na si duh vekin na nitin dungthluntu nunah a hnuailam thil pali pawl hngilh hlah.

1. Dungthluntu nun cu thang rero mi asi.

Khrihfa nun cu hmailam pan in a feh rero mi asi; tohmun le dinhmun in Jesuh dungthlun a theih lo. Cutin kan feh rualrual tawp ti nei loin nun thleng awk rero asi. Umhmun ah nun thleng awk a theih lo.

Paul in voi tampi khrihstian nun thleng awknak thu a sim. Pakhat cu a hnuailam Bible sungah kan hmu.

2 Kor. 3:18, Kannih tla cu kan zatein kan hmai puanih tuammi kan si nawn lo ruangah Bawipa ih sunlawinak hi thlalang bangun a langtertu kan si. Cuih sunlawinak cu Thlarau a si mi Bawipa hnen ihsin a rat ruangah kan nunnak hi sunglawi sinsin in le Amah bang sinsin in in thleng vivo a si.

Jesuh dung na thlun thawk ihsin ziangtivek in na nun a thleng aw?

Hmailam ah ziangvekin na nun na thleng aw lai ding, Jesuh in a lo thleng lai ding tiah ruahsannak na nei?

Roman 12:1-2 1Cutu a si ruangah ka u le ka nau tla, a tam zetmi Pathian ih in zaangfahnak ruangah hin nan ruangpumpi cu a thiangmi le cohlan tlak raithawinak bangtuk in Pathian hnenah pe uh, tiah ka lo dil. Cumi cu Pathian hnenih nan pek dingmi biaknak taktak cu a si. 2Hi khawvel daanah hin kop nawn hlah uh; cuhnak in nan thinlung kha tharthawh tahratin thleng aw sawn uh. Cutiin Pathian ih duhnak cu nan thei ding ih Pathian ih hmaiah ziangso a tha, ziangso a lungawi mi a si tile ziangso a famkimmi a si ti nan thei ding.

Himi bungcang in thlarau nun thleng awknak ziangvek a lo zirh?

2. Dungthluntu nun cu dingfelnun asi.

Jesuh dungthluntu nun cu khatlam zawngin sim asile nun awlsam asi: nitin Jesuh dungthlun in tuahter in duh mi in fialmi tuah asi. Cutin Thiang Thlarau cu kan sungah hnatuan dingin lalnak kan pek ih kan thinlung in tuaithar sal in Jesuh hmuihmel bang sinsin dingin nitin in sersiamthar sal ringring asi. (John 15:5-13 zoh).

Khatlam zawngin kan sim asile Jesuh dungthluntu nun cu nitin dingfel zetin nun a tul asi. Ziangah tile kan lei tisa cun Pathian thutak lamzin ihsin a pial cia mi asi ih Pathian hnatuan dokalh in tisa cun a hiar ringring ruangah nitin dingfel zetin nitin nun a tul asi. A hnuailam ah Paul in zumtu Jesuh dungthluntu pawl hnenah a ngan:

1 Tim 4:7-10, 7Asinain Pathian thu thawn pehtlaihna zianghman a nei lomi simrel tlak lo thuanthu menmen pawl cu hrial aw. Pathian duhzawng ih nung dingin zirh-aw ringring aw. 8Taksa harhdamnak ih zirmi cu man a nei ve ko nain thlarau harhdamnak hrangih zirmi cu ziangtinkim in man a nei. Ziangah tile atu-ah siseh, hmailam hrang khalah siseh, in tiamkammi cu nunnak a si. 9Hiti ka simmi hi a dikmi tong a si ih zumtlak le cotlak an si. 10Rethei zet le

harsa zetin hna kan tuan; ziangah tile kumkhua in a nungmi Pathian parah kan ruahsannak kan bun. Cuih Pathian cu mi hmuahhmuah Rundamtu a si ih amah a zumtu pawl hrangah a si hleice.

Jesuh dung na thlunnak ah ziangmi in dingfel (disciplined) nun nei dingin a lo bawm?

Na thlarau nun dingfelnak (discipline) a lo hnaihok, a lo khamtu ziang a um theu?

3. Dungthluntu nun cu midang thawn pehtlaihnan asi.

Jesuh dungthluntu pawlin dungthluntu nun cu bulpak nun asi tiah an ruat theu. Tuisun society tla mahte nun (individual society) ih nunnak san asivekin Jesuh dung kan thlunnak khalah mahte bulpak zalen nun ih ziangkim tuah theh thei kan tum theu.

Bible in in zirhmi cu a danglam asi. Thlarau lam nun thansohnak cu kawhhran mibur lakah cangvaihnan in thansoh asi tiah Thuthang in a tlangpi thu in in zirh asi.

Tirh 2:41-47, 41Piter ih simmi cu mi tampi in an zum ih baptisma an lak; cuih ni ni khatah an pawl cu mi thawngthum tlukin an karh. 42An zatein tirhthlah pawl hnen ihsin an zir ih, tirawl ei tlaangnak le thlacam tlaangnak thawn pawlkomnak an nei ringring. 43Tirhthlah pawl in khuaruahharza le hmuhsaknak mak zetzet thil tampi an tuah ruangah mi hmuahhmuah ih thinlung sungah tihnak le hmaizahnak a khat. 44Zumtu pawl hmuahhmuah cu an pawlkom aw ih thurual zetin an thil neihmi tla an tawm aw. 45An thilri neihmi le an hlawnthil pawl tla an zuar ih an ngahmi tangka cu an tulinak vekin an zem aw. 46Ni khat hnu ni khat Biakinn sungah an tongkhawm aw; an inn ah rawl an tawm aw ih tangdornak le lungawi thanuam in an ei tlang. 47Pathian an thangthat ih mi hmuahhmuah hnenin mithmai tha an ngah. Cule nitinte in Bawipa in an pawlah rundannak ngaktu a bet vivo.

Kawhhran hmaisai zumtu pawl nundan na zoh tikah ziangmi bik in nan nun a lo tham bik?

Na umnak kawhhran in Jesuh dungthluntu tha si in na thansohnak hrang ziang a lo bawm?

Kawhhran member kan sinak cu kaphnih asi; kawhhran in thlarau nun thansohnak hrang in bawm vekin kawhhran sungah dungthluntu tha an karhzai vivo nak ding hrangah tuanvo kan nei ve asi.

Tirh 8:29-31, 29Thlarau Thianghlim in Filip hnenah, “Feh awla khi rangleng khi va naih aw,” tiah a ti. 30Filip cun a hei dawi ih profet Isaiah cabu a siar ti a thei. Filip in, “Na siarmi hi a tican na thei maw?” tiah a sut. 31Cupa cun, “Zotal ih in simfiang lo ahcun ziangtinso ka theih thei ding?” tiah a sawn. Cule Filip cu a rangleng parah to ve dingin a sawm. 32A siarmi Ca Thianghlim cu a tanglam vek hin a si:

Tu naite ah Jesuh dungthluntu tha si dingin thlarua nun thangso dingin zo a um, lole Jesuh nei lo Jesuh hnenah na hruaimi zo pawl an si? Ziangtin na kaihhruai, dungthluntu ah na tuah, an hmin ngan aw:

4. Dungthluntu nun cu midang nun zohthim in nun asi.

Jesuh dungthluntu nun cu midang nun bawmtu, Jesuh Khrih ah nun pitling an neih theinak dingin lamzin hmuhtu bawmtu nun asi. Asile nitin nun ah “midang bawmtu nun” cu ziangvek cekci asi? Asile hmailam saupi hrangah midang thlarau nun tundin nak ih tumtah cu ziang asi?

A tlunih thusuhnak pahnih na sannak ngan aw:

Pakhatkhat a dik bik timi a um thei lo. Thlarau laksawng co mi ciar vekin zumtu dang thlarau nun tuahtha tu dingah hman awk ding mi asi. Asinan an zaten an tuahmi bangrep mi pakhat cu an “tikcu can an pe” asi. Hlaraan ihsin midang nun kan tuah tha thei lo, Jesuh Khrih ah an nun tuahthat kan duh asi ahcun anmah thawn naihnam zetin kan pehtlah awk a tul asi.

Na umnak hmun ihsin a naibik milai pawl, zo pawl nun tuah tha dingin na tikcuan le hgmanrua pawl na pek duh?

A hmaisabik dungthluntu nun ih hnatuan cu midang kha Jesuh dungthluntu ah va tuah sin ding asi. Paul in 2 Tim 2 sungah hitin asim, “Theihpitu tampi hmaiik ka lo zirhmi thu tla cu midang a zirhsin theitu ding rinsantlak pawl hnenah va ap aw.”

Cing ringring aw, dungthluntu nun cu midang Jesuh dungthluntu ah va tuah sin asi. Tumtahmi cu dungthluntu ah kan tuahmi in midang kha Jesuh dungthluntu ah an va tuah sawng sin ding. Cutin thlarau lamah pu/pi si thei ding in tumtah mi asi. Cutin leitlun pumpuluk tiang in a karhzai sinsin dingih miphun hmuahhmuah Jesuh dungthluntu si ter dingmi tuanvo kan neih mi asi.

**DUNGTHLUNTU LAMZIN
DISCIPLE YOURNEY**

SESSION 9

**JESUH IN A DUNGTHLUNTU A KO
(JESUS CALLS HIS DISCIPLES)**

JESUH IN A DUNGTHLUNTU A KO (JESUS CALLS HIS DISCIPLES)

Key: Jesuh in kan umnak hmun ih ta in hawlsuak ih a dung kan thlun vekin kan nun in thleng asi.

Jesuh in a dungthluntu pawl a ko. Amah in a hawl ih a dungthluntu dingah a hruai hai ih leitlun ah a rawngbawlnak mission hnaturan ah tel ve dingin a sawm. Tuini tiang Jesuh in cucu a tuah rero lai mi asi.

Himi zirnak sungah nangmah le na group pawlin Jesuh in a dungthluntu pawl a kawhnak (John 1:43-51) ihsin nan zir ding, Jesuh leitlun a um lai ah a dungthluntu pawl a kawh vekin tuini khalah dungthluntu pawl a ko. Tuisan khalah Jesuh kawhnak aw kan san tikah nun thleng awknak kan nei asi. Nangmai nunah Jesuh in a lo kawhnak pawl na group hnenah simsawng ve aw. Jesuh dungthluntu dinhmun in nun thleng awknak nan tawntehmi pawl khat le khat sim aw ciar uh. Bible zirnak le group cangvaihnak nan tuah rualrual in Bible bungcang pekmi pawl thei fiang zet dingin zuam aw.

ZOHSALNAK

Ahmaisa ah Jesuh dungthluntu cu tawp ti um loin a thang rero mi, nun thleng awknak asi ih acuih nun thleng awknak lamzin ah midang bawm in Jesuh dungthluntu siter vivo dingin asi ti kan zir zo. Thlarau lam thansohnak cu Jesuh bang sinsin in thansoh nak asi ih cumi cu mahte lawng in kawhhran mibur lak tel loin than theih asilo. Midang nun zohthim, zohthim tlak nun mah in nunpi nak in khat le khat thansohnak ah sawmdawl awk tawnnak asi.

Jesuh in ziangtin a dungthluntu pawl a ko ti kan zoh hlanah a hnuailam thusuhnak sang aw:

Tuzarh hrang mahte tuah dingmi pawl ziang na rak tuah, ziang na bang?

Bible na siar phah in ziang na zir thar mi a um?

Thusut duhmi ziang na nei?

THLACAM

Tuzarh hrang zirnak pawl hi thlacam in Pathian thawn pehzawm awknak in thok aw. A hnuailam vek in thlacam na thok thei:

- Jesuh leitlun mission hnatuannakah tel ve dingin siar tel na si ruangah Pathian thangthat in lungawithu sim aw.
- Jesuh in a dungthluntu ah a lo ko, na tawntehmi parah lungawithu sim aw.
- Jesuh dungthluntu ah kawhmi thu na zir rualrual in Pathian thuthuk theihtheinak Pathian hnenah van fimnak dil aw.

THUHMAIHRUAI

America ramah ralkap hrangah mithar an lak tikah Uncle Sam ih tongkam “KAN LO TUL” timi an hmang theu.

Na nunnak ah mibur cangvaihnak ah phur zetin na tel dahmi a um maw, ziangtin?

Zaingthu pakhatkhat ruangah tumtah pakhatkhat hrangah mibur cangvaihnak ah tel dingin sawm awknak mi neh thei zet ziangvek na tawntehmi hmuh mi a um dah?

Jesuh cu leitlunah taksa in a um lai ah dungthluntu pawl a ko. Asinan leitlun ralkap pawl ralkap lakdan thawn cu a bang aw lo. Tuini khalah Jesuh in a dungthluntu ding pawl a ko rero lai asi.

Jesuh dungthluntu si dingin a hmaisai bik cu kanmah in Jesuh kawhnak aw kan sannak asi.

BIBLE THUANTHU

Jesuh leitlun rawngbawlnak ah a cancan cu tumhrim in dungthluntu pawl a kiangah a finkhawm theu. Cutin mihrekkhat pawl a ko ih a rawngbawlnak leitlun mission ah tel ve dingin a hruai hai. A hnuailam ah Jesuh in dungthluntu pahnih a kawhnak kan hmu thei.

John 1:43-51.43A thaisun ah Jesuh cu Galilee feh a tum. Filip kha a hmu ih a hnenah, “I thlun aw,” tiah a ti. 44Filip cu Andru le Piter umnak Bethsaida khua mi a si. a si. 45Filip in Nathanael a tong ih a hnenah, “Moses in Daan cabu sungah a thuhla a nganmi le profet pawl khal in a thuhla an ngan mipa kha kan tong zo. Amah cu Josef fapa Jesuh, Nazareth khuami a si,” tiah a ti. 46Nathanael in, “Nazareth khua in thil tha a suak thei pei maw?” tiah a ti. Filip in, “Ra zohhnik awla!” tiah a ti. 47Jesuh in Nathanael a rat kha a hmuh tikah, “Israel mi taktak hi zohhnik uh! A thinlung ah zianghman hrawhhrawnak a um lo,” tiah a ti. 48Nathanael in, “Ziangtin so i theih?” tiah a ti. Jesuh in, “Filip ih a lo kawh hlan theipi kung hnuai ih na to lai ah khan ka lo hmu zo,” tiah a ti. 49Nathanael in, “Sayapa, nang cu Pathian Fapa na si! Israel Siangpahrang na si!” tiah a ti. 50Jesuh in, “Theipi kung hnuai ih na to lai ka lo hmu, ka ti ruangah i zum a si maw? Hi hnakih thil maksak tampi na hmu lai ding!” tiah a ti. 51Cule an hnenah, “Thungai in ka lo sim: vancung khi a ong aw ding ih Milai Fapa parah hin Pathian ih vancungmi an tum le an kai kha nan hmu ding,” tiah a ti.

A tlunih bungcang sungah Jesuh dungthluntu thu ziang in zirh?

Nathanael ziangtin Jesuh dungthluntu ah a cang, a dawtdawt in sim aw?

BIBLE THUAN THU LAILANG**DUNGTHLUNTU LE JESUH TAWN AWKNAK**

Jesuh dungthluntu si dingah a hmaisai bik cu Jesuh thawn tawn awknak asi. Nulepa hnen ihsin Jesuh dungthluntu sinak ro co zohman an um lo. Kawhhran member sinak, kawhhran program ah taimak suahnak, biaknak lam zuamnak in Jesuh dungthluntu si a theih lo.

Amah Jesuh thawn tawn awknak in nun thlengnak a suahter ih cutin a dungthluntu kan si theinak asi.

Jesuh thawn nan tawn awknak ihsin na nun ziangtin a thleng aw?

John 1:43-52 sungah kan hmuh vekin Philip le Nathanael in Jesuh an tawndan, dungthluntu an can dan a bang aw lo. Nahtanael cun thukthun lawk zetin Philip a rak sang nan Jesuh thawn an tawn awk hnu ah Jesuh cu “Pathian Fapa na si” tiah a co hlang.

Bulpak pakhat ciar in Jesuh thawn kan tawn awkdan ah a bang awk theh thei lo, cutin khatin asi ding timi sim theih asilo. A thupi mi Jesuh dungthluntu pawl cun Jesuh kawhnak aw an sang ciar mi ah a bang awknak asi.

Rundamnak hrangah ziangvek a dawtdawt in na kalkan a tul timi an lo zirh dah?**Rundamnak na co ngah hnu ah ziangvek pawlin dung a thlun tiah an lo zirh dah?****DUNGTHLUNTU PAWL CU JESUH IN AN NUN A THLENG MI AN SI.**

Jesuh dungthluntu kan si thei nak cu Jesuh thawn tawn awknak in a kawhnak aw sannak asi. Philip le Nathanael khal cuvek in Jesuh dungthluntu an si theinak asi.

Philip nunnah kan zoh asile Jesuh thawn an tawn awk veten a nun a thleng aw ih amah in a congah mi cu midang in co ve dingin midang hnenah a simsin-evangelist ah coplehcilh in a cang tiah simtheih asi.

Na theihual pang lo ding a thupi: Jesuh thu midang hnenah simsin dingin thlarau pitling nun na neih hmaisak a tul lo. Mi hrek cu Jesuh thu midang hnenah simsawng dingin an ning a zak, an nun danglamnak langhngan zetin a lang ding an duh lo theu. Midang zumnak le tikcu hnaihnoktu si an duh lo theu.

Thudik cu hitin asi: kan nun danglamtertu nun thleng awknak tawntehmi kan neih tikah midang hnenah simsawng loin mahte umpi in thuh ding cu thilcang thei lo tluk asi. Thildang lam, nun thleng awknak, lungawinak thar kan tawn tikah milai mizia cun um thei loin midang simsin duhnak a nei ringring asi.

Na duhdawtmi le ngaihvenmi midang hnenah Jesuh rundamnak thu simsin ding na ruah tikah ziangtin na thinlung a um?

Nathanael tla a hmaisai ahcun a ringhlel nan Jesuh hmaitawn in a tawn tikah Jesuh kawhnak aw a ngai ih a cohlang. Cuntin Jesuh dungthlun in Jesuh a biak tikah amizia cu hmakhat te ah a thleng aw lohli sawn asi. Cucu Nathanael ih nuncan ziaza thleng awknak hram thok asi. Philip le

Nathanel cu Jesuh dung an thlunih a thihnak le a thawhsalnak tiang dungthluntu ah an cang lan ta. Kawhhran thuanthu ah nganmi vek asile an pahnih in Jesuh rundamnak Thuthangtha simnak ah thah tiang an tuar tiah theih asi.

Na sunglam thlarau nun ziangvek ziangtin thleng awknak na tawng?

TELVE IN TUAH AW

Jesuh thawn nan tawn awknak, na piantharnak thu ihsin midang hnenah Jesuh thu na sim thawk thei asi. Testimony mawi zetzet, thusim nal zet na si a tul lo. Nangmai hmuhtawnmi, na nun thleng awknak thu kha hmang in Jesuh thu midang hnenah rundamnak a tultu pawl hnenah na sim thei asi.

A hnuailam ah Jesuh thawn nan tawn awknak, na piantharnak thu tawite nngan aw a sim dan ding practice aw. Cui hnu ah mi pakhatkhat hnenah simsin ding.

A hmaisabik Jesuh thawn nan tawn awknak thu ngan:

..

...

Ziangtin na nun a lo thleng?

...

THLACAM DIL DUHMI NGAN

ZARHKHAT SUNG CANGVAIHNAK

Pathian biaknak

- Bible siar ding pawl siar aw
- Pathian thawn bulpak can hmang aw
- Nitin thlacam hngilh lo ten thlacam aw

Bulpak zirnak

- Jesuh thawn bulpak tawn awknak pawl ca siar in na tawntehmi pawl ca in ngan khum aw

Nunpi aw

-Tuzarh sungah na testimony zumlotu Jesuh nei hrih lo hnenah sim aw. Na tawntehmi pawl kha theih awlsam bik dingin sim zuam aw.

-Nitin nunah Jesuh thawn tong aw in pawlkomnak neih zuam aw.

-Mark 2:17 zoh lo in ngah dingin siar aw. Mark 2:17Cuih thu cu Jesuh in a thei ih, “Mi harhdam pawl in sibawi an hai lo; a na mi lawng in an hai a si. Miding pawl ko dingah ka ra lo, misual pawl ko dingah ka ra a si,” tiah a ti.

-Jesuh thawn a hmaisabik nan tawn awknak ca sungah ngan khum aw. Jesuh dungthluntu si dingin na tumtah felnak thu ngan aw, ziangtin Jesuh in na nun a lo thleng nak pawl ngan aw.

BIBLE SIAR DING

A hnuailam Bible bungcang pawl nitin siar awla Thiang Thlarau in a lo zirh thar mi pawl ngan khum aw.

1. MATHAI 5:1-16
2. LUKE 5:1-11
3. ROMAN 5:1-21
4. ROMAN 12:1-21
5. EPHESIANS 4:17-32
6. KOLOSANS 3:1-17
7. THUPUAN 21:1-27

JESUI' THLACAM

John 17 nakah Jesuh in thla a cammi pawl in zirh. Jesuh in a dungthluntu pawl hrangah thla a cam ih a thlacammi pawl cu nang le kei hrang khalah asi.

A thlacam hmaisai cu:

John 17:20-21, 20“Anmah hrang lawngah thla ka cam a si lo; an thusimmi a thei ih keimah i zumtu ding pawl hrang khalah thla ka cam. 21An zatein pakhat an si theinak dingah thla ka cam. Ka Pa, nangmah cu ka sungah na um ih kei khal na sungih ka um vekin annih khal kan sungah um ve hram haiseh. Nangmah in i thlah hi leilung in an zum theinak dingah annih cu pakhat ah cang hram haiseh.

Jesuh in kross parah na hrang thihnak a tuar hlanah na hrangah thla a lo camsak ti na theih tikah ziangtin na ruat?

Jesuh thlacamnak a pum in siar awla. Ziangmi bungcang in na thinlung a lo lak bik, ziangruangah?

Jesuh thlacamnak pawl siar nawn sal awla, rei lo te ciamciam in ruat awla, Pathian aw na theih mi, na thinlung sung muril ah a lo sim mi ziang a um, ngan aw?

BULPAK ZIRNAK

DUNGTHLUNTU PAWL CU JESUH THAWN BULPAK TAWN AWKNAK AN NEI

Jesuh leitlunah taksa in a um lai ah Philip le Nathanael lawng si lo, a dungthluntu pawl a ko mi kan hmu Matt. 10:2-4; Luke 8:1-3), Peter, James, John, Mathew le Mary Magdalene, Joana, Susanna, pawl tla a kawhna kan hmu thei.

Jesuh cu taksa in leitlun ah a um nawn lo hnu khal Paul a kawhna tla kan hmu thei.

Tirhthlah 9:1-6, 1Cuih caan hrawngah Saul cun Bawipa ih dungthlun pawl kha that dingah a hringhro rero. Puithiam saang hnenah a va feh ih, 2Damaskas khuaih sinakok inn uktu pawl in amah kha an rak theihnak dingah ca ken ding a va dil. A tumtahmi cu cutawkah Bawipa ih Lamzin a thluntu an um a sile nunau mipa tilo kai tahratin Jerusalem ih hruai ding kha a si. 3Saul cu Damaskas khua a thlen zikah hmakhatte ah van ihsin tleunak in a kimvelin a run tlet. 4Saul cu a tlu ih, “Saul, Saul, ziangah so i hrem?” tiah aw pakhat a thei. 5Saul in, “Bawipa, zoso na si?” tiah a sut. Cuih aw cun, “Na hrem reromi Jesuh ka si. 6Tho awla khawpi sungah va feh aw; na tuah tulmi kha an lo sim ding,” tiah a ti.

Saul timi pa cu a leitlun nunah tumtah hngetkhoh thawn a rak nungmi, a hnatuan ah pumpe aw tuk mi a rak si ih Jesuh dungthluntu pawl siatsuah ding khopin pumpe aw mi a rak si. Asinan Jesuh in a ko, Jesuh thawn an tawn awk tikah Jesuh kawhna aw a sang ih a hmin le a nun pumhlum a thleng aw asi. Paul ih thuanthu ihsin Jesuh dungthlun dingin sir awknak a tulzia in zirh asi.

Sir awknak ti tongkam na theih ve ten na thinlung sungah ziangvek a lang ih ziangtin na ruat?

Sir awknak timi cu thleng awknak, ruahna thleng in lamzin thleng ti thawn khal a bang aw.

Jesuh ih in kawh tikah kan sir awk ih kan nun thleng awk dingin in ko asi.

Mathai 4:17, Cuih tikcu ihsin Jesuh in, “Nan soal sir uh, ziangah tile vancung Uknak a nai zo,” tiah thusim hram a thok.

Mark 1:14-15, Johan kha thawngih an thlak hnuah Jesuh cu Galilee ah a feh ih Pathian ih Thuthang tha a sim. “Tikcu a kim zo ih Pathian Uknak a nai zo. Nan soalna pawl sir uhla Thuthang tha cu zum uh,” tiah a ti.

Jesuh dungthlun dingin na timtuah tikah ziangvek sir awknak nun na nei?

Sir awknak cu Jesuh dungthluntu si dingin a lotheihlo in a tulmi asi. Voikhat sir awknak ah a cem lo ih nitin nunah soal ihsin zir aw, kirsal in Jesuh dung kan thlun ding mi asi.

A tu ih na dinhmun ah na nun na cek awk sal tikah ziangvek zawn ah na soal na sir ih Jesuh dung na thlun a tul?

Na nitin thlarau nun ah sir awknak lungput nei in soal ihsin kirsal ringring in Jesuh dungthluntu tha si thei dingin ziang na tuah a tul?

DUNGTHLUNTU PAWL CU JESUH IN A THLENGMI AN SI

Paul in Jesuh dungthlun dingin a thinlung thuthluknak a tuah mi cu Jesuh ih kawhna aw a fiang awk nak in asi. A hlanah Jesuh dungthluntu pawl thattu dinhmun ihsin Jesuh dungthlun ah a cang. A nun thleng awk cu a hnuailam ih Paul cakuatmi ah a fiang zet.

2 Korin 5:17, Zozo khal Khrih thawn an pehzom awk tikah cun mithar a si; a nun hlun cu a cem ih nun thar a thok zo.

Nangmai nun ah na nunhlun ziangvek pawl an hlo zo?

Jesuh na tawn hnu ah ziangvek nunthar na nunpi?

Nun thleng awknak in kan tawntehmi cu thiamcoternak asi. Jesuh thawn kan tawn awk tikah soal ngaidamnak kan co. Cutin Pathian hmaiah thiamco ter kan si.

Roman 5:9-10, A thisen thawng in kannih cu Pathian thawn kan rem awk zo ruangah ziangtlukinso Pathian thinhengnak ihsin Amah in in runsuak sinsin ding! 10Hlanlaih cun Pathian ih ral kan rak si, sikhalsehla atu cu a Fapa thihnak ruangah a rualpi ah in tuah zo. Pathian ih rualpi kan si zo ruangah Khrih ih nunnak in ziangtlukin so in runsuak sinsin ding.

A hnuailam Bible bungcang pawl siar awla, thiamcoter na sinak thu na fiangmi pawl ngan aw:

Hebru 9:19-22

Roman 5:6-9

Galatian 2:15-16

Thiamcoternak cu Jesuh thawn tawn awk tikah a dungthlun dingin thutiam aw in nun thleng awknak in kan co mi asi. Asinan cuzat lawng asi hrih lo. Nitin ten kan nun in thleng, in tuaithar sal ih nikhat hnu nikhat amah bang sinsin dingin in thleng rero asi. Cutin catbangloin kan sungah Jesuh hna a tuan sunzawm rero mi cu thianternak (sanctification) tiah kawh asi.

2 Korin. 3:18, Kannih tla cu kan zatein kan hmai puanih tuammi kan si nawn lo ruangah Bawipa ih sunlawinak hi thlalang bangin a langtertu kan si. Cuih sunlawinak cu Thlarau a si mi Bawipa hnen ihsin a rat ruangah kan nunnak hi sunglawi sinsin in le Amah bang sinsin in in thleng vivo a si.

Jesuh dungthluntu pakhat na sivekin cangbanglo in thlarau nun thleng awknak danglamnak na nei maw? Ziangvek cekci asi, sim aw.

Thuk sinsin thlarau nun thleng awknak nun na neih thei nak ding hrangah ziangvek pawl in a dal?

**DUNGTHLUNTU LAMZIN
DISCIPLE YOURNEY**

SESSION 10

**JESUH IN A DUNGTHLUNTU A ZIRH
(JESUS TEACHES HIS DISCIPLES)**

JESUH IN A DUNGTHLUNTU A ZIRH (JESUS TEACHES HIS DISCIPLES)

Key: Dungthluntu pawl cu Jesuh thu zir ding in le Jesuh hnen ihsin zir ding in kawh an si.

Dungthluntu pawl cu zir duhnak lungput thawm Jesuh dung an thlun. Jesuh hnen ihsin an zirmi pawl cu atakin nunpinak in rah tapi an rahsuak thei asi. Atu zarh sung zirnak ah Jesuh ih tlangpar zirhnak thu (Mathai 5;1-2, 7:24-29) sung ihsin kan zir ding. Jesuh cu zirhtu lakah a ropi bik asi ih a dungthluntu hrangah Jesuh hnen ihsin zir ding cu alotheihlo in a tulmi asi.

ZOHSALNAK

Jesuh in ziangtin a dungthluntu pawl a ko ih a kawhnak aw cohlang in a dungthluntu pawl nun a thleng ti kan zir zo. A dungthluntu pawl nun a thlengnak cu voikhat te ah a kumkhua hrangin thleng theh asilo ih amah thlun ding in tiamkam aw in pumpeknak nun thawm a thluntu pawl nun cu a thleng ih a sersiamthar, an nun a tuaithar sal. Cutin thleng awknak cu Jesuh in a zirh, a hruai, an nun nikhat hnu nikhat a thleng aw vivo mi asi.

Tuzarh sung zir ding siar ding pawl lakah ziangtiang na rak tuah ziang na bang?

**Bible siar ding mi na siarmi lak ihsin ziangmi na zir ngah?
Thu sut duh mi na nei maw?**

THLACAM

A hnuailam vekin thlacamnak in Pathian thawm pehzawm awknak in zirnak pehzawm uhsi.

- Pathian in a uknak sungah a lo kawh ruangah siseh catbanglo in sunzawm in na thlarau nun a lo thleng nak ah lungawithu sim hmajsa aw.
- Pathian thutak theihtheinak fimnak dil aw. Pathian thu na zirmi pawl thlarau thuthuk theithe ding in fimnak dil aw.
- Pathian Thlarau cu nangmah zirhtu ah cohlang awla a lo zirhmi pawl nunpi ding in thinlung timtuah cia in tiamkam aw aw.

THUHMAIHRUAI

“Thillem” timi tongkam na theih veten na thinlung ah ziang na ruat? A lem cu a tak thawm a bang aw zet nan a tak vekin man a nei lo ih a thatdan khal a tak a bang lo mi asi. Cuvek in biaknak lam khalah Khrih dungthluntu lem an um theu asi. Asile a lem le a tak thleidan theinak ding lamzin umsun cu Jesuh Khrih ih zirhnak thluntu sinak in asi.

Jesuh dungthluntu pawl tuahmi le nundan ziangvek pawl hi a lem in cawn awlbik?

Pathian uknak sungah a lem in cangvaihnak hi a tihnung?

A tak asimi Jesuh Khrih ih zirhnak pawl tuitumah kan zir dingih dungthluntu dik pawlih nundan in kan nun thei nak dingah titak zetin zir uhsi.

BIBLE THUANTHU

Mathai bung 5-7, Jesuh ih zirnak, tlangpar zirhnak ti ah kawhmi hi a hminthangbik zirhnak, zirhtu ropi bik ih zirhnak asi. Cumilakah cang khaikhawmtu a hnuaiah zoh uhsi:

Mathai 5:1-2, 1Jesuh in mipi a hmuh tikah tlangpar ah a hung kai; cutawkah cun a to ih a dungthluntu pawl a hnenah an ra. 2Cule a kam a kau ih hiti in thu a zirh:

Mathai 7:24-29, 24“Curuangah hi ka tongmi a thei ih a thluntu cu lungpi parih inn saktu mifim pa bangtuk a si. 25Ruah napi in a sur, ti a lian ih thlipi in a nuai ciamco nain lungpi parih sakmi inn a si ruangah a sawn lo. 26“Sikhalsehla hi ka tongmi a thei nain a thlun lotu cu vunnel parih inn saktu mi-aa bangtuk a si. 27Ruah napi in a sur, ti a lian ih thlipi in a nuai tikah a sawn mai; a tlu ih a siatbal thluh a si,” tiah a ti. 28Jesuh in hi thu hmuahhmuah a sim theh tikah miseenpi pawl cu a thuzirhmi kha an mang a bang ngaingai. 29Anih cun Daanthiam pawl vek si loin thunei zetin thu a zirh a si.

Zo in ziang a zirhmi na theih tikah na mangbang tertu, na thinlung la zettu a um dah maw, ziangthu zo in a zirh tikah?

Atlunih Bible bungcang thu muril ziangtin atawinak in sim hnik aw?

A tlun bungcang pahnih kan zoh asile Jesuh hnen ihsin zir tengteng a tul ih zir ngahmi pawl nunpi tengteng a tul ti alang.

BIBLE THUANTHU LAILANG

DUNGTHLUNTU PAWLIN ZIR DUHNAK LUNGPUT AN NUNPI

Jesuh in thu a zirh tikah a zirhmi pawlin an rak theihcia mi nunphung pawl hmangin tleng awknak a tulzia pawl a zirh ih a thar asimi lamzin thar ah a zirhmi pawl a hruai theu. A zirhmi pawl thu hnuaiah tuhlut awk nun a tulzia fiang ten a zirh theu fawn. Mi zapi tuahmi tuah ve menmen si loin Jesuh ih zirhmi ah an nun pumhlum le lamzin hngat aw in thu awi nun nei dingin a zirh hai.

Mathai 5:1-12, siar awla khuimi zirhnak in milai nunphung dan in an khawruahdan pawl a kalh in alinglet bik ti ah na ruat? Ziangruangah?

A hnuailam canghnh siar hrih uhsi.

Mathai 5:1-2, Mathai 5:1-2, 1Jesuh in mipi a hmuh tikah tlangpar ah a hung kai; cutawkah cun a to ih a dungthluntu pawl a hnenah an ra. 2Cule a kam a kau ih hiti in thu a zirh:

Jesuh zirhnak cu mi tampi in an thei, asinan mi zapi in an thlun lo ih a dungthluntu pawl lawngin tlang parah an thlun. Cutin a zirhnak an ngai ngah zir ngah ih thlawsuahmi an si.

Ziangvek dinhmun ah Jesuh zirhnak hmual nei cuang in na nunah na zir ngah?

Tuzarh sungah Jesuh hnen ihsin zir ngah dingin ziangvek lungput le dinhmun ah na ret awk ding?

Jesuh hnen ihsin zir ngah dingin lunglut le dinhmunah ret awk cu Jesuh hnen ihsin zir dingin a hmaisa bik tulmi asi. Asinan a tawpnaq asi hrih lo.

DUNGTHLUNTU PAWLIN AN ZIR NGAH MI AN NUNPI

Zirnak thu rel tikah tlawngta le dungthluntu cu zir ding veve an si nan an bang aw lo tuk: tlawngta cu an zirni theih duh ah an zir ih dikari an ngahnak hrangah asi. Dungthluntu pawl cun an zirni vekin thu awi nun, nun ap aw hlan aw dingin an zir ih a takin nunpi dingin an zir mi asi. Curuangah Jesuh in an nun rah in zoh uh tiah fimkhur tul thu a sim theu asi.

Mathai 7:15-17, 15“Profet deu pawl khi ralring uh; an lenglam cun tuu bangin nan lakah an tlang; a sinain an sunglam cu cinghnia hrang vek an si. 16Mi ziangvek an si ti cu an tuahmi in nan thei ding. Hling kung ihsin Sabit a rah dah lo; lenhling khal in theipi a rah dah keel lo. 17A harhdammi thingkung tha cun rah tha a rah ih thingkung tha lo cun rah sia a rah.

Na zir ngahmi thu na zum, na lung na cingin a tak in nunpi na harsatcan a um dah maw, ziangvek ah?

Leitlun zumtu nun kuahtlawnnak ah thlipi hrang in dungthluntu pawl nun nasa ten a nuai theu asi. Nun hram hnget zet parah hram bun dingin Jesuh zirhmi pawl cu theih, zum, lawng si loin a takin nunpi a tul asi. Cutin thlipi in a hran tluk thei lomi nun hram hgnetkhoh kan neih theinak asi.

Jesuh zirhmi ziangvek thuhrampi pawl nunpi lotheihlo asi? (Mathai bung 5-7 ah zoh in)

Ziangvek nunpi, cangvaihnaq a zirhnaq in a phut, lotheihlo in a tul tiah a zirh?

TUAH IN TEL VE

Zumtu mibur, kawhhran sungah telnaq in Jesuh zirhmi pawl a takin nunpinak tha asi. Jesuh zirhmi theihfeng harsa mi pawl tla zumtu dang thawn nun ih tawntehmi pawl hlawn awknak in theihfengnaq tampi mi a pek asi. Curuangah a hnuailam Jesuh zirhnaq pawl hi zoh tlang hrih uhsi.

Mathai 6:25-34, 25“Cuti a si ruangaq ka lo sim: nan nunnak hrangih nan tulmi ti le rawl le nan ruangaq hrangih hnipuan pawl thu ruat le donhar in um hlah uh. Thungai ih ti ahcun, nunnak hi rawl hnakin a thupi sawn lo maw? Hnipuan hnakin khal in taksa ruangaq hi a thupi sawn lo maw? 26Van ih a zuangmi vate khi zohhnik uh; annih in thlaici an tuh lo, rawl khal an khawm lo ih cuam sung khalah an khawl lo. Asinain vancungih a ummi nan Pa in a cawm thluh a si. Vate hnakin tampi nan sunglawi sawn a si lo maw? 27Nan donhar ruangaq nan nunnak caan tawite tal nan sauter thei maw? 28“Cun ziangah so hnipuan thu ah nan don a har? Hramlakih pangpar khi zohhnik uh; hna an tuan lo, pathnuk in thiam an tak fawn lo. 29Asinain atu-ah ka lo sim: siangpahrang Solomon hman, kha tlukin a lian nain, a lennak le a hnipuan in hi pangpar ih mawinak a tluk lo a si. 30Tuihsun ah a nung ih thaisun ah meisa sungih paih ding hrampi hman a ceimawitu Pathian cun cuhi pawl hnakin nannih cu a lo thuan sawn lo ding maw? Nan zumnak a

va mal lawmmam so!31“Curuangah ‘Ei in ding le sinfen ding tla khui-in so ka ngah ding,’ tiin donhar in um hlah uh. 32Hi pawl cu Pathian thei lo khawvel pawlih an helhkam ringring mi an si. Vancung ih a ummi nan Pa in hi thil pawl nan tulzia cu a thei a si. 33Cuhnakin Pathian Uknak le a felnak hawl hmaisawh sawn uhla thil dang hmuahhmuah cu a lo pebeet ding a si. 34Curuangah thaisun hrangah donhar in um hlah uh; thaisun in donharnak amah tawkin a nei ve ding. Ni ni khat ih a phurhmi harsatnak tlunah a dang beetching ding a si lo.

Himi bungcang sungah ziangmi thupi, thuhram khaikhawmtu thutak a sim?

Tuzarh sungah himi thutak zirhnak cu ziangtin na nunah na nunpi ding?

THLCAM DIL DUHMI NGAN AW:

ZARHKHAT SUNG TUAH DING

Pathian thangthat

-Bible siar ding pawl siar in Thiang Thlarau in a lo zirh thar mi ngan khum aw

-Nitin Bawipa thawn can fianhrial hmangan thlacam

-Na it that lo sung poh cu catbang loin thlacam in Bawipa Pathian Thlarau lamhruai nak hnuai ah zir duhnak lungput thawn na can hmang aw.

Bulpak nun

-Dungthluntu cun zir duhnak lungput an neih ih canpualtha thupiter ringring

-Dungthluntu cun an zir ngah mi pawl an nunpi taktak asi

Nunpi

-Tlangpar sermon Mathai bung 5-7 siar suak aw, a cang thei asile on in siar aw.

-Insang lole rualpi pawl thawn Bible zir tlang ding in sawm aw

-Bible zohlo in ngah aw: Mathai 7:24, “Curuangah hi ka tongmi a thei ih a thluntu cu lungpi parih inn saktu mifim pa bangtuk a si.”

-A tak nun ah thlarau rah (Gal 5:22-23) ah a sim vekin nangmai nunah a rah suah mi le na kiangkap nilai pawl nunah thlarau rah a rahsuakmi pawl khaikhin in ngan khum aw.

NITIN BIBLE SIAR IN THLARAU IN A LO ZIRH THARMI NGAN KHUM AW:

1. SAM 119:1-24
2. SAM 119:25-48
3. SAM 119: 49-80
4. SAM 119:81-104
5. SAM 119:105-136
6. SAM 119:137-160
7. SAM 119:161-176

NA THINLUNG SINAK TAKTAK

A thupi mi cu kan zummi, kan zum kan timi le kan tuahmi a zulh peh awk ding asi. Jeremiah in hitin a sim:

Jer. 17:9, “Milai ih thinlung cu zoso a theithiam ding? Ziangdang hnakin mibum hmanh bik a si; Damter dingah a harzet, a natnak a besia tuk!”

Voi tampi mah le mah bum awknak thang sungah kan tla lut theu. Kan zummi a dik, a tha ti men lawng in kan duhtawk theu ih tuahnak tel lo cu tihnungza a rak si ziar.

Jer. 17:10, 10Keimah Bawipa in milai ih thinlung cu ka hmu ih an sunglam thil ka hniksak. Mikip an nuncan daan in ka zoh ih, An tuahmi vekin ka tuah rul ve,” a ti.

Tikcu reilo te sung daiten um in Pathian hmaiah um in cek aw fel aw. Pathian hnenah na thinlung lo cek felin na sinak taktak lo theihter dingin dil aw: Ka zum na timi le na tongkam, tuahnak Pathian mithmuh ah a zulh peh aw maw, ti lo theihter dingin thlacam aw.

Pathian in ziang alo theihter?

Pathian in a lo theihter mi na sanletnak hrangah ziang na tuah a tul?

DUNGTHLUNTU PAWL CU ZIR DUHNAK LUNGPUT THAWN AN NUNG

Cat bangloin a phone a tham rero tu pakhat cu na biak khal asile a thinlung zaten a lo pek ih na thu a ngai ding cu a har zet ding. Cuvekin leitlun thu, kanmai duhmi in kan thinlung a luahkhat tuk tikah Pathian in in biak duh tikah asi ve pang pei maw?

Pathian in ,”ka lo zirh duh nan nang cu:

- Na hnatuan na buai tuk
- Na thinbang in na ruahnak a lo luahkhat theh
- Nuamnung na duh tuk
- Ka tongkam na ngai duh lo, in ti rero tla asi thei.

Pathian aw kan theih le theih lo cu kan thinlung sangka ong in zirh duhnak, theih duhnak, nunpi duhnak thawn nitin kan can kan hmanh maw timi parah a thum aw asi. Dungthluntu diktak cun Pathian aw ngai in an leitlun nun an nung, cutin Pathian in a simmi pohpoh nunpi dingin an man cia ringring.

Pathian aw theithe lo dingin ziang hnatuan, ziangvek dinhmun, kiangkap minung, thiltimi pakhatkhat in a lo kam theu?

Khrih dungthluntu taktak pawl cu Pathian thu theih duhmen in a tawk lo ti an thei; Pathian thutak an theih theinak ding hrangah an pum an pe, thildang hnakh thupi bik ah an ret asi. Pathian thu theih cu duhlo cingin theih asilo ih duhnak ngaingai thawm hawl in pumpek nun nei in zianghmuahmuah hnakin a thu theih cu thupibik ah a rettu pawl hnenah Pathian a phuang suak aw ih Pathian aw an thei theu asi. Dungthluntu pawl cu zarhkhat voikhat biak inn ah fah tahratin

midang thusimmi ngai in an thang lo, zarhkhat voikhat Bible study tuah men in a tawk lo, thlarau nun cawmtu ah a tawk lo. Anmah rori in an hawl ih theih duhnak taktak thinlung thawn Pathian thutak an hawl, tanta tulmi an tanta ih an nunah a thupi bik ah an ret ringring asi. Nitin te Jesuh aw thei dingin thinlung sangka ong aw tanta tulmi tanta in an thinlung sangka ong in Pathian aw an ngai ringring asi.

A tu ah Jesuh hnen ihsin zir duhnak na neih mi hi na lungawi kim tawk maw? 0 ihsin 10 tiang na lungkim zia sim hnik aw.

Lungkim lo lawlaw : 0, 1, 2, 3, 4, 5, 6, 7, 8, 9, 10: lungkim tuk

Mathai bung 5 ah dungthluntu pawl in Jesuh zirhnak ngai dingin tlangparah an kai. Dungthluntu pawl in Jesuh zirhnak ngai dingin lam hla feh in tanta mi nei in an pan hi tuitum lawng asilo. Mathai 17:1-2, 1Ni ruk hnuah Jesuh in Piter le Jeim le a nau Johan kha tlang saangpi parah a kaipi ih anmah lawng an um. 2Cule an mithmuh rori ah Jesuh cu a hmuimel a thleng aw; a hmai cu ni bangin a tleu ih a hnipuan cu mi tlet thei khopin a raang.

Hitum khalah dungthluntu pawl in Jesuh hnen ihsin a zirhnak ngai ngah dingin ziangkim dunglam ah an tanta ih an tikcu can, thazang pe in tlangparah an thlun asi. An hlawhngahmi cu zianghman ih lei thei lo mi mankhung thutak asi.

Mathai 17:1-13 siar awlam dungthluntu pawl in Jesuh hnen ihsin ziang an zir ngah?

Ziangti vek can ah Jesuh cu nangmah zirhtu ah na co hlang ngah?

Mi tampi cu tlangsang par kai paih lo in Jesuh dungthluntu tha an si dah lo; Jesuh thu an thei nan, tlangsang an kai paih lo, an thang dah lo, an kel le bawr in thlarau lam nun pitling si thei dah lo in an um theu. Riahsiatza asi. Pathian aw khal an thei dah lo. Asinan Jesuh zirhnak thlun dingin ziangvek tlangsang par khalah kai tahratin dunglam ah ziangkim tanta in Jesuh hnen ihsin a zir tu pawl covo cu lei hlawnthil man in lei theih asilo.

Nitin, nahzi kar tin, Jesuh aw ngai in a thu thlun dingin ziangtin nangmah le nangmah na thei aw ter cingcing thei ding?

DUNGTHLUNTU PAWL CUN AN ZIR NGAH MI AN THLUN

Bible thu pawl siar tikah tuksumza tampi a um. Asinan Jesuh tlangpar sermon mi lak ihsin a netalam ah a simmi hi tuk a sumbik ding tiah zum a um asi.

Mathai 7:21, “ ‘Bawipa, Bawipa,’ tiih i kotu hmuahhmuah in vancung Uknak an thleng thluh lo ding; vancungih a ummi ka Pa ih duhnak a tuahtu lawnglawng an thleng ding a si.”

“Vancungih a ummi ka Pa ih duhnak” atimi hi ziang asi tiah na mangbang rero tla asi thei men. Pathian thu ngai timi hi thildik tuah menmen in a tawk lo. Angaingai ah thildik tuah na cingin tumtahmi a dik lo ahcun Pathian in a hua zet asi.

Isaiah 1:11,15, 1 Bawipa in, “In pek ringring mi thawinak pawl hi ka duhzet ah maw nan ruat? Thawinak ih nan ur mi tuu pawl le nan tilva thau zetzet pawl hi ka khop zo. Nan caw, nan tuu le

nan me thisen pawl hi ka ningtuk zo! ...15Baan pharh in thla nan cam hman ah ka lo zoh lo ding. Ziangtluk tam ih nan cam khal le ka lo ngaisak lo ding; ziangah tile nan kut cu thisen in a **khat a si**

Mathai bung 7 le Isaiah 1 na siar tikah ziangvek in na lungsungah na ruat?

Tuisan kawhhran nangmai hmuhtawmi parah hngat aw in Isaiah 1:11 hi ngan sal hnik aw. (Isaiah in amai san minung pawl hnenah ca a ngan vekin tui na umnak kawhhran ah Pathian in ca a lo ngan ter si bang sehla).

A lem le a tak cu a rah in theihtheih asi tiah Jesuh in a sim. Jesuh in a simmi hi Isaiah in a rak simmi thawn thu hmunkhat asi.

Isaiah 1:16-20 siar awla Pathian thu lung pawl nun ah “rah” ziangvek an rah timi ngan aw.

Jesuh dungthluntu pawlin Thuthlungthar ah cakuat an ngan tikah “rah” thu nasa ten an simfiang asi. A lar bik cu Paul ih ngan mi hi asi thei;

Gal 5:22-23, 22Sikhalsehla Thlarau ih a rahsuahmi cu duhdawtnak, lungawinak, hngamnak, lungsaunak, mi zaangfahnak, thatnak, rintlak sinak, 23nunnem tangdornak le suup theinak tla an si. Cubangtuk rah umnak ahcun daan cu a tul nawn lo.

Jesuh dungthlun cu tumkhat lungkimnak in thuhluknak tuah men a tawk lo. Cutin hmakhat te ah rah a rah theih fawn lo. Inn hnen te ka duhdawt kei, rem daihnak ka tuah kei, rah tampi ka rah ding ti theih asi fawn lo. Jesuh dungthlun in a zirhmi vekin kan nun tikah a mah bang sinsin in kan nun a thangso vivo tik lawngah thlarau rah cu zumtu nun ah a rah suak vivo dingmi asi. Khatlam zawngin kan sim asile thiltha tampi tuah nak in Jesuh dung kan thlun asilo. Thlarau rah kan nun ah a rah suak mi in Pathian kan sungah hna a tuan rero asi ti langtertu asi sawn.

Thlarau rah ziangmi na nunah a lang hngan bik?

Thlarau rah ziangmi na nunah a lang mal bik?

**DUNGTHLUNTU LAMZIN
DISCIPLE YOURNEY**

SESSION 11

**JESUH IN A DUNGTHLUNTU PAWL A THUAM
JESUS EQUIPS HIS DISCIPLES**

JESUH IN A DUNGTHLUNTU PAWL A THUAM JESUS EQUIPS HIS DISCIPLES

Key: Jesuh in leitlunah amai mission hna kan tuan theinak hrangah kan tulmi in pek theh asi.

Jesuh in a rundammi zumtu pawl cu rundammi kan sinak tiang in tuahsak lawng si loin a rawng kan bawlnak hrang kan tulmi ziangkim in pek asi ti theihnak in thazangthar ruahsannak thar in pek ringring asi. Tuitum zirnak ah Jesuh in a dungthluntu pawl a thlahnak thu (Mathai 10:1,5-10) ihsin Bible in in zirhmi pawl kan zir ding. Jesuh in milai parah hngat aw lo in ziangkim amai hmin in amai huham cahnak ringih a hna kan tuansuak ding hi a duhmi le tumtahmi hnaturan dan asi.

ZOHSALNAK

A hmaisai ah Jesuh hnen ihsin zir duhnak lungput thawn tangdornak in kan zir ding thu kan zir ngah zo. Asinan Pathian thutak zir le theih timi cu nunpi nak tel loin a famkim dah lo. Pathian thutak theih le zir nak ihsin nun thleng awknak a rah suakih thulunnak nun a hringsuak ringring asi. Thu kan lung sinsin asile nunrah tam sinsin kan rah theinak lamzin um sun asi.

Bible siar ding le tuah dingmi pawl na rak tuah maw? Ziang na bang?

Bible na siarmi sung ihsin ziangmi na zir ngah?

Thusut duhmi na nei maw?

THLACAM

Zirnak thlacam in thok uhsi.

- A tuzarh sung Pathian in a lo zirh, a lo hruainak parah lungawithu sim aw.
- Leitlun Jesuh mission hnaturan ah tel ve dingin, a tulmi thawn Pathian ih thuammi si dingin dil aw. Ziangmi zawn ah thansoh na tul ih ziangvek hnaturan suah na duh timi pawl lailan zetin Pathian hnenah sim aw.
- Pathian hnenah a thu theihlawng si loin raltha zet ih a thu ngai in nunpi thei dingin Pathian hnenah thlacam aw

THU HMAIHRUAI

Hnaturan pakhatkhat zoh tikah hantuantu in a hmanrua pawl thiam nal zetih a hmang thiam leh thiamlo awlten theihtheih asi.

Hnaturan thupi pakhatkhat tuan suak dingin atulmi hmanrua pawl thawn thuam thazetin na theih awk can a um maw?

Jesuh ih hnaturan thupi zet a lo fial tikah a tulmi hmanrua pawl lo pe loin a lo fial dah pei maw? Lungawi umza asimi cu, cutin in fial dah lo asi.

Tuitum zirnakah Jesuh in a dungthluntu pawl ziangtin a thuam, ziangvek hmanrua pawl a pek cia theh timi kan zoh ding. Himi zirnak hi dungthluntu nun hrangah a thupi zetmi asi.

Leitlun ah Jesuh ih mission hnatuannak ih na telve nak ah ziangvek in thuam na duh ih ziang hmanrua pawl na tul?

BIBLE THUANTHU

Mathai bung 10 hlan cu dungthluntu pawl kha Jesuh hnenah an um, an ei an in an zir, an tlangleng. Asinan bung 10 hnu lamah Jesuh in a kopkop in a thlah hai.

Mathai 10:1, 5-10, 1Jesuh in a dungthluntu hleihnih kha hmun khatah a ko ih thlarau tha lo dawihlo theinak le natnak le dam lonak a phunphun damter theinak huham a pek..... 5Hi hleihnih pawl cu Jesuh in a thlah ih thatein thu a cah hai. "Zentail ram ah va feh hlah uhla Samaria khawsung ah va lut hlah uh. 6Cuhnakin a hlomi tuu run Israel mi pawl hnenah nan feh pei. 7Feh uh la, 'Vancung Uknak a nai zo,' tiah va sim uh. 8Mina damter uh, mithi thoter sal uh, phaarnat a neimi pawl damter uhla khuavang pawl dawihlo uh. Man loin nan ngahmi kha man loin va pe uh. 9Nan kordip ah sui tangka siseh, ngun tangka le dar tangka siseh, pai hlah uh. 10Nan khuatlawnnak lamzin hrangah rawl dilnak ah cawdip siseh, angki hlei siseh, kedam le kianghrol siseh, keng hlah uh. Hnatuantu pa cu a sammi hmuahhmuah pek thluh a si ding.

Jesuh in atlunlam thupek vekin thu lo pe, tuanvo lo pe sehla ziangtin na ruat ding?

A tlunlam thupek sung ihsin khuimi bik a harsa bik ding tiah na ruat, ziangruangah?

THUANTHU LAILANG

Jesuh dungthlun dingin kan timtuah tikah Jesuh in kan tulmi ziangkim thawn in thuam theh asi. Pathian, leitlun, le milai thuanthu ziangtin a her timi theihfiang theinak ding hrangah Bible kan nei. Pathian fale pawl pawlkomnak kawhhran sungah mibur pawlkom kan nei. A hnatuan in fial mi tuansuak thei nak ding hrangah hmanrua tha, thlarau laksawng phunphun in pek.

Jesuh ih hnatuan fialmi tuansuak thei dingin thlarau laksawng na co mi pawlin ziangtin a lo bawm?

A hnuailam thupek hi Jesuh hnen ihsin ngah ding na duh maw?

Mathai 10:8, Mina damter uh, mithi thoter sal uh, phaarnat a neimi pawl damter uhla khuavang pawl dawihlo uh. Man loin nan ngahmi kha man loin va pe uh.

A tlunih Jesuh thupek mi pawl tuah thei dingah na ruat aw lo asile na dik asi. Nangmah in na tuah thei lo mi pawl cekci Jesuh in nangmai nunnak hmangin tuah a duh asi. Mathai 10:1, Jesuh in a dungthluntu hleihnih kha hmun khatah a ko ih thlarau tha lo dawihlo theinak le natnak le dam lonak a phunphun damter theinak huham a pek.

Tuisan Jesuh dungthluntu pawl kha Jesuh in leitlun pum huap in mangbangza hnatan tuansuak dingin tuavo in pek asi. Kan neihmi hmanrua tha bik cu amah Jesuh thawn bulpak pehtlainnak kan neih ih amai thawn hnatan tlang ding asi.

Jesuh thawn nan pehzawmnak ruangah ziangtikah raltha zetin nangmah te na buah suak thei lomi hna na tuansuak can a um dah maw?

Jesuh in a dungthluntu pawl cu amai huam cahnak le thuneihnak in hantuan a fial hai ih an tulmi hmanrua pawl thawn a thuan hai asi. Cuvek thiamthiam in tuini ah Jesuh dungthluntu pawl cu Jesuh in leitlun mission hnatan tuansuak tu dingah tuavo pek mi kan si.

JESUH IN KAN TULLO MI PAWL A SIMFIANG

Jesuh in a dungthluntu pawl hnenah an tulmi hmanrua pawl a pek mi a thuan hai lawng asilo an tul lo mi pawl tla fiangzet in a theiher hai asi.

Mathai 10:9-10, 9Nan kordip ah sui tangka siseh, ngun tangka le dar tangka siseh, pai hlah uh. 10Nan khaulawnnak lamzin hrangah rawl dilnak ah cawdip siseh, angki hlei siseh, kedam le kianghrol siseh, keng hlah uh. Hnatanu pa cu a sammi hmuahmuah pek thluh a si ding.

Asile tuisun ah kan neihmi tangkabawm, thilri pawl kan hlawn theh ding tinak maw si? Si ciah lo. Jesuh in leitlunah an hngat awknak, an rinsanmi pawl parah hngat aw lo dingin a zirh hainak asi. Cutin zaahza Jesuh parah an hngat awk ih an zir ding a duh, a zirhmi asi.

Na nunnak na zohsal tikah zumnak in ke na kar can ziangvek a um dah? Ziang a cang?

Tuisan Jesuh dungthluntu pawl khalin Jesuh dung kan thlun tikah kaimai ruahban lo, leitlun mithmuh thieh thil kan hngat awknak lenglam ah zumnak in ke kan kar a tul asi ti kan fiang awk a tul. Zumnak leitlun khaulawnnak ah nangmai buahthei mi, nunphungdan kel ten nung in buah thei mi fangfang asile kekar hlat na tul ih na umnuam zetin dinhmun lenglam ah na ke na kar a tul asi.

Jesuh dungthluntu na sinak vekin na tumtah mi ziang asi?

Na tumtahmi hlawhtling dingin ziangtin Jesuh parah na hngat aw?

TUAHVE TEL VE

Tumtahmi plan neih hi thil thupi zet asi. Jesuh leitlun mission rawngbawlnak hrangah tikcu pek in timtuahnak neih khal a tul hrimhrim mi asi. Leitlun nitin nun hrangah tumtahnak le Jesuh leitlun mission hnatuannak hrang tumtahnak plan neih cu a bang aw lo zet asi. Jesuh leitlun mission hrang tumtahnak plan neihmi cu milai thazang, ruahnak, le fimnak in a tlin lo mi, Jesuh amah rori tel in amai huham cahnak le fimnak lawngin tuahsua theih mi asi dingmi asi. Nangmah le na group sungah ciamciam ten to khawmin Jesuh leitlun mission rawngbawlnak hrangah tel in tumtahnak plan tuah tlangih Jesuh parah hngat aw dingin plan tuah tlang uh.

Jesuh dungthluntu pakhat si in ziangtin na thangso duh?

Short-term goal	Long-term goal

Jesuh dungthluntu pakhat na sivek in Jeduh leitlun mission hrangah ziang tuansuahmi neih na duh?

Short-term goal	Long-term goal

THLACAM DUHMI

.....

ZARHKHAT SUNG TUAH DING

Pathian bia

- Thlacamnak in Pathian thawn cat bang loin pehtlaih in amah thangthat aw Bulpak Bible zirnak

- Bulpak Bible siar le zir dingmi pawl bulpak in Bible siar in thusuhnak pawl sang in ngan khum aw

Nunpi ding

- Lamzin feh pah in na umnak veng sungah thlacam in feh awla, Pathian hnenah na umnak, na duhsakmi minung pawl ziangvek si hai sehla na duhsak timi Pathian hnenah sim aw
- Na insungsang minung pawl thawn to ciamciam in lailan ten sut hai aw, a tu hnakin jesuh hrangah na hman awk dingmi na sup awkmi, dunglam ah a lo kai awktu ziang a um timi pawl sut aw, thlung sangka ong in sut aw la lo sim hai seh.

Zohlo in ngah; Mathai 10:27-28, 27Khawthim lakih ka lo simmi hi sun khawvang ah sim sal uhla a thup ih nan theihmi hi innpar ihsin phuang uh. 28Taksapum a that thei nain thlarau a that thei lotu pawl cu va ñih hlah uh. Takpum le thlarau a pahnih in hell sungih a that theitu Pathian kha va ñih sawn uh.

- Na thlacammi pawl cabu sungah ngan khum awla, Pathian in na thlacam a lo sannak pawl ngan khum aw. Hitin thlacam mi cabu sungah ngan hi Pathian in in sannak pawl hminsinnak tha zet asi.

NITIN BIBLE SIAR IN THLARAU IN A LO ZIRHTHARMI PAWL NGAN KHUM AW

1. Seemtirnak 22:1-18;
2. Seemtirnak 5;1-21;
3. Suahhlannak 6:28-7:13;
4. Joshua 2:1-24;
5. I Samuel 17:1-37;
6. John 4:1-26;
7. Philipians 2:1-18

NA TULMI HNAKIH TAM

Jesuh dung na thlun asi ahcun famkim lo zetin na thei aw dingih, na tuanvo tuansuak thei dingin tlaklo tlinglo zetin na thei awk can a um ding. Atu ah cuti cekci in na thei aw tla asi thei. Cutin na ruat maw ruat lo maw, nangmai felnak tlinnak in Jesuh dungthlun dingin na tlak lo hulhual asi. Na zirnak theihnak in a tlin lo. Nangmai ruahnak le ti theinak in hna tuansuah na tum asile na tlinlo zia na thei aw ding. Jesuh ziangkim thei ziangkim ti thei thianghlim famkim Bawi Jesuh ih dungthluntu palai si dingin na tling lo na tlak lo na thianghlim tawk lo zia na thei aw ding.

Nangmah lawng na silo, Khristian zapi ten Jesuh Khrih ih dungthlun tlak lo lawnglawng an sit theh. Cucu thusia vek a bang. Thuthangtha cu ziang asi tile Jesuh ih dungthluntu na si vekin amai cahnak thilti theinak fimnak ringring a nungmi na si ruangah na tlinlonak tlaklonak, thianhlim lonak pawl cu zoh asinawn lo ih amai huham cahnak thianhlimnak ringin nitin na nun ruangah tuanvo ziangkim na neihmi siseh na dinhmun siseh amah ah a hngetmi a famkimmi na si zo.

Amah na tulmi ziangkim asi.

Ziangzawn ah Jesuh dungthluntu famkim lo, tlamtling lo tiah na thei aw aw?

Ziangvek dinhmun le tikcu can ah Jesuh dungthluntu sinak in raltha zetin na nung in na cangvai dah?

Tuzarh sungah Jesuh huham cahnak ringin ziangvek dinhmunah ziang na tuah in na nung ding?

BULPAK ZIRNAK

KAN TULMI JESUH IN IN PEK

Jesuh cu kan ziangkim kan hrampi ah hmangin ke kan kar tikah kan tulmi ziangkim in pek theu asi.

Ephesians 6:10-17, 10A netnak ah, Bawipa thawn nan pehzom awknak le amah ih cahnak ruangah nan thazaang cu cakter sin uh. 11Satan bumsiatnak do thei dingah Pathian ih a lo pekmi ralthuam kha hruk uh. 12Ziangah tile kan domi pawl cu milai an si lo, vanih a ummi thlarau sia cahnak pawl, uktu pawl, thuneitu pawl, le hi a thimmi leikhawvel pumpi uktu pawl an si. 13Curuangah atu ihsin Pathian ralthuam kha hruk uhla caansia a thlen tikah nan ral pawl cu nan do thei ding ih a net tiang nan do hnuah nan tanhmun cu nan hum ngah ding.

14Curuangah khoh zetin ding cia uh: taaikhap ai-ah thutak kha nan taai ah khap uh; taangphaw ai-ah dingnak kha nan taangah song uh; 15kedam ai-ah daihnak Thuthang tha phuan hiarnak kha hruk uh. 16Catbaang loin thirphaw ai-ah zumnak kha keng ringring uh; ziangah tile Satan in meiling bangtuk a si mi thal in a lo kah tikah cuih phaw cun nan mit thei ding. 17Cule lukhum ai-ah rundamnak kha lak uhla Thlarau ih a lo pekmi ralnam ai-ah Pathian tongkam kha keng uh. Cang 12 nakah Paul “kan do mi” atimi hi ziang asi tiah na ruat?

“Ralthuam” cang 14-17 sungah a simmi pawl hmangin ziangvek hlawknak na nei in na nunpi?

Ziangmi ralthuam hmangin na nitin nun thlarau rodalnak ah na thuam awk sinsin na tul?

Pathian thu lungin, thlacam in, Pathian thawn pawlkomnak nun na nunpi asi ahcun cak zetin thlarau ralthuam thawn lo thuam dingin Jesuh in in kam cia mi asi.

Mathai bung 10 ah Jesuh in dungthluntu pawl a thlah hai ih an ra kirsal tikah amah thawn an pehtlaih awknak cak sinsin dingin a phunphun in a thuam hai asi.

Mark 6:30-31, 30A thlahmi pawl cu an ra tlung ih Jesuh cu an tong ih an tuahmi hmuahhmuah le an zirhmi hmuahhmuah an sim. 31A hnenih a rami le a kirmi, mi sukso pawl cu an tamtuk ruangah Jesuh le a dungthluntu pawl cu rawl einak caan hman an nei lo. Cu hrangah an hnenah, “Kan feh pei ih kanmah lawng hlimphirte ih kan um theinak hmunah va um uh si; cule malte tal nan cawl thiam ding,” tiah a ti.

Jesuh in leitlun a mission hnatuannak ah kan tel vekin kan tulmi ziangkim thawn in thuam ringring asi. Asinan amah thawn pawlkomnak nun nei in amah thawn kan pehzawm awk ringring tik lawngah in thuammi ralthuam kan hmang thei asi.

A tunai na nunah Jesuh thawn bulpak in neihnam zet le thuk zetin ziangtin pehtlaihnak na nei?

Tuzarh sungah ziangtin ziangvek canah Jesuh thawn bulpak pehtlaihnak nun na nei ding?

Jesuh leitlun mission hnatuannak cu kanmah bulpak thuneihnak in kan tuah thei lo ti theih hngilh lo a tha. Asinan ziangkim thuneihnak neitu Jesuh in thuneihnak in pek zo asi (Mat. 10:1). Kannih cu kan cak lo asinan amah cu cakkim asi. Tongkam ah kan famkim lo, anih cu a famkimmi asi. Na hnatuan cu nangmai bulta asilo, na thuneihnak cu nangmai thuneihnak asilo. Kawh na sinak cu Pathian thulung ding lawng asi.

Pahtian a thu ngai ding in a tu ah ziangtin a lo ko? (Tikcu la in a mai aw ngai aw).

JESUH IN KAN TULLO MI A FIANGTER

Leitlun nunah voi tampi cu Pathian thu lun hnakin thusuh milai in an hmang theu. Tirhsiang zetin pek awknak hnakin phunzai an hmang theu. Zangfahnak le ruahsannak thu sim hnakin simsiatnak sim an hmang theu.

Milai thinlung cun Jesuh leitlun mission ah tel ve thei lo ding in puhmawh ding a thei ringring theu.

- Hnatuan ka hloh pang ding
- Bible thu ka thei taw lo
- Thlarau laksawng ka nei lo
- Thaisun lamah ka zuam leh ding tivek in Pathian rawngbawlnak ah tel lo ding in puhmawh ding an nei ringring theu asi.

Pathian in tuahter a lo duhmi tuah lo ding in ziangvek puhmawh ding na nei ve?

Jesuh dungthluntu pawl khalin cutin an rak si ve dah. Cuiruangah Jesuh in zianghman keng lo in a feh ter hrim. Sumpai, kianghrawl, hnipuan thlengawknak, zianghman keng lo in Jesuh thupek parah hngat aw ding in a thlah hai.

A tu zarhkhat sungah ziangmi pawl in na tikcu a hlei in an lo lawng ih Jesuh mission hnatuan ah tel theilo ding in an lo cawkbuai?

Jesuh mission hnatuan tuan suak ding in ziang parah na hngat aw theu, sumpai, mibur thazang, innsang sunglekhat, pehtlaih mi, tvp?

Jesuh ih dungthluntu pawl hrangah Thuthangtha in in simmi, kan ken tul lo mi pahnih:

- Kan milai thupitnak ken a tul lo

Luke 9:46-48, 46Dungthluntu pawl cun anmah lakah zoso a tum bik, timi thu-ah an el aw. 47An ruahmi kha Jesuh in a theih ruangah nauhakte pakhat a hruai ih a kiangah a dinter. 48Cule an hnenah, “Ka hmin in hi nauhakte a cohlangtu cu keimah i cohlang a si; keimah i cohlangtu cu i thlah tu a cohlang a si. Ziangah tile nanmah lakih mi nauta bik cu a tum bik a si,” tiah a ti.

Jesuh dungthluntu na si vekin midang thawn tahthim ding in thlemnak na tong theu ding.

Khrihfa zumtu dang pawl thawn voi ziangzat na tahthim aw theu?

1 2 3 4 5 6 7 8 9 10

a pahnihnak ah Jesuh dungthluntu ih kan tanta tulmi cu mai dingfelnak nun, le midang soiselnak asi.

Luke 9:46-50, 49Johan in, “Bawipa, mi pakhat cu na hmin in ramhuai pawl a dawu rero kan hmu ih kan dawn; ziangah tile kan bu sungtel a si lo,” tiah a ti.50Jesuh in, “Dawn hlah uh; ziangah tile zokhal sisehla a lo dodal lotu cu a lo bawmtu an si,” tiah Johan le dungthluntu dang hnenah a ti.

Midang in Jesuh dung an thlun daan thu ah voi ziangzat na soisel in cuai na thlai hai theu?

1 2 3 4 5 6 7 8 9 10

Thlemnak sungah tluksiat a awl zetmi cu kanmah lawng hi a dikbik, Jesuh dungthlundan dikbik, doctrine tha bik, mizia tha bik, Pathian biakdaan dikbik, Thuthangtha sim bik, midang piangthar ter bik, kan si tiah mah le mah tha hleice in porh awknak thangsungah tan aw zet asi.

**DUNGTHLUNTU LAMZIN
DISCIPLE YOURNEY**

SESSION 12

**JESUH IN A DUNGTHLUNTU PAWL A THLAH
JESUS SENDS HIS DISCIPLES**

JESUH IN A DUNGTHLUNTU PAWL A THLAH JESUS SENDS HIS DISCIPLES

Key: Jesuh in Thuthangtha leitlun deng tiang thlenpitu dingah in ko.

Jesuh in dungthluntu pawl hnenah Thuthangtha sim in dungthluntu va tuah dingin thu a pek. Cutin Jesuh Khrih dungthluntu dingah midang va tuah sin aw vivo in arat sal hlan lo dungthluntu hnaturan cu peh vivo dingmi asi.

Tuitum zirnakh ah nangmah le na group in Jesuh in dungthluntu pawl hnenah thupek ropi a pekmi (Matthai 28:16-20) thu zir asi ding. Jesuh thupek ropi simsin vivo thei dingin na tim tuah aw. Jesuh thu pek cu feh ding, Thuthangtha sim ding, dungthluntu tuah ding, baptisma pek ding, zirh ding asi. Cutin Jesuh thu leitlun mi hmuahhmuah hnen tiang thlenter ding, Jesuh hmin thanter ding asi.

Thuthangtha sim dingin thuneihsak kan neihmi pawl sim thiam dingin na timtuah aw. Matthai 28:16-20, le Tirthlah 1:7-8, pawl zoh in Jerusalem, Juadea, Samaria, le leitlun deng tiang tiah a simmi pawl ziang asi ti fiang dingin nangmah le na group sungah rak zir uh. Himi Bible bungchang pawl fiang zet dingin rak siar nawn leuhleuh aw.

ZOHSALNAK

Ahmaisa ah kan zohzo mi cu Jesuh in leitlun mission hnaturan kan tuannak ding hrangah a tulmi ziangkim in pek zo asi. Kanmai huham cahnak, hmanrua parah kan hngat awk a tul lo. Tui zarh zirnakh kan thok hlanah a hnuailam thusuhnak ruat tlangin na sannak pawl rak ngan khum aw la na group ah relkhawm dingin timtuah cia aw.

Tuzarh sung zir ding siar ding pawl lakah ziangtiang na rak tuah ziang na bang?

Bible siar ding mi na siarmi lak ihsin ziangmi na zir ngah?

Thu sut duh mi na nei maw?

THLACAM

Zirnakh kan peh sunzawm hlanah thlacam aw.

- Pathian hnenah a thutak a lo theihter, a lo zirhmi parah lungawithu sim aw.
- Pathian hnenah raltha zetin na zirmi pawl nunpi ngam dingin abik takin a tui tum ih zirnakh hi a takin nangmai nun rori nunpi dingin thlacam in dil aw
- Tuitum ah thinlung takin Jesuh dungthluntu pakhat ih nun cu ziangvek asi timi nangmai nun rori ah lang dingin thinlung tumruh zetin pumpek awk tumtahnakh thawn zir dingin thlacam aw.

THUHMUAIHRUAI

Jesuh dungthluntu na sinak vekin na nunah ziangvek thleng awknak danglam bik na nunah na tawntehmi asi?

Jesuh Khrih in na nun a lo thleng sinsin vekin Jesuh Khrih ih lungtur vekin na lung a tur tikah Amai hmin sunlawinak hrang lawngah na nitin nun na hmang dingih Jesuh in leitlun ah rundamnak Thuthangtha thlenter a duh vekin na thinlung sungah mihlo rundam duhnak in a lo luahkhat ding asi.

BIBLE THUANTHU

Jesuh dungthluntu pawl nunah Jesuh leitlun a um lai ah kaisoh can tumsuk can nei in anhai in an um can a rak um. Jesuh an theih pek ah an lung a awi zet, Jesuh kross parah khenbet asi tikah an mang a bang an anhai, Jesuh a thohsal tikah an lung a awi tuk, Jesuh in vanram ah a fehsan sal tikah an ninghang um ngaihnak thei loin an rak um dah. Asinan thu cahta lo in a tlansan lo, an hnenah a nunnak cawpcilh in an tuansuah tulmi thupek a dungthluntu pawl a ko khawm ih a cahta hai asi.

Matthai 28:16-20, 16Dungthluntu hleikhat pawl cu Jesuh ih a fial bangtuk in Galilee tlang parah an feh. 17Amah cu an hmu ih an biak, a sinain a hrek cun an zum lo. 18Jesuh cun a pan hai ih an hnenah, “Lei le vanih thuneihnak hmuahhmuah cu ka hnenah pek a si zo. 19Curuangah feh uhla miphun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. 20Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a ti.

Himi Bible bungcang na siar tikah na thinlung in ziang na ruat hmaisai bik ih ziangruangah?

Jesuh thupek hi dungthluntu pawl hnenah thu a pek thok ihsin ziangtin dungthluntu pawl in sankhat hnu sankhat an rak tuan ih a tak in an rak canter?

Jesuh thupek hi ziangzon ah a fam kim hrih lo?

Jesuh thupek ropi cu leitlun ah milai taksa in a um lai ihsin a dungthluntu hmuahhmuah-nangmah tel in an tuah ringring mi le an tuah rero lai dingmi asi. Jesuh thupek ropi hi fiang le thuk deuh in kan zoh ding.

BIBLE THUANTHU LAILANG

JESUH IN KHUITAWK AH FEH DING TI IN SIM

A hmaisai bik ah Jesuh thupek kan zoh tikah a thuneihnak kan zoh hmaisai ding. “Lei le van ih thuneihnak hmuahhmuah cu Jesuh hnenah pek asi” timi zianghrangah a thupi tuk? Thupek timi cu thuneihtu lawngin pek theih asi. Jesuh in thupek dawtdawt, a dungthluntu pawlin duhhril theih si loin tuahlotheihlo in thupek dawtdawt dungthluntu hnenah a pek asi. Curuangah a thupekmi

pawl thu pek thei dingin le tuansuahnak hrang khalah thuneihnak a nei asi ti simfiang hmaisai dingin a thuneihnak thu pawl a sim hmaisai asi.

Na nunah Jesuh a lal, a lo uk, na nunah thuneitu asi timi in na nitin nunah ziangsan a nei?

Jesuh thupek ropi kan zoh asile ram huap mi a nei ih buah ding thupek asi. “Leitlun deng tiang” tiah leitlun pumpi a huap. Cuihlei ah leitlun mipfun hmuahhmuah an sinak thu pawl tohmun in simmen ding si loin “feh uh” tiah thupek asi. Thil a cang mi parah rak cangvai men ding silo in mah in buah hmaisak ding thupek asi. Cutin sim ruangah khrihfa zapi ten hnatuan bang tahratin fehsuak theh ding tinak asilo ih khrihfa zapi ten leitlun dengtiang fehsuak in Thuthangtha simnak hrangah cangvaihnak ah tel theh ding a tul tinak asi. Curualrual in zumtu zokhal mah rori fehsuak in Thuthangtha sim ding khal Pathian in tul a ti asi ahcun man cia ringring in Jesuh thupek thlun dingmi kan si.

Mission hnatuannak ah na telnak hmuhtawnmi ziangvek asi?

Jesuh thupek ah kan zoh asile “miphun hmuahhmuah” tiah a sim. Jesuh thihnak cu leitlun mipfun hmuahhmuah hrangah asi tinak asi. Curuangah Jesuh thisen in a tlennak a rundannak thuthangtha cu a rundammi mipfun hmuahhmuah hnenah simsuak dingin dungthluntu zumtu zapi hnenah thupek, tuanvo peknak asi. Curuangah local kawhhran ciar in mai local kawhhran lenglam ah leitlun mipfun, Khrih rundannak Thuthangtha theih hrih lo tu pawl hrangah Jesuh mission rawngbawlnak ah tel ve lo tu local kawhhran cu Jesuh thupek thlun lo tinak a si.

Leitlun mipfun hmuahhmuah hnenah Thuthangtha sim ding Jesuh thupek ropi thlun in ziangtin mission ah na tel ve thei ding?

JESUH IN ZIANG TUAH TULMI IN SIM

Jesuh in a rawngbawlnak ah tel dingin in sim lawng si loin ziangtin kan buah ding timi fiang ten in sim asi.

Mathai 28:19-20, Curuangah feh uhla mipfun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a ti. Jesuh thupek dawtdawt zoh tikah ziang kan buah tul timi a fiang. Dungthluntu buah ding ah in fial. Kan mission hantuan rah suah dingmi cu Jesuh dungthluntu buah ding asi. Baptisma cu dungthluntu an si hnu ah buah dingmi asi. Baptisma laknak cu mipi hmaiah Jesuh dungthlunti sinak phuan suahnak asi.

Zumlo tu hnenah baptisma thu ziangtin na sim fiang ding?

A poi zetmi cu mi tampi in mi pakhat cu a piangthar ih baptisma a lak hnu ahcun a famkim theh tiah an ruat soal pang theu. Piangtharnak le baptisma laknak cu a hram thoknak asi ih Jesuh dungthluntu tha si thei dingin an hram thok sawn asi. Cutin Jesuh dungthluntu si in Jesuh ih zirhnak hmuahhmuah zirh tulmi an si. Jesuh thupek rori sungah a tel mi cu dungthluntu pawl hnenah a zirhmi hmuahhmuah an thlun dignah zirh ding asi. Cucu a thupek asi.

Cutin dungthluntu an nitin leitlun nunah Jesuh zirhnak vekin an nung, a thu an thlun ih thupek ropi nunpitu an si theinak dingah pitling tiang zirh tulmi zirh dingmi an si. Zirhnak ah a thabik cu anmai zohthim dingin Jesuh thupek thlun in nun asi.

Na nunah Khrih nun langtertu zohthim ding zo na nei?

Jesuh dungthluntu midang va buah vivo dingin siseh nangmah nunah Khrih palai, khrih ih hmuihmel langtertu si dingin ziangtluk nangmah le nangmah na rinsan aw aw?

TUAH IN TELVE

“Miphun hmuahhmuah dungthluntu si ter ding” timi Jesuh thupek thu sim tikah mi tampi in feh tahratin Thuthangtha sim ding lawng an ruat theu. Cumi cu buah ding hrimhrim mi asi. Fulltime in rawngbawl ding, part time, can rei lo te sung, a zarh tel, thla tel, kumtel ti in a phunphun in zumlotu hnenah Thuthangtha sim in dungthluntu siter ding cu zumtu zapi tuanvo asi. Cumi lawng asi theh lo, fehsuak lo tu pawl khal Jesuh thupek ropi tuansuahnak ah tel theh ding kan si, local church ihsin Jesuh mission hnaturan nak ah tel theh ding kan si.

A thupi zet pakhat cu thlacamnak in tel asi. Thlacamnak in satan ral donak ah tel ve asi. Ram pakhatkhat, miphun pakhatkhat hrangah hmuitin nei in thlacam aw. A hnuailam pawl vekin thlacamnak ah na tel thei ve asi.

Ram pakhatkhat na hril hnu ah cumi ram sungih Khrihfa pawl hrangah thlacam aw. Khrihfa pawl rawngbawlnak hrangah an rawngbawlnak an himnak hrang thlacam sak aw.

Jesuh dungthluntu pawl siatsuah harsatnak petu ram ukto pawl siseh mipi lak ihsin siseh thiltha lo a thleng thei mi lak ihsin humhinnak hrang thlacam sak aw.

Thuthangtha simsuak theinak ding cantha sangka on awknak hrangah thlacam aw.

THLACAM DIL DUHMI:

....

ZARHKA

HT SUNG TUAH DINGMI

Pathian biaknak in can hmang aw.

- Bible siar ding pawl siar awla Thiang Thlarau in a lo zirh tharmi pawl ca ah ngan khum aw.

Nunpi aw

- A tu zarh sungah piantharnak a nei hrih lo tu pawl thawn can hmang tlang dingin timtuah aw. Na can hmandan kel thleng in Jesuh mission ah tel dingin piangthar hrih lo thawn na can pe awla cumi thawn thlarau lam thu relpi in na can hmang aw.
- Jesuh dungthluntu canter dingin disciple na buah dingmi minung pawl hmin list buah awla an hrang thlacam aw. Na thinlung sungah a lang mi, na unau sungkhat lakah, hnantuanpi, tlawngkaipi, rualpi lakah zozo an si khal le an hmin list buah awla an hrang thlacam aw.
- Cumi hmin list lak ihsin zozo disciple (dungthluntu) ah na buah thei bik ding timi hmin la hran aw la an hmin sal in thlacam sak aw.
- Zohlo in ngah Tirhthlah 1:8, 8Sikhalsehla nan hnenih Thlarau Thianghlim a rung thlen tikah cahnak huham thawn nan khat ding ih Jerusalem le Judea ram le Samaria ram hmuahhmuah le leilung tlun a deng tiang keimah ih theihpitu nan si ding,” tiah a ti.

BIBLE SIAR DING PAWL SIAR IN NA ZIRNGAHMI A HNUAI LAM AH NGAN KHUM AW

1. Mark 16:1-20
2. Luke 10:1-16
3. Luke 24:36-53
4. John 20:1-31
5. Romans 10:1-21
6. Romans 16:1-27
7. 2 Korin 10:1-18

TLAKSIAT TIHNAK

Tlaksiat le hlawhsam kan tihphannak ruangah Jesuh dungthlun si dingah a thu pek an thlun thei lo theu asi.

- At thlak, mi aa tiah mi in in ti ding kan phang theu
 - Thusutnak pawl theih lo kan hmang
 - Hnon mi si kan phang, mi ih co hlan lo kan phang theu
 - Kan mai soal palhnak, tlamtlin lonak mi in sawh ding kan phang theu, tvp a tam tuk Kan sinak taktak khal asi: kan tlu ding, kan bah ding, mi in in hnong ding, in nautat ding, in hmuhsuam ding, in hua ding, thusuhnak hmuah hmuah kan sang thei lo ding. Cui lai can ah Jesuh kan bang sinsin a rak si sawn. Asinan theih ringring dingmi cu Jesuh thupek kan thlun dingah kan sung dah lo asi.
- Hnonmi, nautatmi kan si lai ah Jesuh kan bang sinsin sawn asi.

Cuhnakin kan fehlo, kan sim lo, kan neihmi Jesuh thu midang kan simsin lo tikah kan hlawhsam cia, kan sungcia asi sawn. A rah suahmi cu kan kut sungah a um lo; kanmah in kan tuah tulmi cu Jesuh thupek thlun in tuah ding lawng asi. A rah suah cu amai kutsungah a ummi asi.

Jesuh Thuthangtha midang hnenah simsin dingah ziang na tih, na phang, ziangin a lo dawnkham theu?

Tihphannak in ziangtivek canah Jesuh thupek ropi tuansuak thei lo dingin a lo kham?

Na tihphannak maw, a lo khamtu pawl pahlang thei dingin ziang na tuah ding?

BULPAK ZIRNAK

JESUH IH KHUITAWK FEH DING TI IN SIM

Jesuh in a leitlun mission hnatuan tumpi ah tel ve dingin in ko: leitlun pumpi minung rundamnak hnatuan ah tel ve dingin in ko asi. Cutin hnatuan in kawh theinak thuneihnak a nei ti kan thei.

“Jesuh cun a pan hai ih an hnenah, “Lei le vanih thuneihnak hmuahhmuah cu ka hnenah pek a si zo,” (Mathai 28:18).

Thuneihnak nei timi cu midang hnatuan fial theinak a nei tinak asi. Curuangah Jesuh in leitlun pumhuap in hnatuan fial theinak thuneihnak a nei asi. Hnatuan in fial thei lawng si loin a thuneihnak hmangin leitlun hmuntin kip ah feh in a hnatuan tuantu ding kan si. Culawng hman silo, lei le van sangka tawh (key) keng in a hnatuan fialmi tuah tu ding kan si.

Cutin kan sim tikah kanmah parah phurrit pawl a zang theh asi. Kanmai huham cahnak fimnak thiamnak thilti theinak thuneihnak parah a thum aw mi hnatuan asilo. Milai thinlung thleng tu, milai mizia thleng tu, milai thlarau hringtu, milai nun thlengtu, milai duhnak thlengtu, milai nun sersiamthar saltu Amah Jesuh asi. Cutin kan sungah hna a tuan duh ruangah “FEH UH” tiah in fial mi asi.

Dungthluntu tuah dingin na ke kar suak tikah Jesuh thuneihnak parah na hngat aw maw, nangmai parah na hngat aw sawn? A hnuiah khuimi na nai bik check aw!

1 2 3 4 5 6 7 8 9 10

Nanmah parah

Jesuh parah

Jesuh thuneihnak parah zaahza hngat aw thei dingin ziang na tuah a tul?

A tu cu Jesuh ih “FEH UH” tiah thu in pek nak thuhram pi ziang asi ti kan fiang zo. A thupek kan thlun ding a tang hrih asi. Mathai bung 28 sungah feh uhla leitlun mipun hmuahhmuah a dungthluntu va si ter ding thu in pek. Vancungramah a feh hlan te ah a thupek mi asi.

Tirhthlah 1:7-8, 7Jesuh in an hnenah, “A cuih tikcu le nithla cu ka Pa ih thuneihnak ih khiah-mi a si ih nannih theih tulmi a si lo. 8Sikhalsehla nan hnenih Thlarau Thianghlim a rung thlen tikah

cahnak huham thawn nan khat ding ih Jerusalem le Judea ram le Samaria ram hmuahhmuah le leilung tlun a deng tiang keimah ih theihpitu nan si ding,” tiah a ti.

“Jerusalem,” “Judea”, “Samaria”, “leitlun deng tiang” Jesuh theihpitu, rundamnak Thuthangtha sim suak dingin ziangtivek in Thiang Thlarau bawmnak na tul?

Jesuh simmi cu sunglam ihsin pawnlam a khiihmuh. A nainak bik ihsin a hlatnak lam a khiihmuh. Jerusalem cu Jesuh ih thu a simnak hmun thawn a nai nak bik asi. Judea cu Jesuh thu asimnak ramkhulh hmin asi. Samaria cu Judea ramthen leng lam asi. Miphun zawng in siseh ramthen zawngin siseh a bang aw lo mi asi.

Atlunih simmi ram le hmun pawl ah na um kherkher lo ding. Asinan Jesuh simmi na hrang asive. Jerusalem cu nangmah thawn a nai awknak bik asi; nangmah thawn a naihnam aw bik minung pawl an si: na insang, hripipi, cipi, unau sungkhat, innhnen, natuanpi, tlawngkaipi, khawpi, rualpi pawl an si. Judea cu a kau sinsin in na khawtlangpi, miphunpi, state khat sung ummi, peng le tlangkulh sung minung, ramsung minung pawl tiah sim theih asi. Samaria cu nangmai kiangkap nai an sinan nangmah thawn miphun bang aw lo mi pawl kha asim duhnak asi.

Netabik ah Jesuh in leitlun deng tiang fehsuak dingin thu in pek asi. Jesuh dungthluntu hmuahhmuah in leitlun pumhuap in khua ruat in mission tuanvo kan nei asi. Leiltun pumhuap miphun hmuahhmuah Jesuh dungthluntu siter ding tuanvo kan nei asi.

A tlunah sim vekin zovek minung pawl Jesuh dungthluntu siter in na rian thei ding? Zopawl an si ngan khum aw.

Na “Jerusalem”

Na “Judea”

Na “Samaria”

Na “leitun deng tiang”

JESUH IN ZIANG TUAH DING TI IN SIM

Leitlun miphun hmuahhmuah dungthluntu siter dingin mission hnatuannak ah kan tel theidan ding Jesuh in in sim.

Mathai 28:19-20, 19Curuangah feh uhla miphun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. 20Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” tiah a ti. Hnatuandan dawt 4 a um:

1. FEH: Leitlun ah feh in tuahnak le tongkam in thlaici tuh ding kan si
2. DUNGTHLUNTU SITER: Thlaici kan tuhmi hmang in Thiang Thlarau in milai nun a thleng tikah sual sirnak thawn Pathian kawhnak aw co hlang dingin kan bawm ih Krih dungthlun kan si ter vivo.
3. BAPTISMA: Mipi hmaiah Jesuh an zumnak phuansuahnak baptisma laknak in Jesuh ruangpum kawhhran pehzomnak neither vivo asi.

4. **JESUH THUPEK THLUN DINGIN ZIRH:** Dungthluntu thar pawl thawn fehtlang tuantlang in Pathian thu kan zirh ih Pathian thu an thlun in an nunpi theinak ding kan bawm, cutin anmah khal midang Jesuh dungthluntu va siter ding tiang nun pitling an neih theinak ding kan bawm.

Kawhhran member pawlin step 3 nak kan theh tikah kan tuanvo a cem ah kan ruat theu. Asilo. Kan fiangnak ding ahcun thiamcoter kan sinak, rundamnak kan co mi cu a hram thoknak, a thupi tukmi, a lotheihlo in a tulmi, Jesuh Khrih ah nunthar, thihnak ihsin nunnak hram thawhnak asi. Cuvek thiamthiam in baptism cu mipi hmaiah sunglam nun thleng awknak langhngan in langtermi asi.

Asinan cuvial lawng si loin kan hnatuan cu a pehzawm vivo ding mi asi. Dungthluntu ah buah tahratin midang Jesuh dungthluntu ah an va buah ve thei nak dingah nun pitling an neih theinak ding hrangah zirh vivo dingin thupek mi kan si.

A hnuailam vekin dungthluntu lamzin tluan Jesuh thupek na thlunnak ah ruat in buah aw. Cutin nangmah in na buah lawng si lo, dungthluntu ah na buah mi in an nunpi vivo dingin zirhsin ding na si.

A hnuailam step 4 ah Jesuh dungthluntu midang pawl in jesuh dung an thlun nak ihsin ziang na hlawkpi?

AN FEH SUAKNAK:

JESUH DUNGTHLUNTU AN BUAH NAK:

BAPTISMA AN PEK NAK:

AN ZIRHSINNAK:

Nangmah in teh, jesuh thupek taunsuak dingin, Jesuh thupek step 4, midang Jesuh dungthluntu siter dingin ziangtin na tuan, na tel ve?

1. FEH SUAKNAK:

2. JESUH DUNGTHLUNTU MI VA SITER:

3. BAPTISMA PEK:

4. JESUH ZIRHMI ZIRHSINNAK:

JESUH THUPEK:

“Lei le vanih thuneihnak hmuahhmuah cu ka hnenah pek a si zo. Curuangah feh uhla mipun hmuahhmuah ka dungthluntu va siter uh; Pa le Fapa le Thiang Thlarau hmin in baptisma va pe uh. Cule ka thupekmi hmuahhmuah thlun dingin va zirh uh. Hngilh hlah uh, san a cem lai hlanlo nan hnenah ka um ringring ding,” (Mathai 28:18-20).